

TUSI AUTALAVOU – 2021

FAASOLOGA O MATAUPU MO ASO SA TAITASI

IANUARI

31 O le tatalo mo Tupulaga Talavou Salamo 144:1-12
(Aso Sa o Tupulaga)

FEPUARI

7 O le faatuatua ma galuega Iakopo 2: 14 - 26
14 Usitai i fautuaga lelei
21 Mapu i aao o le Atua Kenese 8:8-14
28 O le sapati mo le laueleele Levitiko 25:1-7

MATI

7 O faiga palota i le Tusi Paia
14 O le Koviti 19 ma ona aafiaga
21 O le Agaga Paia o le Atua Galuega 1: 1-5
28 Aisea ua tietie ai Iesu i le asini a e le o se solofanua
(Aso Sa Laupama)

APERILA

4 O le Alofa Tunoa o le Atua Roma 5: 1-11
(Aso Sa o le Toetu)
11 Tapuaiga faale-Faapotopotoga
18 E leai se isi e tu faamauga i lenei olaga
25 O le pule i le ola – E lē o se fofo o faafitauli

ME

2 Ua oge le gatai fale o Kalilaia Luka 5: 4 - 11
9 O uluai avefeau o le Tala Lelei – o Tinā
(Aso Sa o Tinā) Luka 24: 1- 12
16 Fono Tele Malua
23 Mulimuli i lou fetu Mataio 2: 7 – 15
30 O Iesu ma le alafau taumatau, ofu tino ma le maila e tasi
Mataio 5: 39 - 41

IUNI

6 Pau lava o le foa'i a le Alii (Finauga – Debate)
13 E leai se mea ou te mativa ai Salamo 23
20 E le o le agaga o lenei lalolagi a o le Agaga o le Atua
1 Korinito 2: 1 – 3
27 O le faitotoa ua valiina Esoto 12: 22

IULAI

4 E iloa le laau i ona fua Mataio 7: 15 – 20
11 O uluai so'o o Iesu o faifaiva Mataio 8: 18 – 22
18 E lē o a'u a o le Atua
25 O le laau e lē toulou ona lau Salamo 1

AOKUSO

1 O mai ia Kenese 11: 1 – 9
8 O taitaiga faa-tamā
(Aso Sa o Tamā)
15 O le valaauina o Simona Peteru
22 Ua usiusitai le foafoaga iā Iesu
29 Onosai i le oge Ruta 1

SETEMA

5	O Isakara ma le ola faitaulaga	Kenese 49: 14 – 15
12	E matuā lelei le fealofani o uso	Salamo 133
19	Tausili mo le malo o le Atua	Mataio 6: 25 – 34
26	E alofa Iesu i le fafine o nuu ese	Mataio 15: 21 – 28

OKETOPA

3	Tapenaga o le Lotu Tamaiti	
10	Lotu Tamaiti	
17	Malologa	
24	O Iopu ma lona aiga mai le nuu o Usa	Iopu 1: 1 – 22
31	O Nikotemo ma Iesu i le pogisa	Ioane 3: 1-2/19:39

NOVEMA

7	O le loto maa'a o Farao	
14	O mala e sefulu ma atua o Aikupito (Vaega 1)	
21	O malo e sefulu ma atua o Aikupito (Vaega 2)	
28	A'oa'oina mai mea iti	

TESEMA

5	O le Atua liutino tagata	Ioane 1: 1 - 2
12	O le a sau meaalofa mo Iesu i lenei tausaga 2021?	

Aso Sa: 31 Ianuari 2021 (Aso Sa Tupulaga)
Mataupu: O LE TATALO MO TUPULAGA TALAVOU -
Salamo 144:1-12

O le faamoemoega sili o matua mo fanau, ia manuia. O le naunautaiga foi lea o le Afaigaluega tofofi a le Atua i so o se fata faitaulaga mo Tupulaga talavou, Ia Manuia o latou Olaga.

Ua filifilia le tatalo a Tavita, faamauina i le Salamo 144 mo le tatou mataupu o lenei aso.

Fesoasoani mo le taitai

O Salamo – o fatuga eseese ua tu’ufa’atasia e le au ositaulaga ma ta’ita’i o le tapuaiga Iutaia, e fa’aoga e usuina pe taulotoina faa-tatalo i a latou tapuaiga masani i le Atua.

O le Salamo 144, o lo o faaigoaina: **o le tatalo ina ia manuia.** O le tatalo a Tavita i le Atua, o lo o amata i le faafetai ae faaiu i le momoo ina ia faamanuina le Atua i lona nuu.

Suesuega - Salamo 144:

f.1-2. O le faafetai a Tavita i le Atua, o Lē na tu i matagi ‘olo a o feagai ma taua. Ua toe faamanatu e Tavita lona valaauina mai le Atua – o le tau o taua ma isi malo, ina ia faatumau tuaoi o Isaraelu ma faatumau le filemu ma ona fili. O le manumalo i taua, e le o se malosi o lana taitaiga po o le malolosi o Isaraelu, ae o le Atua na afua ai.

f. 3-4. O lagona o le faatauva, ona o le alofa o le Atua ia te ia le tagata agasala. Ua tau faatauvaaina e Tavita lona malosi ma mea uma, ona o le Atua ma lona alofa mai. E le mafai foi ona faatusatusa le tagata i le malosi, pototo ma le matautia o le Atua.

f. 5-8. O le tatalo ina ia faapaolo pea Aao alofa o le Atua i ona luga ao fufou mai le fili e faaleaga ia te ia. Ua faatoga Tavita, ina se’i fa’aali maia le Silisili Ese o le Atua e ala i le natura o le foafoaga – e o le lagi, o uila emo, ma mauga ina ia iloa e le tagata leaga le sese o lana mea ua fai ma salamo ai.

f.8 – o e lafo upu pepelo i o latou gutu; o latou lima taumatau foi o lima taumatau pepelo ia..

O le faamatalaina lea e Tavita o ona fili: **o tagata pepelo:** e lē gata e pepelo upu e tautatala ai, a o faatinoga – faatusaina i lima taumatau e

pepelo foi. O le tagata pepelo, o le tagata ua lē iloa le Atua. Ua leai se mata’u po o se fefe i le silafaga a le Atua. Ae ua fai lava le mea sese ua tonu i lona loto.

f. 9-11. O le pese fou ua faatusa i le tatalo e faia pea i aso uma. O le augani i le suafa o le Alii ina se’i alofa ma faapaolo ona Aao alofa i luga ia te ia. O le pese e faasūsū ai lona loto ua galala i le fia inu ona o le fili ma ana faiga: *f – 11 – tagata pepelo.*

O le tatalo a Tavita mo le manuia o lona nuu:

f.12 - *“Ia avea o matou atalii e pei o laau toto ua tupu tele a o taulelea i latou; o matou afafine ia pei o tulimanu ua togitogiina e pei o se maota”.*

E lua vaega tāua o le tatalo a Tavita mo fanau a lona nuu:

Muamua: **“Ia avea o matou atalii e pei o laau toto ua tupu tele a o taulelea i latou...”**

❖ **O le a le aoga o le laau e tupu tele?**

O le laau e tupu tele/mafalā, e tele manu felelei e ofaga i ai, e tēlē le paolo e mapu i ai manu mai le vevela o le la. E oo i le tagata galue, e maua le ea malū ma le paolo i le ataata o le laau e tupu mafalā. O lona uiga, o le laau e tupu tele/mafalā o se laau e aoga ma taua i le siosiomaga. O se laau e toomaga i ai tagata ma manu mai le vevela o le tau poo o le fia maua o se ea malū.

E foliga faapea le naunautaiga o Tavita e pei ona taua i le tatalo: ia avea fanau a Isaraelu ma fanau aoga. Ia avea o ni fanau e toomaga i ai aiga i taimi o faigata/taimi o le vevela. O ai foi le tagata ua fia maua le ola, ia avea fanau ma faaola i lē ua moomia le fesoasoani. Ua faapitoa le tatalo lea a Tavita mo fanua tama o Isaraelu. E le gata o fanau tama, ao le taimi ma le vaitau o le tausoosoga o le malosi; taimi o taulelea.

O taimi o le malosi, ua manatu Tavita, e tatau ona faaoga tatau le malosi mo le manuia o aiga, o nuu ma so o se faalapotopotoga. Aua nei faatua, nei oo mai le aso e matua ai ma avea ma toeaina, ona lē aoga lea, aua ua faasolo ina vaivai.

I le Feagaiga Fou – o le laau tupu tele o loo faatusa i ai e Iesu le malo o le Atua, e amata mai i se fatu itiiti ma le faatauva, ae mulimuli ane ua ofaga i ai tagata uma – Mataio 13:32.

Lua: “...o matou afafine ia pei o tulimanu ua togitogiina e pei o se maota”

O tulimanu ua togitogiina i le faaperetania: ‘corner pillars of a palace’. O pou tulimanu malolosi e amoina le falealuga o se maota. O pou tulimanu e togitogiina i mamanu eseese, o se faiga e masani ai tagata Iutaia, mo le matagofieina o fale i le vaai. E faapena le manao o Tavita i lana tatalo, ia lē gata e avea fanau tama o Isaraelu ma laau tupu tele, ae ua naunau foi ia avea afafine o Isaraelu ma poutu malolosi o so o se faalapotopotoga. Ia avea fanau teine ma fanau e tu malolosi i le fautuaina o aiga, ma so o se faalapotopotoga ina ia manuia Isaraelu. O le vaai faa-Isaraelu i fanau teine, e vaivai ma lē aoga, peitai, o le tatalo a Tavita, ua atagia ai le telē o se faamoemoega o lo o tauamoina e fanau teine.

E pei foi o le tatou aganuu faasamoa, o fanau teine, o le pae ma le auli. Po o le a lava le malolosi o alii ma atamamai, ae a leai se fautua, e lē taunuu foi i se lelei.

f.13-14: o le tatalo ina ia tamaoaiga le nuu i le itu faaletino. Ia tutumu fale saito, ia tele lafu manu, ia malolosi povi e galueaina le fanua, ia aua nei faamativaina le nuu, ia aua nei i ai se oge nei tupu se auega i le nuu.

f.15: O le faaamuia i nuu uma, o e fai le Alii mo latou Atua. O le aotelega lea o le tatalo a Tavita, e le gata o le augani i le Atua mo faamanuiaga, ae tatau foi i le nuu ona filifili e tuu tasi lo latou faatuatuaga i le Alii le Atua Soifua.

faamoemoe i le Alii na te faamanuia

Ao ia mea uma, e tupu ma taunuu pe a ola matata’u fanau uma i le Atua. O le uiga atoa lea o le tatalo a Tavita, ia ola matata’u ona tagata i le Atua. Pau lea o le malosiaga e taunuu manuia ai mea lelei uma ua faanaunau i ai o latou loto.

Faatinoga o le Mataupu

I le amataga o galuega faale-Autalavou, o le a se mea ua faanaunau lou loto i le Atua e foai mai mo oe? E tele o tatou manao, ae ta’u mai se mea se tasi (e.g. *Solomona na tatalo i le poto mai le Atua, o Kitiona na tatalo e faatumau le la ae fai le taua e faatoilalo ona fili, etc...*)

Ia tuu le avanoa e saunoa ai sui o le Autalavou po o a ni mea taua ua manatu e tatau ona uma lenei tausaga faale-Autalavou ua ausia (e.g. *ia faalautele le iloa i le Tusi Paia, ia iloa nisi mea taua o le aganuu, etc...*)

“O tupulaga o le lumanai o aiga, nuu ma Ekalesia” e lelei pe a mafaufau poo a ni luitau (*challenges & weaknesses*) o lo 0o feagai ma Tupulaga Talavou i nei aso ua le taunuu ai lea anavatau taua. – vaavaai i suiga o systems eseese ua ola ai tagata: aiga, nuu, Ekalesia, atunu.

Aotelega a le Taitai:

O le naunautaiaga o lenei mataupu, ia avea i tatou ma Tupulaga aoga mo le Atua ma lona finagalo. Ia amata mai totonu o le aiga o tatou tiute faatalavou, e ala i le galulue faamaoni mo le manuia o le lumanai. Ia faamoemoe mea uma i le Alii e taunuu manuia ai. Ia manuia lenei tausaga i galuega o le a feagai ai.

Aso Sa: 7 Fepuari 2021

**Mataupu: O LE FAATUATUA MA GALUEGA –
Iakopo 2:14-26**

“A o le faatuatua, o le faalagolago lea i mea ua faamoemoe i ai, o le maotino lea o mea e le o vaai” – **Eperu 11: 1.**

O le molimau a Iakopo – e iloa le faatuatua i galuega. Afai e faatuatua ae leai ni galuega, o le faatuatua lena ua mate. E leai se ola e maua ai.

Fesoasoani mo le taitai:

O ai na tusia le Tusi a Iakopo -

O le tusitala o le Tusi a Iakopo, o le Aposetolo e suafa ia Iakopo na fai ma taitai o le Lotu Kerisiano i le vaitau o feagai le au faatuatua ma sauaga –**Galuega 8:3.** Peitai, i le tala faasolopito, e toalua Aposetolo na fai ma taitai o le Lotu Kerisiano i le suafa lenei o Iakopo:

1. Iakopo le atalii o Sepetaio le uso o Ioane lea na fasiotia e Herota – *Galuega 12:2.*

2. Iakopo le uso o Iesu – *Mareko 6:3,* lea na vaai tino Iesu ina ua toe soifua mai le oti – *IKorinito 12:7.* O ia lea na poloai Peteru ina ua faasaoloto mai le fale puipui ina ia tau i ai le tala fiafia o lona faasaolotoina mai le Atua– *Galuega 12: 17*

❖ **O se tasi o i laua nei, na tusia le Tusi a Iakopo.**

O le tusi i lona aotelega, o lo o faamamafa ai apoapoaiga faatamā mo le au faatuatua, ina ia iloa le faatuatua i le onosai e tatali tiga o sauaga o lo o faia ia i latou. Ia le gata i le va ma tagata sau, ae ia iloa foi le faatuatua i le ola fealofani ma le fetausia'i o i latou lava i taimi uma.

O LE FAATUATUA MA GALUEGA:

f.14-17 – o le isi lea faafitauli i le ola faatuatua o tagata i le Atua: ***o le faatuatua na o upu ae leai ni faatinoga.*** Ua oo lava i le tagata ua fia maua le fesoasoani, ua sulu atu i le mafatia ae sau le tala: *“Ina o ia outou ma le manuia, ia mafanafana, ma ia maona,” a ua le foai atu ia te i latou ni mea e tatau i le tino.* Fai mai le fesili a Iakopo: *Ou uso e, se a le aoga pe a fai mai se tasi ua ia te ia le faatuatua, a e le ia te ia galuega?*

- O le a se manatu o le Autalavou i le fesili a Iakopo ua aumai? O le a se aoga o le faatuatua ae leai ni galuega?
- O gafea o lenei olaga o lo o tupu ai lenei ituaiga faatuatua, e faatuatua na o upu? Faaitaiga: o taimi o sii alofa i maliu ma so o se faalavelave. E faaletonu loa ni mea e maua po o le le maua foi o se mea, tomumu loa ma fai tala o le faalavelave. A o le fesili: o le a le uiga o le si'i alofa?

f.18-20 - o le **faatuatua e leai ni galuega o le faatuatua ua mate.** O mea uma e mamate e pei ona taua i le Tusi Paia, e liaiina ma lafoai i le afi e mu ai -

- O le a se finagalo o le Autalavou, e sa'o Iakopo pe leai?
- E faafefea i latou e le o faia ni galuega faalelotu?

f.21-26 – ua toe faamanatu e Iakopo galuega fai a Aperamo ma Raava e saga faamautu ai le taua o le faatuatua ma galuega. O Aperamo na ia ofoina lona atalii o Isaako e fai ai le taulaga i le Alii. O le atalii e toatasi, ae na le avea lea ma ala e masalosalo ai le loto o Aperamo i le fetalai mai o le Alii.

O Raava o le fafine o nuu ese, o le fafine tali tane. Na faalogo i le matautia o Isaraelu ma lo latou Atua, ona faatuatua lea o lona loto ma tali leleia tagata o le Atua na asiasi atu i lona nuu. O le faatuatua na faasaoina ai lona aiga atoa mai le taua ma Isaraelu.

- Ia faasoa le Autalavou i nisi o tala o le Tusi Paia o lo o iloa ai le faatuatua e ala i galuega fai.

Ua faamanino e Iakopo mo le au faatuatua o lo o sauaina – e iloa le faatuatua i galuega. E leai se aoga e taulagi ai le faatuatua ma le talitonu i le Atua, ae lē o iloa i le olaga o aso uma. Ia amata mai le ola fetausia'i ma le alofa i tagata uma. Ia aua nei i ai se faailoga tagata. Ia iloa le faatuatua i le alofa atu i le ua moomia le fesoasoani, ae le na o upu ma tala.

O le isi lea mafuaaga o galuega faalelotu o loo faia i Ekalesia i nei aso: o le faailoga o le faatuatua. O lona uiga, afai e le o faia ni galuega po o le tau le faia foi o ni galuega faalelotu, o le fua lena o le ituaiga faatuatua o lo o i lea tagata. Ae afai e galulue malosi ma tautua le Lotu i so o se ala, o le faailoga foi lena o le Faatuatua i le Atua.

O le mea moni, e iloga lava i latou e lima malolosi ma i latou foi e ausage aiga. E le iloa gata foi le tagata e faatalale ma faatuutuu i le lima vaivai. O i latou foi e taumafai lava mo se mea lelei, e iloga foi a latou galuega. O le faamanatu a Iakopo: o le faatuatua e iloa i galuega. Aua o le faatuatua na o upu, o le faatuatua lena ua mate.

Galuega Faatino: Finauga – debate

1. Ia vaevae le Autalavou i vaega e lua: Vaega Ioe & Vaega Tetee.

Fesili mo le Finauga:

1. O a galuega o le faatuatua? – (galuega lelei uma)
2. O se mea e tatau le faia o ni galuega faalelotu (faiga taulaga, sene, atinae, alofa o le Faifeau, ma isi lava galuega o lo o taua ai le suafa o le Alii) pe leai?
3. O nisi o lo o manatu e tatau ona faamuamua le aiga ae faamulimuli mea fai a le lotu – Vaega Ioe – faamuamua le lotu, Vaega Tetee – faamuamua le aiga –
 - Ia manino mafuaaga ma ni mau mai le Tusi Paia e lagolago ai le finauga.
4. Ia manino i folasaga a vaega uma le fesoataiga o le Faatuatua ma Galuega Faalelotu.
 - Ia faaoga le Tusi Faitau o le Mataupu: Iakopo 2:14-26

Aotelega a le Taitai:

O galuega uma tatou te faia, ia faia mo le Alii ae aua mo le tagata. A leai ni galuega, ua leai foi se uiga tatou te pepese ai o tatou o tagata faatuatua. E iloa le faatuatua i au galuega lelei e faia.

Aso Sa: 14 Fepuari 2021

Mataupu: USITA'I I FAUTUAGA LELEI

E taua fautuaga i le olaga tuputupu a'e o le Talavou. Ae sili ai ona taua le iloa o le ituaiga fautuaga e tatau ona faalogo ma usita'i i ai. O nei aso, ua matauina le felanulanua'i o fautuaga eseese o lo o faalogo pea i ai taliga. E i ai fautuaga e lelei ma manuia ai. E i ai foi fautuaga e matua manino lava le leai o se mea lelei e maua ai. O nisi foi o fautuaga e foliga e lelei ma manaia le faaupuga poo le mafuaaga ae mulimuli mai ai le faalumaina.

Fesoasoani mo le ta'ita'i

E le taumate le iu lelei o le tagata e faalogo ma usitai i fautuaga lelei, a o le tagata e lē faalogo i le fautuaga lelei ae talia le fautuaga lē lelei, e iu i le malaia ma le faafanoga.

Pe faapefea ona iloa fautuaga lelei ma fautuaga lē lelei?

O fautuaga lelei, o fautuaga e maua ai le potu ma le atamai (ethical values):

1. Esoto 18:13-27– O le ave a Mose ma taitai i le nuu o le Atua ma le faigamalaga, e lē o se galuega e faigofie. E lē gata e faigata loto o tagata ae e tele foi nafa faatino o lea aso ma lea aso. O se galuega na iloga ona vaivai ai Mose ona o le taumafai lava e fai na o ia le galuega. Ao le fautuaga lea a Ietero na ave ia Mose: Ia filifili nisi o le nuu e fesoasoani ia te ia. Ia filifili ni tagata loto tetele, matatau i le Atua, faamaoni, ma ni tagata e inoino i le ola manumanu – *f. 21-23*. O ituaiga tagata ia ua manatu Ietero e tatau ona fesoasoani ia Mose. O se fautuaga na talia lelei e Mose ma faataunuu ai lana galuega faataitai.

O le faalogo i le fautuaga lelei: **e maua ai le malosi faasili e faatino ai le valaauina**. O nei aso, e toatele taitai latou te lē talia fautuaga faapenei, ona o le naunau i le pule ma le tamaoaga. Ae galo ai, le taape o le galuega ma faatupu ma'i ia te ia o le taitai.

2. Kenese 27:41-46 – o le tala i le fautuaga a Repeka ia Iakopo ina ia alu ese ona ua ita Esau lona uso ia te ia. O le usitai o Iakopo i le fautuaga a lona tinā, na fai ma ala o le iloa o isi mea lelei -

I. Ua maua le filemu i le loto o Esau.

II. Na iloa ai le Atua e ala i faaaliga - Kenese 28:10-22, 32:25-32.

III. Ua maua lana fanau na fai ma tupuaga o le nuu filifilia o le Atua – Kenese 29:15-30:24.

IV. Maua mafaufauga lelei aua se leleiga ma lona uso o Esau – Kenese 33.

O faamanuiaga e pei ona maua e Iakopo ona o le faalogo ma usita'i i lona tinā, o faamanuiaga foi ia tatou te maua pe afai tatou te pei o Iakopo. O le fautuaga e le'i teena pe na fesiligia e Iakopo. Ae na tulai lava ma faatino, lea ua taunuu i le manuia.

O le faalogo ma usitai o Iakopo i le fautuaga atu o lona tinā, **na maua ai isi faamanuiaga e tele i lona olaga**. O le faalogo ma usitai i le fautuaga mai o matua e maua ai faamanuiaga.

3. Numera 13:26-33 – O le fautuaga a Kalepo ia Mose ma le nuu o le Atua ina ia loto tetele ma faamalolosi e agai pea i luma e tau ma Kanana ina ia maua lo latou tofi e pei ona folafola mai e le Atua.

O Kalepo o le tasi o tagata asiasi (spies) i le nuu o Kanana. O le fo'i ane o tagata asiasi na filifilia e Mose, na latou faailoa ai le malolosi o Kanana ma ona tagata. Na latou fautuaina Mose ma le nuu ia aua nei oo atu i Kanana ona o tagata malolosi i latou o lo o nonofo ai - *f. 26-33*. Peitai, o Kalepo na ia vavao le nuu ma fautuaga atu, "*Se'i tatou matua o ae lava i ai, ma fai ai mo i tatou, aua e mafai lava ona tatou manumalo ai.*" O le faamalosi ma le faalaeiau a le tagata faatuatua i le mana o le Atua e mafaia ai o so o se mea. O se fautuaga na logo lelei i taliga o Mose ma le nuu ma fa'aauau ai pea le savaliga ma taunuu i Kanana i nuu folafolaina.

O le faalogo ma usita'i i le fautuaga lelei, **e taunuu lelei ai faamoemoega ua leva ona tautiga i ai**. O nei aso, e faavaivaia a isi tagata, ona o le fautuaga faavaivai ane o isi tagata. Ae afai e maua ni tagata e pei o Kalepo i totonu o aiga, o nuu ma le Aualavou, e mautinoa foi o le a tau lau o so o se faamoemoega o lo o fuafuaina.

Fautuaga e tatau ona mafaufau toto'a i ai:

1. O le fautuaga a Apisai ia Tavita ina ia fasioti Saulo - 1 Samuelu 26:6-11.

O Apisai o le tama a Seruia le tuafafine o Tavita. O le fautua ane o Apisai ia Tavita e faaoo le oti ia Saulo o se fautuaga e mafua i lona manatu e tau le leaga ona o Saulo ma lona taumafai e fasioti Tavita lona uncle.

Peitai, o se fautuaga e le'i taliaina e Tavita, fai mai upu a Tavita: *“Aua e te fasioti ia te ia; aua po o ai ea na te faaoo lona limai le ua faauuina e le Alii, a e le nofo sala ai o ia?”* O le fautuaga a Apisai, e mafai ona sa'o pe lelei i le tatou faalogo ona o sootaga faaleaiga. Peitai, e lelei lona taunuuga. O le faaiuga ua faia e Tavita, o se faaiuga ua tonu ma sa'o atoatoa. Ua faasili ai le mata'u i le Atua ma ana tofiga i lo o le tau ma sui.

2. O le fautuaga a le toalua o Iopu ina ia faifai i le Atua – Iopu 2:9-10.

O le talitonuga a le avā a Iopu, o le ma'i papala e mafua ina ua toasa le Atua. Ua lē alofa mai le Atua. O lona uiga, e le tatau foi ona toe faatuatua Iopu i lona Atua. O le fautuaga e mafua i mea ua talitonu ma ua vaai i ai. Peitai, e le o le mafuaaga lea o le ma'i o Iopu. E pei ona faamauiina, o le ma'i o Iopu o se tofotofoga i lona ola faatuatua. Na manumalo Iopu ina ua ia teena fautuaga mai lona toalua ma ana uo. O le faaiuga o le tala, na faaluaina e le Atua manuia o Iopu mai manuia na toesea.

E i ai le talitonuga, o lo o faalogoina ituaiga fautuaga nei i lo tatou siosiomaga. O fautuaga e faavae i talitonuga masani aemaise o le vaaiga o mata. E i ai foi fautuaga e faia ona o le ita – pei o Apisai, peitai, o ia ituaiga fautuaga e le maua ai se filemu.

O fautuaga e peiseai o le a faatupu le isi vevesi i luga o le isi vevesi. Ao le mau a le atunuu – e le aoga le taufaamatatao aua na o taua ma misa e maua ai. O la le Tusi: o le tali filemu e liliueseina ai le ita. O lona uiga, e le aoga ia ituaga fautuaga. Ae tatau ona saili ini auala filemu pe afai e saili se tali o faafitauli.

Faatinoga mo le mataupu:

1. O le a se taua o fautuaga i lou olaga talavou?
2. E faapefea ona iloa fautuaga lelei ma fautuaga lē lelei?
3. O a ni aafiaga o le faalogo i le fautuaga lelei ma ni aafia o le tetee o le fautuaga lelei.
4. O a ni aafiaga o le faalogo i le fautuaga le lelei.
5. O le a se mea e tatau ona tatou faia pe afai ua teena le fautuaga lelei ae talia le fautuaga le lelei?

Aotelega a le taitai

1. O le faalogo i fautuaga lelei tatou te lelei ai, a o le faalogo i fautuaga le lelei, e iu ai i le faafanoga ma le malaia e le fia manatua.
2. Mafaufau toto'a i au faaiuga e faia.
3. Aua le faalogo i le fautuaga leaga tatou te leaga ai.

Aso Sa: 21 Fepuari 2021

Mataupu: MAPU I AAO O LE ATUA - Kenese 8:8-14

E le taumate le tele o faafitauli ma faigata o lo o fesouaina ai le soifuaga faale-faatuatua o lo o tatou i ai.

O le mataupu o lenei aso, o se toe faamanatu i le soifua tautua ina ia tatou mapu i Aao o le Atua pe a moomia se fesoasoani.

Fesoasoani mo le taitai – Mapu i Aao o le Atua - Kenese 8: 8-14

f.9 – A ua le maua e le lupe - se mea e mapu ai ona vae; ona toe foi mai lea o ia ia te ia i le vaa – (ark) auā sa i ai le vai i le fogāeleele uma ona aapa atu lea o lona lima, ma tago i ai ma au mai ia te ia i le vaa.”

Ua filifilia le tala ia Noa ma le lupe e saga faamautu ai le **tatau ona tatou fo'i i le Atua, pe a moomia se fesoasoani.** O i tatou o lupe faalele a le Atua mo lana feau ma le galuega.

A o le mea mautinoa, e le 'asa lenei soifuaga manaia ma ni faafitauli. E moni e tele auaunaga e maua ai le mapusaga, peitai, o le fo'i lava i le Atua, o le mea e tatau ona tatou faia.

- O le **ark** i nisi o tala o le Tusi Paia, e faasino i le *Ato Laau a le Atua – Esoto 37*. O le faailoga o le Atua auai ia Isaraelu ao i ai i le Esoto mo le 40 tausaga. O le Ato Laau e Paia ma Mamalu – *1 Samuelu 6*.

➤ *Eperu 9:1-4* – ta’ua ai vaega o lo o i totonu o le Ato Laau a le Atua. I nisi o faamaumauga, o lo o ta’u ai papa maa o lo o tusia ai ituaiga e sefulu lua o Isaraelu, sa i totonu foi o le Ato Laau.

O lona uiga, e mafai foi ona tatou faauiga le **va’a na fausia e Noa, o le Ato Laau a le Atua**. O le va’a – *ark* na fai ma faailoga o le Atua auai i le lalolagi, e ui i Lona toasa ona o le agasala a tagata. O le faailoga o le Atua na te lē tuulafoai mai i taimi o faigata.

O le fo’i i le vaa, o le fo’i lava lea i le ATUA. O le faaloaloa mai o lima o Noa, o le tala faatusa lea o le Atua i ona aao e faaloaloa mai pe a tatou sulufa’i atu ma le faatuatua mo se fesoasoani.

f. 10. ona toe faatalitali lea o ia i nisi aso e fitu, ona toe tuuina atu lea e ia o le lupe ai le vaa;

➤ numera fitu (7) – o le numera atoatoa i le faitauga faalutaia.

O le mapu i aao o le Atua, e toe fa’aatoatoa/faafouina ai le malosi faaletino, faalemafaufau ma le faaleagaga e toe faaauau ai feau ma le valaauina.

f.11 – Ua toe foi mai ai te ia o le lupe i le afiafi; faauta foi, o i lona gutu le lau olive mata...

➤ afiafi – ua uma le aso – taeao ma le afiafi – o le aso atoa.

➤ lau olive mata – o le faailoga o le ola ua oo mai i le lalolagi, ina ua tuanai le lolo.

O le toe fo’i a le lupe, o le toe fo’i e ta’u atu ia Noa, ua maua lona mapusaga. Ua mautinoa le ola ua ia maua. E tatau ona tatou toe fo’i i le Atua ma le loto faafetai, pe afai e maua le mapusaga ma maua le ola.

f. 12 – Ona toe faatalitali lea o ia ni isi aso e fitu, ona tuuina atu lea o ia le lupe; a ua le toe foi mai lava ia ia te ia....

O le toe fo’i e ave le faafetai i le Atua, e saga faatupuina ai le malosi ma faateleina ai faamanuiaga e maua mai le Atua. O le lē toe fo’i o le lupe, o le faailoga ua mautinoa lona saogalemu. Peitai, e lē tatau ona galo i le tagata saoloto le alofa o le Atua. Afai o lelei ma saogalemu mea uma, ia fai ma le faaeteete aua o manuia na maua mai le Atua. Ia aua nei galo le Atua, o lo o faatalitali mai. O le a lava le taimi e moomia ai le fesoasoani, fo’i i le va’a ma le faatuatua, o lo o faaloaloa mai Aao o le Atua tatou te mapu atu i ai.

E faapefea ona tatou iloa Aao o le Atua i le lalolagi lenei?

E i ai auunaga o lo o maua ai le mapusaga o le tagata mafatia e pei o:

- | | |
|--------------------------|---------------------------------------|
| a. Falema’i ma Taulasea | - fōfō o gasegase eseese. |
| e. Leoleo | -fesoasoani i taimi o faalavelave. |
| i. Fale Tupe (Fale Loan) | - pe a moomia se tupe |
| o. Fono a le Nu’u | - faafitauli lotoifale o le nuu |
| u. Ofisa Faamasinoga | -solitulafono, fanua, ma suafa matai. |
| f. Faifeau | - faafitauli faaleagaga ma aso uma |
| g. Aiga – matua - toalua | - faafitauli o le lotoifale o aiga |
| l. uo – best friend | - faasoa i ai faafitauli o aso uma |
| m. Ofisa o Aoga | - poto a’oa’oina o aso uma |
| n.Fale o Matai/ Faifeau | - a’oa’oina i tu ma agaifanua |

(ma isi auunaga e faailoa mai e le Autalavou)

O nisi ia o auunaga eseese (ma isi auunaga ua lē tā’ua), o loo auala mai ai Aao Faamalolo ma Aao laveai o le Atua mo i tatou pe a moomia le fesoasoani. O auunaga o loo galulue ai i latou ua maua le tomai mai le Atua, aua se tali atu i faafitauli eseese.

O le tatou lava galuega e fai, o le **saili i ai ma le faatuatua**. Saili ma tatalo i le Atua na te saunia ma faafaigofie auala e maua ai lo tatou mapusaga.

Mo i latou o lo o i ai le taleni o auunaga faapenei, e taua le faamaoni ma ia fa’aaoga tatau le taleni mai le Atua.

Galuega Faatino:

1. Vaevae le Autalavou i vaega eseese ua taua i lalo:

- | | |
|----------------------------|----------------------|
| a. Falema’i/Taulasea Samoa | u. Ofisa Faamasinoga |
| e. Matagaluega o Leoleo | f. Faifeau |
| i. Fale Tupe (Fale Loan) | g. Aiga – matua |
| o. Fono a le Nu’u | l. uo – best friend |

2. O a mafatiaga e mafai ona maua se mapusaga mai auunaga eseese nei?

3. O le a se fesoataiga o auunaga ua taua i luga ma le Mapu i Aao o le Atua?

Aotelega a le taitai

1. O le Atua i ona Aao Alofa tatou te mapu i ai.
2. E tele auunaga o lo o auala mai ai Aao Faaola o le Atua i le lalolagi lenei
3. Ia faamaoni i so o se valaauina, aua o i tatou o lupe faalele mai le Atua.
4. Fo'i i le Atua tatou te manuia ai.
5. Faaaoga tatau taleni ua maua ina ia ola isi tagata.

Aso Sa: 28 Fepuari 2021

**Mataupu: O LE SAPATI MO LE LAUELEELE –
Levitiko 25:1-7**

“E taua le galue ma malolo!” – E lē o le malolo ua leai se mea e toe faia, ae o le malolo e saili se isi malosi faasili aua galuega faatino. E faapena foi le siosiomaga, e tatau ona i ai ni aso po o ni tausaga e malolo ai se'i faatuputeleina ni minerale mo le ola lelei o laau, o manu aemaise lava i le tagata.

Fesoasoani mo le taitai:

1. O le uiga o le upu - sapatī? –

O le sapatī i le gagana Eperu, o le ‘*taofi*’ po o le ‘*cease*’ i le faaperetania. I le tala o le foafoaga, e 6 aso na galue ai le Atua, ae na taofi galuega uma i le aso fitu (7) ae malolo.

2. Sapatī e fai ma Aso Tapuai:

- I le Tusi Paia, o le aso lona fitu o le vaiaso e tatau ona fai ma Sapatī – Aso Toonai i le taimi lenei. Peitai, ua faamamaluina e le EFKS ma isi Lotu Kerisiano le Aso Sa e fai ma Aso Tapuai i le Atua - ona o le **Aso o le Toe Tu**. O le Aso na toe soifua manumalo ai Iesu Keriso le Ao o le Ekalesia mai le oti ma le tuugamau. Ao le Aso Toonai, o le aso na i ai Iesu i le tuugamau.
- O le talitonuga o le au Kerisiano, o i tatou o tagata o le Ekalesia Manumalo a Keriso, o le mea lea ua alagata ai le faamamalu o le Aso Sa. E le gata e malolo ai i feau masani o le vaiaso, a o se aso e mafafau atili ai i le alofa tunoa o le Atua na maliu ai ma toe soifua manumalo ona o le faaolataga mo i tatou uma.

➤ **Esoto 20:8** – o lo o faamatala ai le faamamaluina o le sapatī i le Feagaiga Tuai. O lo o faamamaluina ai le taofi o galuega uma. O galuega e aofia ai ma galuega alofa. Ua faamaonia le finauga ina ua lē fiafia le au faresaio i a Iesu i le faia o faamalologa i le Sapatī – Mareko 1:29-31, 3:1-6, Luka 13:10-17, Ioane 9:1-16 ma isi.

➤ I le manatu o le au faresaio, e oo lava i galuega alofa – faamalologa ma isi, e tatau lava ona taofi – ***cease*** i le Sapatī. Fetalai Iesu, o galuega uma e taofi, ae tau lava o galuega alofa, galuega fesoasoani i nisi ua mafatia e tatau ona faia pea.

➤ Fetalai Iesu i le au faresaio ma le au tusi upu: “*Ua faia le sapatī mo tagata, a ua le faia tagata mo le sapatī*” (Mareko 2:27). Ua faamanino e Iesu, o le sapatī na fuafuaina mo le faafouina faaleagaga o le tagata mo le Atua ma isi galuega faaauau. Peitai, ua matauina le avea o le sapatī ma avega mamafa i nisi o tagata, ona o tulafono faalutaia. O tulafono ua faia ina ia faamalie le manao faaletagata ae le o le sapatī i lona faamamaluina.

✚ E ui i le eseese o aso ua faamamalu ai le Sapatī i nei aso, peitai, o loo tumau lava le uiga moni o le Sapatī – **o le malolo ma mafafau i le Alofa o le Atua.**

O le sapatī mo le Laueleele - Levitiko 25:1-7

O le faatonuga mai le Atua mo Isaraelu e taua mai ia Mose lana auuina ina ia faia le sapatī mo le laueleele pe a fai e taunuu i Kanana ma galulue ai.

O lo o manino i le tusi faitau aiaiga o le faamamaluina o le sapatī mo le laueleele.

f. 3. E ono tausaga e te lulu ai saito i lou fanua, ma e teuteu ai lou tovine.

f. 4. A o le fitu o tausaga e fai ma sapatī lea e mapu ai le laueleele, **o le sapatī i le Alii**; aua foi e te lulu ai ni saito i lou fanua, aua foi e teuteu ai lou tovine. O a mea ua maua i le fanua, ia ‘ai ma fa’aaoga, ae aua nei toe faia ai o se galuega.

f.4. ...o le sapatī i le Alii – o lo o taua i le fuaipu muamua, o le sapatī mo le laueleele e faia pe afai e taunuu ma galulue i laufanua o Kanana.

O le faia o le sapatu, o se avanoa e malolo ai le galueaina o le fanua ae tau o le aai ma fa'aaoga fua o le laueleele – **f.6-7**. O le malolo e lē gata i le aai ma fa'aaoga fua o le laueleele, ae o se avanoa taua lea e mafaufau loloto ai Isaraelu, i le **alofa o le Atua** na afua ai ona selesese ma oaoa i manuia o ia laufanua – aua e lē o ni o latou eleele mai le amataga, peitai, ua maua ma faaaogaina ona o le Alofa o le Atua.

❖ O se faiga ua alagatatau ma fetai lelei i le soifuaga o Isaraelu, ina ia i ai se vaipanoa o le olaga e toe manatua ai le Alofa o le Atua na afua ai ona maua ia laueleele. Ina nei mea ane ua na o le sapi ma fa'aaoga fua o le laueleele, ae galo ai le faafetai i le Atua o Lē na aumaia ia manuia mo i latou.

❖ **(1) - O le a se taua o le sapatu mo le laueleele ma tagata galulue?**

Mo i tatou i le lalolagi leni, e taua le sapatu mo le laueleele ina ia:

(1) - faafouina ai le tamaoiga – *minerale* mo le ola lelei o laau ma manu ina ia aoga mo le tagata soifua.

(2) – e toe mafaufau ai le tagata i ni auala e toe faaleleia ai le laueleele:

- faaititia le faaaogaina o vailaau oona ae taumafai e sasa le vao pe vele foi.
- faaleleia vaega o maua ai se suavai i fanua ma isi auala e faaleleia ai le laueleele
- toe toto nisi laau ma le vao pe afai ua ua faatamaia i faatoaga ma lafu manu i aso ua mavae.

Ao le faasilisili o ia mea uma: **O le malolo ma mafaufau i le Alofa o le Atua ua maua ai faamanuiaga e tele mai le laueleele**

2. O ai e pule i le siosiomaga? –

E pule aoao lava le Atua i mea uma o le foafoaga e pei ona iloa i le tala o le foafoaga (Kenese 1&2).

Ina ua uma ona faia o mea uma, ona faia lea o le tagata i le faatusa o le Alii ma tuu i ai le pule ina ia fa'aaoga ma tausi lelei le faatoaga. O le upu **pule** i le gagana faa-Eperu: o le *radah*. O lona uiga, o le nofotupu po o le manumalo. O le finagalo o le Atua, ia tulaga ese le tagata mai mea uma o le foafoaga.

O le pule ua tuuina i le tagata, o le pule e tausimea faatasi ai ma le Atua. O nei aso, ua tele ina faauiga sese e tagata le upu – '*pule*'. Ua faauiga i se tulaga ua soona fai le siosiomaga e pei o se malae o lo o tau ai se taua - (*battlefield*). Peitai e lē o le finagalo lea o le Atua mo le siosiomaga, o le pule ua tuuina mai i a i tatou: o le pule e faia ma le alofa e pei ona tuuina mai e le Atua o le Alofa. O le pule e tausi lelei ma fa'aaoga tataua le siosiomaga ua aumai.

Faatinoga mo le mataupu

1. O le a le Sapatu?

2. O ai e pule i le siosiomaga

3. O le a se taua o le Sapatu mo le laueleele ma tagata galulue?

4. Ia faasoa le Autalavou i nisi o faalavelave ogaoga o lo o tutupu i le siosiomaga i nei aso pe aisea – afi i togavao – Ausetalia ma Amerika, o galulolo ma tafega, o palapala solo ma isi.

Aotelega a le taitai

1. Tausi faalelele le siosiomaga ma 'auala le manatu māmā i lona fa'aaogaina.

2. Ia pule ma le alofa ae lē o le faaususili ma le faamaualuga.

3. Ia tausi le sapatu mo le laueleele ma mafaufau i le Alofa o le Atua

Aso Sa: 7 Mati 2021

Mataupu: O FAIGA PALOTA I LE TUSI PAIA

O lo o loma le faiga palota a lo tatou atunuu. O se avanoa e filifili toto'a ai ni ta'ita'i o le atunuu mo le isi 5 tausaga o i le lumanai. O le mea mautinoa a lelei taitai o le atunuu ua lelei foi le sologa o atinae ma le ola o tagata i totonu o se atunuu. O le tatou mataupu o leni aso, o le a tatou faasoa ai i nisi o faiga palota po faiga filifiliga o loo taua i le Tusi Paia.

Fesoasoani mo le taitai:

Iefata: O Iefata o le tama na tuulafoaina e ona tagata ma ona tupuaga. Petiai, na toe aami e le nuu e fai ma taitai i le taua ma Amoni. Na iu manuia le taitaiga a Iefata ona o le Atua na fesoasoani ia te ia - *Faamasino 11*

O le olaga lenei, e tau le amanaia tagata faapei o Iefata: tagata ua tuulafoaina ona o ni mafuaaga ua manatu isi tagata e sa’o. Peitai, o tagata ia e mafai ona ui mai ai le finagalo o le Atua e fai ma taitai lelei.

Saulo: O le manao o Isaraelu, ia filifili se tupu e fai ma faamasino ia te i latou, ia muamua foi le tupu i o latou luma i le taimi o taua ma isi malo – *1 Samuelu 8: 19-22*. O Saulo i lona faamatalaina – o se taulealea e aulelei ma maualuga: e leai se tagata o le fanauga a Isaraelu e sili ona aulelei ia te ia; e gata ifo i ona tau’au le maualuga o le nuu uma – *1 Samuelu 9:1-2*.

O Saulo o le tupu muamua lea o Isaraelu, ina ua faavae lona malo. E le o se galuega e faigofie le taitaiga faatupu i se taimi muamua. E tele faigata ma fita, aemaise o le taimi lea o lo o avea Samuelu ma taitai o le nuu, ina ua maliliu Eli ma lana fanau. O se taitaiga e tele ona vaivaiga e pei ona faaigoaina: O le tagata e le faalogo i le Atua. Peitai, o le maliu o Saulo o lo o viia e le toatele o tagata, ona o le tupu na maliu i le taua. E maliu lava o lo o fai lona tiute, o le muamua i luma o le taua ma isi malo. E moomia ni taitai e pei o Saulo le saili malo.

Tavita: E toafitu le fanau a Iese e pei ona taua i le tala. O tama matutua, o tagata tino maualuluga ma malolosi. Peitai e lei filifilia i latou e le Atua. Ua manino le fetalaiga a le Atua ia Samuelu: *Aua e le vaai le Alii pei ona o le vaai o tagata, aua e vaai tagata i le tino, a e vaai le Alii i le loto*. Mai le toatele o uso tino laulaua ma le malolosi, na filifili e le Atua le uii o le fanauga, ona o lona loto.

E moomia ni taitai faapei o Tavita, le lototele ma le lotomalosi e faia o mea lelei. E ui lava na pa’u maualalo ona o le agasala ia Patesepa, peitai, na toe timata le uega, salamo ma fa’auau i ona tiute faatupu seia oo ina oti.

Saulo – Paulo: *Galuega 9*

O Saulo o le tagata faamaoni i lona talitonuga faa-lutaia. O lona faamaoni lea na afua ai ona saili e saisai le au kerisiano. Peitai, o iina na valaauina ai e le Atua i le ala i Tamaseko ma avea ai ma tagata faamaoni i lona talitonuga faakerisiano e oo mai i nei aso. –

E moomia e le Atua ni taitai faamaoni. O le faamaoni e faia ai galuega lelei mo isi ae le mo na o ia ma lona manuia. O taitai faamaoni, e le femoumoua’i pe faalotolotolu.

(Ma nisi taitai e filifili mai e le Autalavou mo le talanoaga)

Faatinoga o le Mataupu:

Ia filifili ni taitai o lo o taua i le Tusi Paia ma faasoa i auala na filifili ai i latou e fai ma taitai.

Aotelega a le Taitai:

E tele tala o le Tusi Paia o lo o iloa ai taitai lelei na filifili e tagata ma le Atua e tauave tiute faataitai. O le mea ua mautinoa, e finagalo le Atua ia amiotonu ma ia faamaoni taitai i o latou tiute. O le tiute foi o tagata lautele, o le filifili i taitai lelei ma aua nei faaituau le filifiliga ona o tupe ma nisi lava auala piopio. Filifili faatasi ma le Atua.

Aso Sa: 14 Mati 2021

Mataupu: O LE KOVITI 19 MA ONA AAFIAGA

E le na ma le laina lenei faama’i ma ona aafiaga i le lalolagi. Ma e le tasi foi pe lua ni aafiaga o le Koviti 19, e le gata i le siosiomaga ae ua sili ona aafia le soifua o tagata.

O le tatou mataupu o lenei aso, o le a tatou talanoa i itu lelei – (advantages) ma vaivaiga (weaknesses) o le Koviti 19 i le siosiomaga ma tagata soifua.

Faatinoga o le Mataupu: Fesili ma Tali

1. O a itu lelei ma vaivaiga o le Koviti 19 i le tagata ma le siosiomaga? Ia faataua vaega nei:

- a. Ola o le tagata – faaletino
- e. Ola o le tagata – faaleagaga
- i. Siosiomaga

(ma nisi vaega e faailoa ane e le Autalavou)

Fesoasoani mo le taitai:

O le Koviti 19, o le faama’i oti i le lalolagi. O le vaivaiga sili lava o le Koviti 19: *o le maliliu o le faitau miliona o tagata, ma le isi foi faitau miliona ua aafia i le virus*.

O isi aafiaga o le Koviti 19 i le lalolagi e aafia ai:

- ❖ faigamalaga i le va o atunuu, o fefaatauaiga, galuega a tagata, tapunia pisinisi ma faleoloa ma isi lava aafiaga ua silafia.

O aafiaga o le Koviti 19 mo Samoa e aofia ai:

- ❖ faaitiitia o tupe maua mai atunuu i fafo
- ❖ tele pisinisi faaturisi – *tourism industry* ua leai ni galuega ma ua vaea tagata faigaluega.

(ma isi aafiaga e faasoa ane e le Autalavou)

O loo manino lava i le tala faasolopito, o le Koviti 19 o le faama'i oti. Peitai, e i ai suiga lelei na iloa ina ua faamamalu tapu/vavao mai le faama'i.

- ❖ faatupulaia le faamalosiā o le tu mamā o tagata uma
- ❖ ua faamalosiā le ola faaleagaga o tagata – tapunia soo se pisinisi i le Aso Sa faatoa tatala i le afiafi
- ❖ ua maua mafutaga lelei i totonu o aiga, ona o le vavao ua faasa ai potopotoga faitele sa tele ina alu ai le taimi o matua ae le mafuta ma fanau.
- ❖ ua toe foi le toatele o tagata e atiae faatoaga i le taimi o le Koviti 19: faia togalaau aina, o maumaga ma isi lava atinae.

(ma nisi suiga lelei e mafai ona faailoa ane e le Autalavou)

Suiga i le Siosiomaga:

I le vaiata o le Koviti 19, na taofia le tele o pisinisi gaosi oloa ma taofia tafaoga i matafaga. E oo lava i le feoi o tagata na matua tapu lava. O le isi lea fesoasoani tele na laveaiina le faaleagaina o le siosiomaga. Ina ua maua ni vaiaso po o ni masina e taofia ai kasa oona aemaise o le faaleagaina o le siosiomaga ona o tagata ulavavale.

(e i ai atunuu na faailoa mai i ata le eseese o le vaaiga na i ai i le taimi ao le'i faia tapu o le Koviti ma taimi o le Koviti 19)

Aotelega mo le Ta'ita'i:

O le Koviti 19, ua iloa ai:

i. E leai lava se isi e atoatoa ua na o le Atua lava e toatasi.

I le aotelega o le faama'i oti lenei i le lalolagi, o i na iloa ai le leai o se atoatoa i le galuega a fomai ma i latou ua faaigoaina o polofesa o le galuega faafomai. Na faitau masina le sailiga o le togafiti. Ma o le ala tupu tele lea o le faama'i ona ua leai se fofu/cure.

ii. E le o se mea lelei le manatu faapito.

O lo o i ai lava le talitonuga o le virus o le Koviti 19, o se virus na faia i le poto faasaienitisi. Ma le faamoemoe ia toatele ni tagata e aafia ina ia saili le pule o le lalolagi lenei. Sa faia ma le lilo i manatu e oo le lalolagi ini aafiaga faapenei, aemaise o le toatele o soifua e maumau ai. Ua saga a'oa'o mai ai, e le o se mea lelei le manatu faapito.

(ma nisi aoaoga e faailoa ane e le Autalavou)

Aso Sa: 21 Mati 2021

Mataupu: O LE AGAGA PAIA O LE ATUA - Galuega 1:1-5

O le Agaga Paia o le peresona lona 3 lea o le Atua. Le Atua le Tama, le Atua le Alo ma le Atua o le Agaga Paia.

Fesoasoani mo le taitai

O le 'Agaga Paia' i le gagana Eperu – Feagaiga Tuai - o le *ruach*. Ae o le faa-Eleni - Feagaiga fou, o le *pneuma*. E uiga tutusa upu ia e lua – o le *manava* (to breathe) – O le OLA. O lona uiga o le Agaga Paia o le Atua, o le OLA.

E i ai faailoga poo vaaiga e iloa ai le Agaga Paia o le Atua - *Characteristics & Personality* – i le soifuaga o le tagata kerisiano.

1. O le Agaga o le Atua na te aumaia le fiafia ma le filemu (Comforter) i le loto o le tagata.

O le Agaga Paia na te aumaia le fiafia ma le filemu i loto ua mafatia. O le mafanafana e faamafanafana i le au faatuatua pe a fetaii ma faigata.

2. O le Agaga Paia, e faapotoina ai le tagata faatuatua (intelligence).

O le Agaga Paia na te musumusuina loto ma agaga o tagata faatuatua i le mea e tatau ona fai ma le mea e lē tatau ona faia. 1 Korinito 12: 1, 8-11, o lo o faamauina ai meaalofo, o taleni ma agavaa mai le Agaga Paia e faatamaoagaina ai le tagata faatuatua.

O taleni ma agavaa e pei o le fomai, faifeau, tusiata, faiaoga ma le tele o isi meaalofo ua faapotoina ai i tatou e le Agaga Paia. O le Agaga Paia, o le Ola na te aumaia taleni eseese e faatamaoagaina ai le ola o le tagata faatuatua. O le Agaga o le Fesoasoani Sili mo le au faatuatua: *Ioane 14:26, 15:26; Roma 8:16; Galuega 2: 1-4, 1 Korinito 12:11.*

Aua nei faatausuai se isi i le Agaga Paia o le Atua:

- Mataio 12: 31-32 – ua fetalai Iesu, ia aua nei ulagia e se isi le Agaga Paia o le Atua.
- Galuega 5:9 – o le oti o Anania ma Safaira e mafua ina ua laua pelogia le Agaga o le Alii e ala i le tautinoga na faia ae mulimuli ane ua le faia.

Faatinoga mo le mataupu

Ia faamatala se mea na tupu i lou olaga, o loo fai ma pine faamau o se galuega a le Agaga Paia i lou olaga. *faataitaiga: faasaoina mai se faalavelave ma isi*

Aotelega mo le Taitai:

O le Agaga Paia na te aumaia le filemu ma le mafanafana i taimi o faigata. E iloa le Agaga Paia i taleni ma agavaa ua tatou maua. Aua le ula i le Agaga Paia o le Atua.

Aso Sa: 28 Mati 2021 (ASO SA LAUPAMA)

Mataupu: AISEA UA TĪ'ETI'E AI IESU I LE ASINI AE LĒ O SE SOLOFANUA?

O le Aso Sa leni o le Laupama o loo faamanatu ai le malaga faatupu a Iesu i Ieruselema. O le malaga o loo tietie ai Iesu i le tama'i asini. Peitai, o lea ua fesiligia e le tatou mataupu pe aisea na lē tietie ai Iesu i se solofanua.

Fesoasoani mo le taitai

Ia toe faamanatu le taua o le Aso Sa o le Laupama. O le faailoga o le loto maualalo i le malaga faatupu a Iesu i Ieruselema. O laupama o le faailoga o le *faamalumaluga*. Aemaise taimi e laina ai le tagata i le mu tinitini o le la, e manaomia se paolo e mapu ai le tagata.

O le laupama o le faatusa lea o le faapaolo o le aao a le Atua, e auala mai i le malaga faatupu a Iesu Keriso i Ieruselema.

➤ O le solofanua ma lona aoga:

Na iloga le aoga o solofanua i le afa muamua o le meleniuma lona 2, ina ua fa'aaogaina e tagata tau o Aikupito sa ta'ua o *Hyksos* seia oo mai i nei aso.

O le solofanua i le vaai a tagata tau – o le faailoga o le malosi ma le saosaoa. O solofanua latou te toso kariota i taimi o taua. E amuia se 'autau e tele ni ana solofanua, e lē gata e saogalemu tagata tau, ae toatele foi le fasi i ona fili. O le malosi o le solofanua e pei ona fetalai le Atua ia Iopu: o le malosi e oo a i taua e lē fefe - Iopu 39:19-25.

I le faavasega o manu e faaaogaina i malo tetele, o le solofanua o se manu e taua ma aloaia - *valued as honourable and noble animal*. E le gata e faaaogaina i taimi o taua, ae faapena foi i faigamalaga faa-tupu. O le tietie atu o le tupu i le solofanua, o le faailoga o le tupu malosi e toatele lana 'autau ma lelei lona tamaoaiga.

Lapataig ia 'aua le faamoemoe i solofanua:

1) Teuteronome 17:14-16 – Na fai atu Mose i le fanauga a Isaraelu, afai e filifilia se tupu, aua nei faatoateleina ni solofanua, aua foi nei faatau ni solofanua mai Aikupito.

A vaai faalemataupu Silisili i lea tulaga, aua nei faaaogaina solofanua e fai ai ni 'autau ma sii taua i nisi nuu. Aua le faamuamua le malosi faaletagata. Ae ia faamoemoe i le pule mai le Atua. O lona uiga o le solofanua e faatusa i le malosi, e faaaogaina i se taua - *warhorse*.

2) 1 Samuelu 8:11-17 – O le fautuaga a Samuelu i le nuu ina ia iloa ituaiga pulega o le a faia e so latou tupu e tulai mai. O le tupu o le a fai a latou fanau ma tagata e tietie i solofanua. E fai ma kariota. O lona uiga, o pulega e faamoemoe i le malosi o le tagata ae le o le Atua.

3) Iosua 11:9 – O le faatinoga ua faia, ina ia mautinoa le faaumatia o solofanua ma kariota na fai ma aupega a le fili. "*Ua vaea vae o solofanua ma susunu i le afi*". E silia ma le afe le faitau aofai o fili o Isaraelu na faaaogaina solofanua ma kariota. Ao le 'autau a Isaraelu e toaitiiti. O le faailoga O LE ATUA E TAU MO ISARAELU. O le ala manuia lea o taua e feagai ma le nuu o le Atua, aua e le o i latou, ao le Atua o lo o tau mo i latou. E le o faamoemoe i le malosi o tagata tau ma le tele o ni solofanua, poo le tamaoaiga faalelaloagi, ao le Atua Soifua.

➤ O le asini ma lona aoga:

O asini na taunuu i Palesitina i le meleniuma lona 4 Tausaga Lumanai le Mesia (TLM) mai Aikupito. O le asini ua ta'ua o le manu e filemu, ma o le manu o le avega (*humble and a beast of burden*). Aua e nafatia e ia se

amoga mamafa i luga o le ala. O asini e faigata ona faate'i, e le pei o le solofanua. O le asini e na te iloa atu faafitauli o loo tutupu i luga o le ala pe savali pea pe 'alo i sesi auala. Donkeys are very cautious of their surroundings than horses.

Se tasi lea o manu e vaai maualalo i ai tagata. E le tino malosi ma saosaoa e pei o le solofanua.

Ae telē le aoga o le asini i totonu o Palesitina aemaise i taimi o fefaatauaiga o oloa i taua i o latou nuu tuaoi, ma feau e fai a latou aiga.

Tala i le aoga o le asini:

1) Numerā 22:21-39 – O le tala ia Palaamo ma lana asini o lo o atagia ai le atamai o le asini i le iloa o mea o loo tutupu i lona siosiomaga.

E lei te'i le asini ina ua iloa atu le agelu a le Atua. Ae na 'alo ese ma faapa'u i lalo. E le'i iloa e Palaamo le agelu, a o le asini na ia iloa. Semanu le asini na faasaoina lona ola mai le pelu a le agelu.

O le asini - na faasaoina le ola o Palaamo. O foliga vaaia ia o le malaga faa-tupu a Iesu, o le malaga ina ia Faaola tagata e ala i ona puapuaga o loo faatalitali mai.

2) Faamasino 15:15-17 – Na fa'aaogaina e Samasoni le ivi auvae a le asini e fasi ai tagata e afe. O le faailoga e iloa ai le malolosi o ponaivi o le asini i loo ponaivi o le solofanua. E pei lava ona taua i luga, o le asini e faaigoaina o le manu ave avega – beast of burden. Po o le a lava le mamafa ma le tele o avega, e tauamo lava e le asini.

O le asini e lava onosai, e le faalialia vale i sona malosi, e le amanaia e tagata taualoa ma tupu, ae na o aiga taitasi latou te fa'aaoga le asini mo a latou feau masani. E aoga le asini i tagata vaivai, ao le solofanua e faaaoga tele e tagata mauoa.

O foliga ia o le malaga faa-tupu a Iesu. O le malaga e faaii i le satauro mo le faamagaloina o agasala a le lalolagi. E vaai le tagata i le maualuga ma le saosaoa o le solofanua, ae le amanaia le asini E le amanaia e tagata malolosi ma tagata mauoa, ao tagata vaivai ma mamai, o Iesu le tali o faafitauli. O le malaga faatupu a Iesu i Ierusalem, na sau i le auala maualalo.

3) Sakaria 9:9-10 – O le valoaga o le Mesia o lo o tietie i luga o le asini lo o taua mai i le fuaiupu e 9. Ae o le fuaiupu e 10 o loo ta'ua ai le

faaumatia e le Atua o kariota ma le solofanua. O lea foi ua toe faamaonia, o le malaga faatupu a Iesu i Ierusalem, na sau e aumai le filemu ae lē o se taua.

O le malaga faa-tupu a le Alii e le tutusa ma le malaga a se tupu o lenei lalolagi. Pe a faatusatusa i nei aso, e matua faia lava tapenaga i siva ma pese. E teuteu ma faamatagofie mea uma. O nisi atunuu e taotoo tagata ae savali ai le tupu po o se tagata maualuga o se malo. A o Iesu, na fola i lau o le pama le ala ma ofu o tagata. A o ia tagata, o tagata vaivai. O tagata matitiva ma le mamai. Aua e lei fofolaina ni ofu talaloa poo ni ofu tupu ae savali ai le asini.

Faatinoga mo le mataupu

1. Tusi mai lou silafia i ni eseese o le solofanua ma le asini i vaega eseese nei: amio, malosiaga ma vaivaiga, o le aoga i totonu o sosaiete.

2. O le a se mea ua mafua ai ona tietie Iesu i le asini ae le o se solofanua?

Aotelega a le taitai: Aisea ua tietie ai Iesu i le asini ae lē o le solofanua?

1. O Iesu na afio mai i le auala maualalo ae le o le malosi faafitafita

2. O le asini o le faailoga o le le amanaia i totonu o sosaiete, a o le solofanua e faamoemoeina e tupu ma malo tetele.

3. O le solofanua e malosi i taua a o le asini e malosi i le faiga o feau faaleaiga.

4. E fa'aaogaina e Iesu mea faatauva e auala mai ai lona finagalo i le lalolagi.

Aso Sa: 4 Aperila 2021 (ASO SA TOE TU)

Mataupu: O LE ALOFA TUNOA O LE ATUA - Roma 5:1-11

O le Aso Sa lenei o loo faamanatu ai e le au kerisiano uma le Toe Soifua Manumalo o Iesu Keriso mai le oti ma le tuuagamau. O le atoaga o le Faaolataga na faia i lona ALOFA TUNOA mo le lalolagi agasala.

Fesoasoani mo le taitai

O le a le **Alofa Tunoa o le Atua?**

O le alofa tunoa o le Atua i le faaperetania o le *Grace of God*. I le gagana faa-Eleni o le alofa tunoa, - o le *karis*.

A faamatalaina, o le alofa e lē faatuaioia. O le alofa e lē manomia se tau. O le alofa e le faavaea i se isi lava mea, a o lona lava finagalo faitoatasi ua afua ai.

O le mataupu o lenei aso ua fa'aaogaina ai le tusi a Paulo i le Ekalesia i Roma.

O Le Tusi a Paulo ia Roma:

E i ai le talitonuga, e le'i faatuina e Paulo le Ekalesia i Roma. A'o le Ekalesia na mafai ona faavaeina e Iutaia Kerisiano o loo nonofo i Roma.

O i latou, na liua e avea ma kerisiano i le Aso o le Penetekoso ina ua auina ifo le Agaga Paia o le Atua ma toia ai i latou, o e na faatalitali ma le loto gatasitasi i Ierusalem- *Galuega 2.*

Taimi ma le nofoaga na tusia ai le tusi:

O le tusi, na tusia e le Aposetolo o Paulo, i le tausaga T.A. 56-57 i le vaitau o le tau malulu (winter) agai i le amataga o le tau totogo (spring) ao i ai Paulo i Korinito, ina ua malolo ane mai lana galuega tala'i i Efeso (T.A. 52-55) – Galuega 19.

Roma 5:1-11

Ua faapupula atili ai e Paulo le uiga o le feau tupito o lo o laualuga i le tusi atoa lenei ia Roma: O le **Tauamiotonuina i le Faatuatua** – O le fesili – Pe faatuatua i le ā? O le tali: Ia faatuatua i le Faaolataga na saunia e le Atua i lona lava Alofa Tunoa. O le Faaolataga ua tauamiotonuina ai le tagata faalemata'u ona o Iesu ua fai ma sui e ala i Lona maliu. O le Faaolataga ua mitamita ai le tagata ina ua ta'usaolotoina mai le pule a le agasala. O la Paulo i le au faatuatua i Roma: o le mitamita i le Atua ina ua faatuatua i lona Alofa Tunoa e tupu ai le onosai i puapuaga, o le onosai e tupu ai le mautinoa, o le mautinoa e tupu ai le faamoemoe, o le faamoemoe e le ma pe solomuli i se mea e tasi, aua ua mautinoa, o le Atua o loo talitonu ma ifo i ai: o le Atua lava o le Alofa Tunoa.

O le feau lea o lenei Aso Sa o le Toe Tu: ia mitamita i le Alofa Tunoa o le Atua. Aua o le Alofa Tunoa o le Atua, na te tuulafoai i tatou. Tusa lava po o a fea tatou te aga i ai, e faatasi mai lava le Atua i a i tatou.

O le Atua i lona Alofa Tunoa, e muamua e mulimuli foi, e tausi i tatou lana fanau faatuatua.

O le a sau mea aoga ua fai mo le Atua ma lona Alofa Tunoa ia i tatou uma?

Faatinoga mo le mataupu - Taliga Fesili:

1. Pe faapefea ona tatou maua le alofa tunoa o le Atua? –

Ua uma ona maliu Iesu mo i tatou, o le faailoga lea o lona Alofa Tunoa ua faasafua mo tagata uma. Pau le mea e tauamiotonuina ai i tatou i Lana Silafaga, o le faatuatua ma talia o Ia i le loto ua salamo faamaoni.

2. Afai o le alofa tunoa o le Atua, e mo tagata uma, o le alofa e lē faatuaioia, ae faapefea tagata e lē talitonu i le Atua ae fai mea lelei? E talia i latou i le faaolataga?

O le Atua e alofa i soo se tagata. Ua tatou fai mai e leaga Pai ma Lafai ona ua tatou manatu e leaga, ae a tatou fesili i a i latou ia, e tonu lava ma sa'o faaiuga ua latou faia i o latou lava manatu. O lona uiga, o le talia ma le le talia, o loo i le Atua faamasino tonu.

3. O le a se tali atu a tagata Kerisiano i tagata e le talitonu i le Atua ae latou te faia galuega alofa? Tatou te tuulafoai i a i latou pe leai? –

E le tataua ona tuulafoai, e tataua ona taumafai e aumai i totonu o le mafutaga a le au faatuatua. Afai e fai atu ae le ano mai, ia aua nei fiu le galuega alofa, ia taumafai pea, e sau lava le aso e tali mai ai le Atua i le galuega lelei o lo o e faia.

Aotelega a le taitai

1. O le alofa tunoa o le Atua e mo tagata uma.

2. E le na o tagata Kerisiano, e aofia ai ma tagata uma e le o ni Kerisiano

3. O le alofa tunoa o le Atua, e tuu avanoa ina ia salamo le tagata, ma ia iloa le Keriso Toe Tu

Aso Sa: 11 Aperila 2021

**Mataupu: TAPUAIGA FAALE-FAAPOTOPOTOGA –
Congregational Praises**

E tele suiga ua molimauina i nei aso amata mai lava i aiga, o nuu, Ekalesia ma le atunuu. O suiga o lo o faia i le manatu: **“O le fuata ma lona lou”**. O le mataupu o lenei aso, o se avanoa tatou te faasoa ai i nisi o suiga ua vaaia i taimi o tapuaiga faale-potopotoga.

Fesoasoani mo le taitai

I le tala faasolopito o Isaraelu, o le tapuaiga i le Atua e faaoga ai le napeli, o le kitara, o le pu leo tele, ma isi. O le tapuaiga e aofia ai pese ma siva i le Atua.

I tapuaiga a le EFKS – e le faamalosia le faaogaina o isi mea fai faili e ese mai le piano. Ua masani lava i tatou i le tapuai filemu, e faaoga ai le piano mo le taina o pese. O nei aso ua faaoga musika tu'itu'i - *drums* ina ia maua sina suiga i le faalogo ma le usuina o pese, peitai, o le tele o Ekalesia o lo o tapu pea le faaogaina o musika tu'itu'i e taina ai pese lotu.

Tapuaiga Faalefaapotopotoga – Congregational Praises:

O le isi nafa tausi a le tagata faatuatua i lona va fesootai ma le Atua – O LE VIVII. O viiga e tatau ona saunia lelei ma ia mālīe i le faafofoga a le Atua. Peitai, o nei aso, ua molimauina le mou malie ese atu o le saunia lelei o viiga mo tapuaiga faitele, ona o suiga i fati ma musika o loo fa'aaogaina ai.

Congregational Praises o lona uiga, e tatau ona silafia uma e tagata o loo faapotopototo e tapuai i le Atua le faagasologa o le tapuaiga. E tatau ona silafia e tagata uma pese o le a usuina. E tatau ona faitau uma tagata i le Tusi Paia – FaaSamoa. O le lauga e tatau ona faasamoa ina ia malamalama tagata uma. (*A i ai ni malo mai fafo, e tatau ona fai sina faaupuga faaperetania o le lauga ina ia malamalama ia tagata*). O le faamoemoe maualuga o nei faiga, ia laugatasia tagata uma i le tapuaiga ua faia. Ia aua nei afaina le soifua tapuai o tagata i faiga ma amioga a nisi o tagata.

Suiga o Pese i taimi o Tapuaiga:

E lua ituaiga musika o loo mafai ona tatou faalogo ai i aso uma:

- (1) secular music - musika faalelallolagi
- (2) sacred music - musika paia.

O nei aso, ua i ai fati ma musika faalelallolagi ua faaoga e taina ai pese lotu. (**O le a se manatu o le Autalavou, o se faiga e lelei lea faiga pe leai?**) E le faasaina e le tatou mataupu le faaogaina o ia fati ma ia musika. A o le tuualalo, afai e aafia ai le soifua tapuai o nisi ona o le soona fa'aaoga, e fautuina le taofi. E tatau foi ona filifili lelei fati, aua o

isi faalelallolagi o lo o fati ai pese aualofa i faigāuō o lenei lallolagi. O ia ituaiga musika ma fati, e manatu e le tatau ona fatiina ai ni pese lotu.

Siva ma Pese i taimi o Tapuaiga:

O faiga masani a le EFKS, e le faamalosia le siva ma pese (e pei ona faia e isi tapuaiga) seia vagana Aso Faamanatu: Aso Sa Tinā, Tamā ma le Lotu Tamaiti. E i ai taimi e fai siva faaleagaga i Lotu Au Leoleo ma Lotu Au Taumafai. Ao ia faiga, o loo faavae i le faamoemoe, o Polokalame ua saunia mo le Aso Faapitoa.

O suiga ina ia eseese vaaiga e faamatagofie ai le polokalame i lea aso ae le o se mea e tumau i tapuaiga.

Faatinoga mo le mataupu

E i ai mataupu e fesootai i pese ma viiga o le Lotu ua lisiina atu i lalo e moomia ai se faasoa o le Autalavou. Ia fesili po o ai e lagolagoina ia mataupu ao foi e tete'e. Ia manino mafuaaga o le ioe po o le tete'e.

Mataupu nei ia faasoa ai:

1. Aveese le aufaipese faapitoa – *special choir*, ae ia faamalosia le ekalesia atoa e fai ma aufaipese.
2. E o mai tagata i le lotu ma nonofo i tua, ae le o tuu atoa latou agaga i pesepesega. Engage the whole congregation in singing the hymns of God.
3. Ia i ai lava le vasega o asafo (Music team). E le lava i se tagata toatasi ona faia lea galuega. E manaomia uma lava i latou e i ai latou tomā faale-musika ina ia sologa lelei ai mea uma o le tapuaiga.
4. O asafo e talanoa ma faasoa po o a pese e tatau ona ao ina ia pepese uma ai tagata o le ekalesia.
5. Ia faataatia lelei se fuafuaga po o se polokalame, ia ofi mai ai agaga o tagata i le tapuaiga i pesepesega.
6. Ia laututu uma i luga ma pepese, aua nei toe nonofo. Tasi lea mea e faaletonu ai siufofoga o tagata EFKS.
7. O le tagata e pese i le Atua, ia tu i luga ma pese. E sa'o ai foi le leo e sau i fafo – faiga lea e fa'aaoga e le Metotisi.

Aotelega a le Taitai:

1. I totonu o le tusi Paia e le o faasaina ituaiga musika o fa'aaogaina
2. E taua le Congregational Praises

3. Ia pepese uma tagata o le ekalesia.

4. Pese mai le loto ma le agaga

Aso Sa: 18 Aperila 2021

Mataupu: E LEAI SE ISI E TU FAAMAUGA I LENEI OLAGA

O upu ua fai ma manatu autu, e masani ona faamatala ai se tagata e faamaualuga i ona lava manatu. E vaai maualalo i isi tagata. O ana faatinoga ma lafoga, e le maua ai se filemu. Aua ua manatu lava, o ia ua sili i tagata uma.

Peitai, e i ai lava le aso e vaivai ai ma moomia le fesoasoani. O le uiga ia o upu: E leai se isi e tu faamauga – tumau i sona malosi ma sona atamai.

Fesoasoani mo le taitai

O nisi ia o tala ua filifilia mo le tatou mataupu:

1. Farao –O Farao o le tupu o Aikupito sa ta’uta’ua i le loto faamaualuga ma le faasausili. O Farao lenai, o lo o i ai i le tele o tusitusiga, o le isi lea atua o Aikupito. O le ala faafaigata lea ona faamatuu e Farao o Isaraelu, ona o lona manatu, o ia foi o le isi atua e tutusa ma le Atua Soifua. Peitai, na tupu loa le mala lona 10, na fasiotia ai ulumatua uma a Aikupito, aofia ai ma lona atalii matua, o iina na a’oa’oina ai Farao, i le malosi o le Atua o Isaraelu. Ua iloa ai e Farao, e leai lava se isi e tu faamauga, e iu lava i le vaivai.

2. Koliata – *1 Samuelu 17* - O le toa o Filisitia. O le tagata maualuga ma malosi. O le ala lea o le faifai i le Atua o Isaraelu, i lona manatu, ua leai lava se isi e tutusa ma ia. Peitai, na saunia e le Alii Tavita, tino itiiti ma faatauvaa e faatoilalo lona malosi.

3. Pule o le tausamaaga – o le Pule o le tausamaaga e gafa ma le tele o tiute ina ia sologa lelei le faamoemoe e potopoto ai tagata. E pei o tatou Samoa, i taimi o faaiipoipoga, o aso fanau, etc... O le tala faatatauina, o le vavega na tupu i Kana i Kalilaia ina ua uma le uaina o le faaiipoipoga. Ua fesiligia tiute o le pule o le tausamaaga ona o le uaina ua uma. O le upu lea ‘pule’ o le *steward* i le faaperetania. O lona uiga, o le tagata lea ua tuu i ai le faamoemoe ina ia vaai lelei o mea totino, ma isi mea i

totonu o se faalapotopotoga. O ai lava e filifilia, e tataua ona lava le experience i galuega faapenei. Peitai, o lea ua valetuulima ona tiute, ona o le faatamala. Ua semanu Iesu na maua ai le uaina lelei mo tagata uma. Na o Iesu e atoatoa ai o tatou faiva ma tiute.

4. Naamanu ma vaiatafe o lona nuu –2 *Tupu 5*. O le tala’aga ia Naamanu o le alii e pule i ‘au a le tupu o Suria po o Arama foi i le itu matu o Isaraelu (north of Israel). O le toa malosi ta’uta’ua, ae na maua i le ma’i o le lepela. Ina ua oo i le fale a Elisaia le perofeta e faamalolo ai o ia, na faatonu ai o ia e tofua faafitu i le vaiatafe o Ioritana. O le fesili a Naamanu le Suria, o lo o atagia ai lona faamaualuga i vaiatafe i Suria, ma manatu faatauvaa i le vaiatafe o Ioritana. Fai mai, “...e le sili ea ona lelei Apana, ma Farapa, o vaiatafe ia o Tamaseko, i vai uma o Isaraelu? Ou te le taele ai ea, ma ou mama ai?” Ua manatu faatauvaa le tupu i vaiatafe o Ioritana e manuia ai, peitai, o Ioritana na ala mai ai aao faamalolo o le Atua mo ia.

5. O Apimeleko – *Faamasino 9* - o le atalii o Kitiona mai se tasi o ana auauna fafine. E 70 atalii a Kitiona na fanaua lava e ia, e ese ai ma Apimeleko. Ua alu Apimeleko i Sekema i le aiga uma lava o le tama a lona tinā, ma faatauanau i latou ia fai o ia ma tupu ae fasioti le toafitugafulu o atalii moi a Kitiona. A faitau i ai i le tala ato i le mataupu e 9, e lei iu lelei le nofoaiga a Apimeleko, ona o lona faasausili ina ua faatauanau lava e ia tagata e fai o ia ma tupu. Ae o le tala a Kitiona na fai ia Isaraelu ao soifua (*Faamasino 8:23*) fai mai, “...ou te le pule ia te outou, e le pule foi lo’u atalii ia te outou; e pule le Alii ia te outou”. O le mea na faia e Apimeleko, ua ia fao le nofoaiga a le Atua ia Isaraelu. Ua ia aumaia le pale paia a le Atua, e faapale ai o ia. Na oo lava ina pale o ia, i le pale o le oti.

O nisi ia o tala o lo o faamatala ai taitai ma tupu, ua faasili lo latou malosi ma mea ua maua ae galo ai le Atua. O le mataupu o lenai aso, ua a’oa’oina ai i tatou, e leai a se isi e tu faamauga. E le tumau se tagata i sona malosi ma sona iloa, e iu lava i le vaivai ma moomia se fesoasoani.

Faatinoga mo le mataupu

1.O le a le uiga o le manatu autu: E leai se isi e tu faamauga.

2. Fesili i le autalavou po o a ni faataitaiga i totonu o le sosaiete o lo o atagia ai le tu faamauga o tagata? Faataitaiga, totonu o le aoga, aiga, ekalesia, malo, etc...

3. Pe faapefea ona fesoasoani i tagata e maua i le loto faamaualuga ma le faasausili?

Aotelega a le taitai:

1. O le natura lava o le tagata o le sese. Aua le manatu faapito ma faamaualuga i au galuega e fai.

2. Ia e iloa ona mata'u i le Atua. O le amataga lena o le potu

3. Ia faataua leo o tagata i totonu o le sosaiete. Ia soalaupule faatasi

Aso Sa: 25 Aperila 2021

Mataupu: O LE PULE I LE OLA – “E LĒ O SE FOFO O FAAFITAULI!”

O le tasi lenei o mataupu e tatau lava ona faia pea i tausaga uma. O se mataupu e faatupu manatu i lagona o le Tupulaga Talavou ina ia faasoa o latou faafitauli ae aua le nofoa'i, aua o le nofoa'i e saga tupu ai le popole ma oo ai i le pule i le ola.

Fesoasoani mo le taitai:

Aisea e mafua ai le pule o le ola?

O nisi o mafuaaga e aofia ai:

1. faigāuō ua feeseesea'i ma foliga o le a faauma.
2. ita ua otegia atu e le tama/tina.
3. ua lē talia e matua se manao o lo o faananau i ai le loto.
4. musu i le tauvalea ma le maasiasi/maua le ova.
5. ua le maua se isi tali, ma ua sili ai le oti.
6. ua le lavā onosa'i i amioga a le toalua po o le uō.
7. ita a'o ōnā

(faaopoopo i ai nisi mafuaaga e faailoa mai e le Autalavou)

O mafuaaga ua taua i luga, e mafai ona vaevaeina i ni vaega se lua:

1. O faafitauli e foia i se taimi umi.
2. O faafitauli e le mafai ona foia i se taimi vave

O faafitauli e foia i se taimi umi:

❖ E i ai faafitauli e mafai ona saili se tali i se taimi umi: *faataitaiga*: o faigāuō ma sauaga i totonu o aiga. O faafitauli nei, e talitonu le tatou mataupu e le faatasi ona tupu i se taimi. O faafitauli e tupu so'o. O le mafuaaga foi lea o le o'o o le mafaufau i le pule i le ola, ona ua manatu o le tali sa'o lea o le faafitauli, e sili ai le oti. Peitai, e le o se fofo lena o faafitauli.

❖ E fautuaina le vave faasoa o le faafitauli i se tagata e maua ai se fofo, ae le o le nofoa'i.

O ai e tatau ona faasoa i ai ou faafitauli? E tatau ona faasoa i le faifeau, o ou matua, o lou uso/tuafafine/tuagane po o se isi lava e te talitonuina e mafai ona fesoasoani mai ia te oe.

O faafitauli e lē mafai ona foia i se taimi vave:

❖ E i ai faafitauli e tutupu ma lē mafai ona faasoa atu i se taimi vave. *faataitaiga*: musu i le ta'uvalea ma le maasiasi ona ua maua se mea leaga ua fai. O le fesili faatupu manatu: *o le a se fofo o lenei faafitauli?*

❖ E taua le toe mafaufau i aafiaga o lau gaoiga o le a fai:

- mafaufau i lau fanau ma lou toalua
- o lau galuega ma tofiga o loo i ai
- mafaufau i le mafatia o ou matua ma lou aiga pe afai e te oti.
- (ma isi lava mafuaaga)

E lua ni tali ua manatu le tatou mataupu e ono foia ai lenei faafitauli;

1. O le ita, e lē o se mea e faafuase'i ona tupu ae i le loto. A o se lagona faaletagata e faatuputupulaia i totonu o le loto, ona o se finauga po o se faeseeseaiga o lo o aafia ai. O le fautuaga, ia vave alu ese mai le faafitauli. Aua le tuua se avanoa e te finau ai i le faafitauli, ina nei lē mafai ona tatali lou ita. O la le tusi: *“o le tali filemu e liliueseina ai le ita, ao le upu faatiga e tupu ai le ita”*- Faataoto 15:1

2. O le to'amalie i le loto pe a tutupu ni faafitauli, o se meaalofa mai le Atua mo le tagata e mafuta atu ia te Ia i le tatalo. O lona uiga, e taua le ola mafuta i le Alii i taimi. Aua a tutupu faafitauli, e maua manatu ma lagona. Ma e mautinoa foi le lagonaina o le musumusuga

a le Agaga Paia ina ia faasaoloto lou loto ma mafai ai ona tali atu i lē ua ita mai.

O le siosiomaga ma le ola saoloto o le tagata soifua.

E le itiiti le taua o le siosiomaga o lo o ola ai le tagata i aso uma. I le talitonuga, o le siosiomaga o lo o fausia ma tapue ai le ola faaletino, faalemafaufau ma faaleagaga. A lelei le siosiomaga e mautinoa foi le lelei maloloina o le tino, mafaufau ma le agaga.

O le faamanatu a le mataupu, ia tagatagai ane i le lotoifale o aiga, nuu, fale faigaluega, aoga, aulotu ma isi lava faalapopotoga pe le o i ai ni faiga le amaiotonu e ono tutupu ai ni feseeseaiga ma iu ai i le pule i le ola.

Pule i le ola ona ua otegia atu e matua:

E i ai fanau ua pule i le ola ona o le otegia atu e matua ona o se mea o loo naunau lona loto e fai ae ua le talia. O isi fanau e otegia ona o amioga ae mulimuli ane ua pule ai i le ola. E manatu le mataupu, **e lē o se faaiuga lelei lea mo soo se tamaititi i le va veagai o matua ma fanau.** E fautuaina ai fanau, ina usiusitai i matua. Aua le faamasinoina le galuega a matua o lo o faia. O le tali e avatu e matua, o le tali sa’o lena e tatau ona usitaia. O so o se matua alofa e ‘ote ma faatonu le fanau, ina ia lelei. E tele tusi o le Tusi Paia o lo o faamatala ai le taua o le galuega a’oa’o atu a matua i fanau. O le tiute o fanau o le faalogo ma usita’i.

Faitau le tusi o Faataoto.

–O le tulafono e 5: *Ia e ava i lou tama ma lou tina, ina ia faalevaleva ai ou aso i le nuu a foaiina mai e le Alii lou Atua ia te oe.* **Esoto 20:12:**

Faatinoga mo le mataupu: Taliga Fesili

1. Aisea e mafua ai le pule i le ola.
2. O ai e tatau ona faasoa i ai ou faafitauli?
3. O ai e pule i le ola – Atua po o le tagata?
4. O i ai se aafiaga o le Ola Faaleagaga i le faapogai o le Pule i le Ola?

Aotelega a le taitai:

1. Aua nei taofia se mea o lo o mamafa i lou loto. Ia faasoa
2. Aua nei goto le la o e ita
3. Aua le soona faia fanau ona ua leai se tupe.
4. **NA O LE ATUA** e pule i le ola o le tagata

Aso Sa: 2 Me 2021

**Mataupu: UA OGE LE GATAIFALE O KALILAIA –
Luka 5:4-11**

O le tele o le galuega folafola a Iesu, o lo o taua ai le nuu o Kalilaia, aemaise o le vai, e pei ona fa’aaogaina ai vaa fagota e folafola mai ai lona finagalo ao faalogologo le motu o tagata.

Peitai, o le molimau a Luka, e i ai le aso ua tigaina ai Simona ma le au fai faiva e fagogota i le vai o Kalilaia, ua matua leai lava se i’a po o se fagota na maua ai. **O le fesili aisea – ua oge ai le gataifale o Kalilaia?**

Fesoasoani mo le Taitai:

I le gasologa o le olaga o aso uma, e i ai lava mafuaaga e ‘asa ai le faiva o tautai o le gataifale:

- ua leaga mea fagota
- ua leaga le tau
- tapa tautali le tapuaiga
- le lava le malosi o le tagata fagota
- ua faaleagaina le gataifale i lapisi ma vailaau oona (ma nisi mafuaaga)

E mafai ona fesootea mafuaaga ia i le ‘asa o le faiva o Peteru ma tagata fagogota o Kalilaia. E pei ona tautino Peteru: ua alu le po o tigaina, e leai ma se i’a o maua. E foliga i le tala Peteru, e le’i faatasi pe faalua ona lafo le upega i le vai. E le taumate foi ua soo atoa le vai o Kalilaia o fagogota ai, peitai, ua matua leai lava ma se i’a. O foliga manino ia, ua oge le gataifale o Kalilaia. Ua matua leai lava se i’a o toe maua ai. A o tala faamauiina, o le vai o Kalilaia, o le vai tuloto e tele i’a e maua ai. O le vai e tafe mai ai Ioritana i le tasi pitovai, ae toe tafe ese i le isi pitovai. O le vai e masani ona fagogota ai tagata nofo latalata ane i le vai: Kenesareta, Tiperia, Kalilaia. Ua igoa, o le vai o Kinereta, - Numera 34:11. O le mafuaaga lea o le eseese o igoa o le vai i isi tusitusiga ona o nuu o lo o latalata ane i le vai. A o le tautinoga a Peteru, ua matua leai, leai lava se i’a.

O lo o fesiligia i manatu o nisi o le au suesue le sa’o o lenei faaupuga a Peteru, aua o Peteru foi o le tagata fai faiva.

Peitai, o le faaiuga o upu a Peteru, o lo o faapea ai: *ae ona o lau fetalaiga, o le a ou tuu ifo ai le upega i le loloto.*

O upu ia ua iloa ai le faatuatua o Peteru ia Iesu. Ua gata lona iloa faafaiva o le vai o Kalilaia, ae ua usita'i ia Iesu i lana fetalaiga. O le molimau a le Tusi Paia, na tali gogoto va'a i le tele o le i'a. Ua le gata o le va'a o Peteru, ae ua lolofi ane foi isi fai faiva ua tusa'e le tele o le i'a.

A'oa'oga mai le Tala:

1. Aua le fiu gofie ma ia lava onosa'i. E lei augatā Peteru e tali le manao o Iesu ina ia faaaoga lona vaa mo lana galuega folafola ao faalogologo atu tagata i le pa'u mātū. Semanu e le maua ia faamanuiaga pe ana teena le manao o le Alii pe musu foi ona ua alu le po o fagogota e leai ni i'a e maua.

2. Ia faatuatua i le Atua. O le faatuatua o Peteru na ia maua ia i'a e tele. Fai mai ana upu, ua alu le po o tigaina e leai ni i'a, ae ona o lau fetalaiga, o le a tuutuu ai le upega i le loloto. Ua gata le malosi o Peteru, ae ua faaatoatoa e le mana o Iesu.

3. Faalogo ma Usitai ia Iesu e maua ai faamanuiaga e tele. Mai le 'asa o le faiva i le po atoaga mai i le tele o i'a i sina taimi itiiti na usitai ai, o se matua vavega tele lava. O le faamanuiaga o le tagata faalogo ma usitai i le Atua, e fiu e tufi tufao faamanuiaga. Ua tali gogoto vaa, ma ua tali masaesae o latou upega.

4. O le Atua e faatumuina le gaogao o le tagata. O le oge ma le mativa o le gataifale o Kalilaia, e mafai ona faatusa i ai lo tatou gaogao ma le mativa faaleagaga. Ae afai tatou te faamoemoe i le Alii e faatumu mai i tatou, tatou te tutumu i lona Agaga e faavavau.

Faatinoga o le Mataupu:

1. Faitau le tala ua filifilia ma faasoa pe aisea ua 'asa ai le faiva o Peteru. Mafaufau i nei aso ma mafuaaga e 'asa ai o tatou faiva.

2. Ia faasoa po o a ni aoaoga e maua i le tala ia Simona ma le upega i le loloto.

Aotelega mo le Taitai:

O le Atua na te faatumu lo tatou gaogaoina ma le le iloa o se mea. Pau le tatou tali ia fai e pei ona faia e Peteru: *a ona o lau fetalaiga, ou te tuu ifo ai le upega i le loloto.* E lei toe manatu Peteru i sona iloa faa fai faiva o Kalilaia, ae ua faatuatua ma faamoemoe ia Iesu, lea ua tele ai i'a o le faiva. O so tatou faatauvaa, e tupu le malosi ma maua le iloa ona o Iesu. Ua le toe oge le vai o Kalilaia, ona o le Mana o Iesu.

Aso Sa: 9 Me 2021

Mataupu: O ULUA'I AVEFEAU O LE TALA LELEI - O TINA - Luka: 24: 1 - 12.

O le Aso Sa o Tinā, o se aso e manatua ma toe faamanatu ai le sao taua o tina i so o se faalapotopotoga; o aiga, nuu, fale faigaluega, aoga, Ekalesia ma so o se mea lava.

E le itiiti foi le sao o Tinā i le Tala Lelei e pei ona iloa i tala o le Tusi Paia. O le mataupu filifilia o lenei aso, o le toe faamanatu i a i tatou uma: **O uluai avefeau o le Tala Lelei o Tinā.**

Fesoasoani mo le Mataupu.

O le tasi lenei o mataupu o lo o vavao ai le toatele ona o lo o fetosoina faapa'u tolo a loi i manatu o nisi o le au su'esu'e o le Tusi Paia, ona e talia gata i nisi le tulaga i le avefa ai o nei tina na mua'i o'o i le tuugamau ma le fa'aaliga na latou iloa e uiga ia Iesu, ua toetu mai nai e ua oti; o ulua'i avefeau o le Tala Lelei. Aemaise lava ona o le tele o tala o le Tusi Paia, o lo o matilatila ai le pulea e le gagana faa-alii o le sosaiete o lo o soifua ai tagata. O le isi tulaga, o le aganuu faa- Iutaia e le faatauaia ai le tulaga o fafine ma tamaiti; ae tu matila ai le tulaga o alii ma tama i lea vaiata.

E i ai le manatu o le a le aga'i se manatu i le eseese o molimau a le au faievagelia e uiga i le tala o le toetu mai o Iesu nai e ua oti. O le a tulituliloa lava le molimau a Luka, e pei ona faamauiina i le mataupu 24: 1 - 12.

O lenei tala ua fai ma tala faa-faagogo i taliga o le au kerisiano, aua o tausaga uma lava tatou te manatunatu ai i le faaolataga na faia e Iesu mo le lalolagi. E mafai foi ona tatou faapea o se tala faasolopito ia Palesitina

ma tagata Iutaia. Ae i ai le manatu, e le mafai ona tuua ai i lalo le taua o Iesu ma le faaolataga na Ia saunia. Peita'i, atonu ua tatou masani ai foi; ona o le tulaga i le faamanatu i tausaga uma. O se vaaiga ua fai ma tulaga e la'aloa ai le tatou vaai i le taua foi o nei tinā ma le latou galuega sa faatino; aemaise lava i le tulaga faa-avefeau. O latou fofoga ma o latou siufofoga na mua'i faaleoina ai le toetu mai o Iesu, e pei ona faailoa mai i le upu, "*faamatala*." (Luka 24: 9-10.) I le fuaiupu e 9, o lo o molimau; o i latou lava ia na toe foi mai i le tuugamau na latou toe faamatala mea uma na faailoa ane e agelu ia i latou i le tuugamau i le toasefulu ma le toatasi o le auso'o ma i latou uma na iai.

O Tinā e toatolu - o Maria le Makatala ma Ioana, o lo o faamauina i le mataupu e 8:2, o i laua ia sa iai faatasi ma fafine mama'i a o i ai Iesu i lana galuega tala'i. O Maria le Makatala na tulia ese e Iesu agaga leaga po o temoni e toafitu mai ia te ia. A o Ioana, o le ava a Kusa le auuuna pule a Herota le tupu. Ia ma Maria le tinā o Iakopo.

Fuaiupu muamua - o loo faamatalaina ai tapenaga na tapena ai nei tinā ina ia asi ai le tuugamau. O mea manogi e pei ona taua, o lo o faamatalaina o u'u manogi. O le tasi lenei o tu ma aga masani i Palesitina, ina ia u'u ai le tino maliu pe a po lua i le tuugamau. O se gaioga e faatino ai le galuega alofa mulimuli a tinā mo i latou ua maliliu.

O se gaioga ua talafeauga ma le feau na auina mai ai agelu e faailoa atu i tina nei ina ia logoina le ausoo. O le Tala Lelei i le toetu mai o Iesu Keriso, ma o le Tala Lelei foi lea latou te tala'i atu e tusa ma lo latou valaauina faa-aposetolo.

E i ai le taofi e i ai le eseese i le tu ma le aga masani i tina nei ma le latou galuega faatino i le taeao segisege, ma le faiteu ua masani ai i tatou i taimi o maliu. E talitonu le lagona, ona o le tu ma le aga faa-le-Tala Lelei e pei ona ao ai Samoa; lea ua faatino ai lea tiute e le itupa o tinā. Ua o gatasi ai ma le lagona o le galuega mulimuli lea i toe saafiafiga e au alofa ai i le ua maliu ma lona aiga.

Auso'o - e le o manino mai i le tala a Luka pe aisea na le asia ai e le auso'o le tuugamau, ae asi e tina. Peita'i, a tatou vaavaai i tu ma aga faa-

Iutaia i ia ona po, ma le siosiomaga na soifua ai nei tagata i na vaitau, ona taatia mai lea o se vaaiga manino i lea tulaga.

O le asi o le tuugamau, o lo o faamauina i tala tuu faa-Iutaia, o galuega ia e feagai ma patino lava i tina. A tuu foi i le siosiomaga o lea vaitau, o loo faamalumu le pule saua a Roma, ma o le faasalaga faa-Roma lea na faasalaina ai Iesu. O lona uiga, e fai o lo latou tausi i tu ma aga faa-Iutaia, a o le fefefe foi ia Roma ma ana puleaga; nei o latou oti ai. O le ata manino lea o lo latou faapotopoto faatasi ina ua latou fefefe; aua na faafiti Peteru na te le iloa lea tagata, ina ne'i iloa ona latou nofo sala lea i le faasalaga lava lea e tasi e pei ona faia i le Alii Faaola.

Faatinoga o le Mataupu.

Ia faitau le tusi faitau faatatauina mo le mataupu, ona tuu lea o le avanoa mo le autalavou e faasoa mai ai o latou manatu ma lagona faatatau i fesili ua taua i lalo.

O le a le taua o le asi o le tuugamau i mea manogi i le vaai faa-Iutaia?

E iai se fesootaiga o le asi o le tuugamau e tina o le tusi faitau ma le faiteu ua masani ai tatou (pale ma le teu) i taimi o maliu?

Aisea na le asia ai e ona so'o le tuugamau ae asi e tina?

O le fefefe po o se isi tulaga?

Aotelega a le Taitai.

1. Ia tautalatala i le Tala Lelei ia Iesu Keriso ae le o nisi tala e le maua ai se filemu.

2. Aua le fefe e faailoa le tala moni ona o le manatu e maua ai se lanu i nisi tagata.

3. E sili le alofa i mea uma.

Aso Sa: 16 Me 2021

FONO TELE MALUA

Aso Sa: 23 Me 2021

Mataupu: MULIMULI I LOU FETU – Mataio 2:7-15

O ai lou fetu? O lou tamā po o lou tinā? O le faifeau po o se isi tagata ua e manatu e te faata'ita'i i ai? A sa'o le fetu e te mulimuli i ai, ua e maua foi manuia o le Atua. Ae a sese, ona taumate lea o lona taunuuga.

Fesoasoani mo le Taitai:

Mataio 2: 7-15

O le tala i le malaga a le au makoi na taitaiina e le fetu ua pupula mai sasa'e. O le upu makoi o lo o faaliluina – *wise men* – o lo o faamatalaina o tagata atamamai i le faauigaina o vaaiga eseese o le vanimonimo ma lo latou sootaga i le siosiomaga o aso uma.

O le fesili faatupu manatu: *Faamata e le o i ai se isi malos i tua atu o loo unaia le au makoi e mulimuli i le fetu ua latou iloa?* – tuu le avanoa i le Autalavou. - **Tali: Agaga o le Atua**

E faapefea ona iloa le **Agaga o le Atua** i le mulimuli ai o le au makoi i le fetu ua latou iloa?

- ❖ O le fanau mai o Iesu, o se galuega na amata mea ai le Agaga o le Atua. Mai lava i le valoaga ia Maria ma Iosefa, seia oo mai lava i le malaga a le au makoi, o mea uma ia o lo o taitai ai le Agaga o le Atua.
- ❖ O Herota o le tupu o le nuu i le vaitau lea na fanau ai Iesu, ao le fuaiupu e 7-8, o lo o manino ai, e le o iloa e Herota le fanau mai o Iesu. O Herota foi na fai lana faatonuga i le au makoi, a maua le nofoaga o fanau ai Iesu, ina toe foi mai se'i alu atu e ifo ma avatu sana meaalofo. O le Agaga o le Atua, na faali i le au makoi e aua nei toe foi ia Herota.
- ❖ O makoi o tagata atamamai, sa mulimuli foi ma le loto fiafia i le fetu. O lo o manino lava i le tala, e le'i faalotolotolua le au makoi e ulufale i le fale o manu e saili le tupu o tagata Iutaia, e ui o lea ua iloa, o le fale ua faasino mai e le fetu, o le fale o manu. E i ai le talitonuga, sa tatau lava ona i ai se faalotolotolua po o se fesili, po o sa'o le faasinoga a le fetu ua latou iloa, peitai, e leai, na ulufale ma le fiafia ua ofoina a latou meaalofo taugata ma le anagata.

A o le fesili: ana o tatou i lenei vaitau, faamata tatou te talia le fanau mai o Iesu, le Faaola o le Lalolagi i se fale o manu? Faamata tatou te mulimuli pea i le fetu pe leai?

E tatau lava ona i ai le tuu fesili, peitai, o fua manino ia o le mulimuli ma le faatuatua i le fetu ua iloa. Tusa lava pe fale o manu pe fale mataga i le vaai, e talitonu pea i le fetu ua fai ma faasino ala.

O le isi lea faafitauli o nei aso, tatou te mulimuli lava i le fetu i taimi o le lelei, ae oo mai loa faigata, ona vave a lea ona tatou tau mamao mai le fetu.

Tala ia Simona Peteru ma lona Fetu

Mataio 26:69-75, Mareko 14: 66-72, Luka 22: 54-62, Ioane 18:25-27

O Simona Peteru le so'o na muai valaauina e Iesu e fai ma so'o. O loo molimau foi Tusi Paia, o le mafutaga a Iesu ma Simona o se mafutaga e mafanafana tele. O mea uma foi e finagalo le Alii e faailoa i lona au so'o, e tatau lava ona i ai ma Peteru. Peitai, na iloga le teena e Simona o lona fetu ina ua oo i puapuaga. "Ou te le iloa lena tagata" Ua faagalo ma teena le fetu sa fai ma taiala i le ola, ona o le fefe i puapuaga.

Ae a tatou le Tupulaga talavou. E le o i ai ni lagona musuā po o ni lagona faasausili i matua ona o le poto ma le tamaoga ua maua? Afai o i ai, ia tiai loa ma salamo. Ae afai e leai, ia faauau ai pea lena lelei.

Galuega 2 – o lo o faamauina ai le toe tulai mai o Simona e faauau lona mulimuli i lona Fetu ina ua maua le faauuga a le Agaga Paia o le Atua e pei ona auina ifo i le Aso o le Penetekoso.

O lenei soifuaga, e i ai lava vaivaiga faaletagata e le atoatoa ai ona tatou mulimuli i faamanuiaga ua tatou tulimata'i o lenei olaga.

O ai foi ua tatou filifili e fai ma fetu taiala i lo tatou ola valaauina, o le mea mautinoa e leai a se isi e atoatoa. Ua na o Iesu le FETU SILI tatou te mulimuli i ai.

O le mau tauave a le Autalavou, IA OLA IA KERISO, o le fetu lena e fai ma taiala i le tatou savaliga faalefaatuatua o lo o faia nei.

Faatinoga o le Mataupu:

1. O ai lou fetu ua e filifili e te mulimuli ai?
2. O a ni mafuaaga ua e filifili e fai lenei tagata ma ou fetu?

3. Faamata e te tumau pea i lou alofa i le fetu ua e filifilia pe a oo mai faigata o lenei olaga?

Nisi o fetu filifilia mo le talanoaga: faifeau, tama, tina, uso, tuafafine, matai o le nuu, taitai o le malo, toalua/paaga ma so o se isi.

Aotelega a le Taitai:

Ua tele fetu ua fepulafi mai i le ala, ae taua le sa’o o le fetu e te filifili i ai. O Iesu le FETU SILI TATOU MULIMULI UMA I AI.

Aso Sa: 30 Me 2021

Mataupu: O IESU MA LE ALAFU TAUMATAU, OFU TINO MA LE MAILA E TASI - Mataio 5: 39-41

O le amataga o le mataupu e 5, o lo o manino ai le tulaga mafatia o loo i ai nisi o tagata o le sosaiete. f.3-f.11, o le lauga faa-amuia a le Alii, ua fai ma fuaalau faate’a tiga i loto mafatia ona o sauaga o lo o faia faasaga i tagata le taualoa.

O lo o manino i le lauga a Iesu, o lona finagalo e faamamā le avega ma taumafai e tafiese faiga faaituau o loo faia e tagata taualoa.

O fuaiupu ua filifilia mo le tatou mataupu, o lo o talanoa ai Iesu i nisi o faatinoga o lo o aliali ai nisi o faatinoga o lo o taotaomia ai tagata vaivai o le sosaiete.

Fesoasoani mo le taitai:

Fetalai Iesu, *Aua nei o outou tetee atu i le leaga, ai se po mai i lou alafau taumatau, ia e liliu atu ia te ia le isi.*

E lē faigofie ona faatino le ‘po’ – *strike – open handed slap* - o le alafau taumatau, ona o mafuaaga nei:

(i) Afai o le alafau taumatau e tatau ona po, o lona uiga e tatau ona faaoga le lima agavale. Peitai, o le lima agavale i tu ma aga faa-Iutaia, na o galuega lava ua taua o - *galuega lē māmā (unclean tasks)* e fa’aaoga ai le lima agavale.

O lona uiga, e faailoga fesili le po o le itu taumatau e faaoga ai le lima agavale. pei ona saunoa Iesu.

(ii) O lo o taua e Iesu le po – *open handed slap* i le itu taumatau, peitai, e mafai foi ona fa’aaoga le *tu’i - closed fist*, e fa’ao’o ai se manua i le

auauna/pologa/toalua, po so o se isi le taualoa. Peitai, o le taimi lava foi lea, e fa’aaoga ai le tu’i, o le taimi foi lea ua tulaga tutusa ai i laua,-tagata o lo o faia le sauaga ma lē o lo o sauaina. Ua tulaga tutusa ai le matai ma lana pologa po o le auauna o lo o sauaina. E le gata e tulaga tutusa i aia tatau faale-tagata soifua, ae faapea foi ma isi vaega o le soifuaga e aofia ai: fanua, suafa, vaega o le tamaoiga ma isi.

O lona uiga, e faailoga fesili foi le faia o lea gaioga e le matai/ pule/ po o se tagata taualoa agai i le tagata le taualoa. O le finagalo o Iesu, e leai se matai e manatu e tulaga tutusa ma sana pologa. O lona uiga, e ao lava ona toe mafaufau muamua, ao lei faia se gaoioiga.

(iii) Na pau lava le gaoioiga lea e avanoa mai mo le ‘matai’ o le faaoga loa o le tualima - *back-handed strike* i lona lima taumatau. O le fa’aaogaina o le tualima, o se tasi lea vaega ogaoga o le sauaina o so’o se tagata na atagia i lea foi vaitau. O le faamoemoe e le gata ina ia fa’amanu’alia ai le isi tagata, ae ia matua faalumaina ai foi le isi uso-a-tuaoi.

I le finagalo o Iesu, e faigata ona faatino lea gaioga o le po o le itu taumatau. Afai foi e tupu, o se matua fiafiaga tele lea i le tagata ua sauaina, aua o le a tulaga tutusa ai ma le ua faia le sauaga ia te ia.

O lo o i ai le isi talitonuga, o le liliu o le isi itu i le tagata pe afai e po mai lou itu taumatau, e le o le liliu mai ia toe po, ae o le faamoemoe, ia e alu ese. O lou liliu ese, o lou savali ese, ua e talia le po ia te oe, ae ua e manatu e faamagalo ma savali ese.

f. 40. O le fia fai se faamasinoga e ma oe e ave lou ofu tino, ia e tuu atu foi i ai ma lou ofu tele.

O ofu tino po’o ofu tele i le tu faa Iutaia e mafai ma *tuu faafaatau po’o se faamau* - *pledge* – Esoto 22: 26-27 mo se nōnōgatupe. O tagata matitiva ma vaivai le tamaoiga, o i latou ia latou te faia lea amio o le ‘ave o ofu tino e fai ma faamau o se nonogatupe mai se tagata mauoa. A oo ina faaletonu le totogiina o le aitalafu, ona molitu lea e le tagata mauoa le tagata mativa i le faamasinoga, ina ia faatulafono ai le fa’aaoga o le ofu tino sa fai ma faamau – *pledge* e totogi ai le aitalafu. Fai mai Iesu: *a fai se faamasinoga e ave lou ofu tino, ia e tuua atu i ai ma lou ofu tele.*

O le faailoga, o le mativa, ua toe lava o le ofu o lo o pipii i le pa'u, a o le tagata mauoa, o lo o tele ana 'oa, ao lea lava ua tulituliaupu lenei aitalafu e le mativa ai.

O le isi talitonuga faa lutaia, o le tutulai telenoa o le tagata mativa i luma o se faamasinoga, o se matua maasiasi lea mo le tagata na faia le moliaga. E le faalumaina la le tagata mativa, ae o le a faalumaina le tagata mau'oa ma tagata o loo molimau i le faamasinoga ona o nei vaaiga lē alofa ua latou faia.

E le faapea ua faasa e Iesu ona toe totogi le aitalafu, ae tatau ona faamuamua le vaai alofa i le tagata mativa i loo tupe

f. 41 – Ai se na te tauanau mai lua te o ma ia i le maila e tasi ina o ia oulua ma ia i maila e lua.

O pulega a fitafita Roma mo pagota latou te ave faatagata o taua, e aofia ai le faamalosi/faatauana o le pagota e amo ato o aupega mo le maila e tasi. Afai e ova atu maila e savalia e le pagota ma le tasi, o lona uiga o le a faasala le fitafita e lona taitai pe afai e molimauina ia faiga.

O la Iesu, afai e faamalosi ane oe e te lua o i le maila e tasi, ia e onosai ma faamalosi. Afai e taunuu i le maila e tasi, ia e faailoa i le fitafita o lo o lava lou malosi mo se isi maila e finagalo i ai. Ao le mea ua mautinoa, e le mafai e le fitafita ona faia o lea tulaga. Pau le feau ua momoli atu i le fitafita, o lo o lava le malosi o le tagata pologa.

E le o i ai se finagalo o Iesu, ia faalumaina le tagata taualoa po o le matai i faatinoga o loo ia faia. Ae o loo tulimatai e Iesu, le loto alofa ia vave ona lagona e le tagata mauoa/taualoa ma ia fai ai loa se suiga o le va nonofo ma lona uso mativa, tagata pologa ma le tagata le taualoa. Ia maua le fealofani i tagata uma o le sosaiete.

Faatinoga o le Mataupu:

Tuu le avanoa le faasoaa ai le Autalavou i le uiga o fuaiupu ua faatatauina mo le Mataupu. Fesili po o se a se faauigaina o ia fuaiupu sa faalogo muamua i ai.

Aotelega a le Taitai:

Ia tausi le filemu ma onosai i puapuaga. E sau le taimi e maua ai lou faaeaina ona o sauaga o lo o feagai ma tatou. E tele faigata o lenei olaga

ua tatou fetaiiai. A o le faamalosi lea a Iesu, ia onosai ma faia mea uma i le amiotonu. E fesoasoani mai foi le Alii ma faamalosi mai i tatou.

Aso Sa: 6 Iuni 2021.

Mataupu: PAU LAVA O LE FOA'I A LE ALII - Sa'o pe Sese - Finauga (Debate)

O le tasi lenei o fuaitau o lo o lagonaina pea i le tele o faalavelave fai i totonu o le atunuu. O upu e faaiu ai ni felafolafoaiga i taimi o faaaloaloga: "*Pau lava o le foa'i a le Alii aua lenei aso ma le faamoemoe.*"

O mataupu o lenei aso o le faasoaa e ala i le finauga –debate: Po o se fuaitau e sa'o lenei fuaitau pe leai foi.

Fesoasoani mo le Taitai:

ITU LAGOLAGO - E mafai ona sa'o le faaupuga ona o mafuaaga nei:

1. O aiga e vaivai le tamaoaiga: A tutupu ni faalavelave i o tatou aiga, e iloga lava paolo e lima vaivai, e iloa foi le paolo e lava le tamaoaiga. Afai e fai atu e le paolo lima vaivai ia upu: *Pau lava o le foai a le Alii*, e talia gofie aua e sa'o ma faamaoni o mea lava ua gata ai le mafai. Peitai, a fai e se aiga e lava le tamaoaiga, ona mautinoa lea, ua le sa'o. Ua fai ma 'alofaga o le fai aiga leaga.

2. Mativa ona o mea e tutupu i le olaga – conditional poverty: E lua ituaiga mativa o lo o i ai i le lalolagi lenei: o le mativa ona mea e tutupu – *conditional poverty*, ma le mativa e tuufaasolo i augatupulaga – *generational poverty*. O le conditional poverty – e aofia ai faama'i (Misela/Koviti 19 ma isi), natural disasters – matagi, lologa, Tsunami ma isi, mea e tutupu i le olaga – (social, cultural, everyday issues). O faafitauli eseese nei ua tutupu ua mafua ai ona faaletonu alagatupe (income) a tagata peitai, e i ai le taimi e toe lelei ai ona toe foi lea i le mea sa i ai muamua. O itu ia e mafai ai ona sa'o ia upu. O le aiga sa tamaoaiga, ae ua aafia mea uma ona o le matagi po o ni lologa, o le mafuaaga lena ua faaletonu ai le faasoaa.

3. Tele isi faalavelave: E mafai ona lua i le tolu faalavelave e tutupu i le taimi e tasi. O faalavelave faaleaiga, o mea fai a le Lotu, o le tausiga o le aiga, ma mea fai a le fanau, o mea uma ia e mafai ona aafia ai le faasoa, ona sa'o lea o le upu: Pau lava o le foai a le Alii!

4. Ua oge tagata aiga: O isi aiga e tele fanua e maua ai le tamaoaiga, peitai, ua leai ni tagata o aiga e fa'aaogaina le laueleele.

ITU TETE'E – Leai e le sa'o ia upu ona o mafuaaga nei:

1. E lē faakerisiano ia upu: “Pau lava o le foai a le Alii” – o upu o lo o tuuai'a ai le Atua i mea ua maua. E peiseai na o le pau ia o mea na sau le Atua ma foai mai i o latou lima. Peitai, o loo manino lava i le Tusi Paia – ma molimau foi lenei olaga, o lo o tele auala o faamanuiaga mo tagata o le lalolagi.

2. O upu fe'alo'alofa'i: O upu ua fai ma 'alofaga o le ola paie ma le fai aiga leaga. O mea lava ua maua, o mea na. E leai se agaga e saili se isi mea e sili atu le lelei e ofoina ai le fesoasoani mo isi tagata ua mafatia. E pei ona taua i luga, e sa'o pe a fai o se aiga lima vaivai, peitai o nei aso, ua matauina, ua tausolomua i ē lava le tamaoaiga ona manatu mamā i faalavelave faaleaiga. I le talitonuga, o faalavelave e alu ai tupe, ae galo ai mafutaga ma aiga e faavavau.

3. O lo o tele manuia o le Atua, ae ua vaivai le saili a le tagata: O lo o molimauina i nei aso, le tele o fanua e le o galueina. E i ai foi isi o lo o i ai taleni eseese pei o le 'oti ulu, kuka, tusiata, pese ma isi lava taleni tatou te le o fa'aaogaina tatau e maua ai nisi tupe e fesoasoani i le aiga.

Mataio 25:14-30, Luka 19:11-27 - O le faataoto a Iesu i e na tuuina atu i ai taleni e lima ma taleni e lua. Na laua matua punoua'i e galulue ina ia maua ai se faasiliga. Ua ia te i tatou taleni eseese na foaiina e le Atua mo i tatou. O lo tatou tiute lea, o le galueina o nei taleni ina ia maua ai se faasiliga ae sili ona viia ai le Atua i lo tatou ola galulue mo le mea sili. O lē na i ai le taleni e tasi, ua ia eli le lua ma natia ai ae faasili le paie. Na iu i le aveesea o mea sa ia te ia ma tuli i fafo.

Mataio 7:7-8 – o lo o fetalai manino Iesu, ina ia ole atu, ona foaiina mai lea, ia saili ona maua lea, ia tu'itu'i ona toina mai lea ia te outou – o le fetalaiga lea a le Alii i uiga i le ola saili o le tagata ia te Ia. O le sailiga e le faatasi pe faalua ona faia, ae ia matua saili ma le faatuatua.

Mataio 6: 25-34 – Fetalai manino Iesu, e le sili le alofa o le Atua i manu ma laau o le vao i lo o se tagata soifua o le palealii o lana foafoaga. O a'oa'oga nei a Iesu, o lo o faamamafa ai le muai saili o le malo o le Atua i lo o se isi lava mea o le lalolagi. Aua a maua le Atua, ua maua foi isi mea uma. Ae tatau ona iloa e le tagata, e sili atu le alofa o le Atua ia te ia. O lona uiga, o a mea ua moomia ma mamafa i le mafaufau, saili i le Atua e ala i le tatalo. E faasino ma faafaigofie e le Atua so o se aula mo oe le tagata faatuatua pe afai e faamaoni lou loto e faamomoe ai i lona alofa mai. Fetalai Iesu: “Aua le popole”. Ia tatou faatuatua i lona alofa mai tatou te ola ai.

Faatinoga o le Mataupu:

1. Ia vaevae le Aupalavou i vaega e lua:

- ❖ Itu Lagolago - E sa'o – ua pau lava o le foai a le Alii
- ❖ Itu Tete'e - Leai, e le sa'o ia upu, o lo o tele pea le foai a le Alii

Aotelega mo le Taitai:

1. Saili ma le faatuatua i le Atua ona faateleina lea o tamaoaiga i ou lima.
2. E na o le pau lea o le foai a le Atua, a o le faafitauli, ua vaivai la tatou saili.
3. Aua le faia ia upu ma upu e natia ai le fai aiga leaga ma le paie.
4. Aua le tuuai'a le Atua i lou augatā e te galue.

Aso Sa: 13 Iuni 2021.

Mataupu: “E LEAI SE MEA OU TE MATIVA AI” - Salamo 23

O le Salamo na tusia e Tavita, o lo o faamauiina ai lona faatuatua i le Leoleoga Malu a le Atua ia te ia ma lona nuu o Isaraelu. Mai le tele o faigata na ui mai ai le olaga talavou o Tavita, o lana lea tautinoga: E leai se mea e mativa ai lona olaga ona o le Atua o lo o leoleo mai.

Fesoasoani mo le Taitai:

Faamatala le upu *mativa* i le olaga o aso uma:

- ❖ leai se tupe i le taga
- ❖ le lava meaai, le lava le faasoa

- ❖ leai se fiafia, leai se saolotoga
- ❖ mativa i mafauauga, vaivai ma le iloa se mea

O nisi ia o faaupuga e mafai ona faamatala ai le upu – mativa i le soifuaga lenei. Ao le tautinoga a Tavita e pei ona fai ma autu: **“E leai se mea ou te mativa ai”**

E faapefea ona faafesootai le manatu autu ma le gasologa o le soifuaga lenei tatou te ola ai?

Salamo e 23:

O lo o i ai lava le talitonuga, o le Salamo 23 o lo o faamauina ai le agaga faafetai po o se viiga mai ia Tavita mo le Atua, ona o le tele o faafitauli na oo i ai lona olaga, peitai, o lo o sologa lelei pea ma maua le filemu mai le Atua.

O lo o manatu nisi, o le Salamo 23, o lo o faatatau i le faasaoina o le ola o Tavita mai le mataitaita o Saulo, na tulituli solo ai o ia i le vao ma tauau a oti ai. O le saogalemu ua ia maua, e mai le leoleoga malu a le Alii le Leoleo mamoe sili.

f.1. *“O le Alii o lo’u leoleo mamoe o ia; e leai se mea ou te mativa ai”.* Ua faatusa e Tavita le mafutaga a le tagata faatuatua ma le Atua, i le mamoe ma lona va feagai ai ma le leoleo mamoe. Ua gagana le mamoe i le lelei ma le malu puipuia o lona ola ona o le tausiga a le Leoleo mamoe.

f.2 E leai se taimi e tuulafoaiina ai e le leoleo mamoe, lana lafu mamoe mai lana leoleoga ma lana vaaiga. E tuu atoatoa foi lona malosia i le sailiina o eleele lafu lemu, o lo o maua ai le vao lelei ma ni vaipuna po o ni vaieli foi, e tata’i agai i ai le lafu mo le fafagaina ma le faainuina. O le vao mu’a ou te taoto ai? O le vao mu’a o le vao fou e fiafia i ai mamoe, a o lea e fai mai le fai Salamo, e taoto ai. O lona uiga o le ata vaaia o le tausiga ma le puipuia a le Atua i lana tagata, e saogalemu le tagata talitonu i aao agalelei o le Atua. E saili lava e le Atua le vao mu’a e tu’u ai lana tagata, o le mea e manuia ai ae le o le mea e fano ai.

f.3 Na te taitaiina foi lana fanau i ala o le amiotonu, o le ala lelei, o le ala tatau ma le ala sa’o...o lona uiga e le tuulafoaiina e le Atua a o tauivi e fai lona finagalo. E na te faafoisia mai i lo’u Agaga; pe a o’o ina vaivai

le loto o le leoleo mamoe. Fai mai e maluluina i le po, i le tau leoleoina o lana lafu mamoe, o taimi na e tau lagona ai le i’uleo o le faavaivai ma le fiu. A o taimi na e faafoisia ai e le Atua le agaga o le leoleo mamoe e faamalosi ‘au pea i taimi o le faavaivai.

f.4 O le Atua foi e malu ai lona ola, pe a oo i savaliga o faigata i le tele o taimi. O faigata e oo lava i le oti. Fai mai a o’o ina alu le savaliga a le leoleo mamoe ma lana lafu mamoe, fai mai e a’e i mauga ifo i vanu; e fetaia’i ma manu feai o le vao, o le molimau a le fai Salamo e le fefe lava i se mea leaga. Aua foi ua mautinoa lava le faatasi mai lava o le Atua ia te ia.

O le laau ma le to’oto’o e faatatau lava i le tootoo e tasi o le leoleo mamoe, e faasaoina ai le ola o mamoe. E fai ma auupega e tutuli ai manu feai, ma fai foi ma to’oto’o e taitai saogalemu ai mamoe. O le faalagolago o le leoleo mamoe i lona tootoo, mo le taitaiina ma le laveaiina o mamoe, ua faapea ona fai ai ma faailoga ole saogalemu. O le mautinoa o le ola ua faasaoina ma saogalemu, o se lagona faamalieina ma faamafanafanaina o le loto ma le agaga.

O le mafanafana o le Atua auai, i mafatiaga o lana fanau faatuatua i ituaso pogisa o le ola. Ua na o le Atua lava e mafai ona savavali ma lana fanau i le vanu o le ata o le oti. O le savali i le vanu o le ata o le oti, o le isi ona uiga e faatatau i le faiga malaga a tagata i le atu Palesitina e i ai ona vaega maupu’epu’e, e a’e i luga ifo i lalo pe a oo ina savavali tagata malaga, fai mai e lafoia lona ata i le la ona pei ai lea o le pogisa lona ataata mai. Lea e fai mai ai le fai salamo, o le Atua auai e le popole lava i se mea e tasi, e le fefe aua foi o loo faamoemoe i le Atua.

f.5 O le saunia foi e le Atua o le la’oai mo lana fanau faatuatua, ao siomia e o latou fili, o se vaaiga sili lea ona faamalie loto. O le aganuu a Sasae tutotonu, a valaauina e se tasi se uo la te mafuta ma avea ma ana malo, e faauuina i le suauu e fai ma faailoga o lona saogalemu i taimi uma o le mafutaga. O le suauu e fonofono ai manu’a o loto ua mafatia. O le mautinoa o le filemu o le Atua i totonu lava o faigata o le ola. O le faauuina lava lea i le suauu o le alofa tunoa e malu ai i aao o le Alii, e leai se leaga e mafai ona afaina ai.

O le isi vaaiga i le faauuina i le suauu, o le suauu ua faauuina ai le tupu. O se lagona fiafia ma le faagaetia pe a oo ina faauuina se tasi e fai ma tupu. E faapena se vaai agai i le mafutaga a le tagata ma le Atua pe a o’o ina tumau i le Atua, e fusia i le fiafia ae siva le olioli; mulimuli ane ua taumasuasua le ipu i faamanuiaga sasaa mai a le Atua. A o’o ina taumasuasua le ipu, ua tumu, ua masa’a mai i fafo; e faapena manuia e faapaleina ai le tagata; o manuia e fiu le tagata e tufi taufao ina ua pipi’i le loto i le Atua.

f.6 O le uiga lea o le nofo i le fale o le Alii. E tumu i le tamaoaiga e taumasuasua lau ipu i taimi uma, e tausia foi i le agalelei ma le alofa i aso uma lava e le aunoa. O le agaga atoa lea o Tavita, ina ia manino Isaraelu uma ma tagata uma i le alofa faa-leoleo-mamoe o le Atua, e le gata ia te ia, a o i latou uma e faatuatuta i le Atua.

Faatinoga o le Mataupu:

Faitau le Salamo ma faasoa i le uiga o fuaiupu taitasi.

Aotelega a le Taitai:

I le vaaiga o le tulaga faa leoleo mamoe o le Atua, i lo laua va nonofo ai ma Tavita e tusa o le faamatalaga e pei ona taua i le Salamo e 23, e faapena foi i le vaaiga i le Feagaiga Fou le tusi o Ioane e 10: 11 – 18. I le afio mai o Iesu Keriso o lea foi ua fetalai manino le Alii o Iesu, o ia lava o le leoleo mamoe lelei, e tuuina atu lona ola mo mamoe. O le malosi lea ma le mana e mafai ai pea ona feagai le tagata mafatia, ona o le mativa ma faigata uma e oo lava i le oti, ae tulai pea ma molimau, e leai se mea ou te mativa ai. Aua foi ua talitonu i le Atua alofa na te aumai le ola ma le manuia i totonu lava o mafatiaga mo lana fanau faatuatua. O le alofa faa-leoleo mamoe lea o le Atua ua molimauina e Ioane i le soifua o Iesu Keriso, lea ua tautino lava ia, o Ia o le leoleo mamoe lelei. O le faaogaina e Iesu o le ata o le leoleo mamoe e faataua ia te Ia lava, ua siitia ai ma le tulaga e malamalamia ai le uiga faaleoleo mamoe o le Atua.

O le leoleo mamoe ua ofoina atu lona lava soifua atoatoa mo le faaolataga o mamoe. O se laasaga maua lava lea o le galuega tele faa-leoleo-mamoe, ua le gata i le ta’ita’i, fafaga ma puipui mamoe, a o lea ua ofoina atu le ola e faaolaina ai mamoe. O le uiga loloto foi lea o

le mataupu - “e leai se mea ou te mativa ai.” O le ola atoatoa i le tino, mafaufau ma le agaga, ua faaolaina ona o Iesu le Leoleo Mamoe Sili.

Aso Sa: 20 Iuni 2021.

Mataupu: E LĒ O LE AGAGA O LENEI LALOLAGI A O LE AGAGA O LE ATUA – 1 Korinito 2: 1 – 13.

O le mau tauave a le au kerisiano i le malosiaga e faalagolago i ai i so o se taimi; o le Agaga o le Atua e taunuu malosi ai mea uma. O lona uiga, o mea uma tatou te faia, e faamoemoe lava i le Agaga o le Atua. O le agaga o lenei lalolagi o lo o talanoa i ai le tatou mataupu: o manatu faaletagata ae le o le finagalo o le Atua.

Fesoasoani mo le Taitai.

O le Ekalesia i Korinito, na faatuina e le Aposetolo o Paulo i lana malaga misionare lona lua. O se tasi o aai na ogatotonu i ai fefaatauaiga a Asia itiiti, fa’aaogaina ai lona uafu tele o lo o i ai. O fefaatauaiga i le aai o Korinito na fai ma avanoa o le ofi atu o le tele o tapuaiga eseese ona o tagata eseese mai isi atunuu ua aumai i totonu o le malo. O se tulaga na fai ma popolega i le Aposetolo o Paulo, ona o le talitonuga faaKerisiano ua pispisia i le tele o nei talaiga eseese.

Faafitauli na feagai ma le Ekalesia - 1 Korinito 1: 10 – 17, o loo manino ai le faafitauli o lo o tupu i totonu o le Ekalesia i Korinito: Ua manatu tagata i le poto o upu a Paulo, Apolo ma Kefa (o Peteru lava lea), ma avea ma auala e fevaevae’i ai; ona ua tuu le feau i le Tala Lelei ia Iesu Keriso ae ua viivii e le tagata lava ia le poto o e tala’i e fiafia i ai. Ua mitamita tagata i le poto o le tagata ae ua le mitamita ona o le Tala Lelei i le alofa tunoa o le Atua e ala ia Iesu Keriso.

1 Korinito 2: 1 – 13.

f.1 –f. 5 – o lo o tautala Paulo i le amataga o lana galuega i le Ekalesia. E le’i faalagolago i se poto faaletagata, ae na faamoemoe i le faasinoga a le Agaga Paia ma le mana o le Atua. O le ala lea o lona vaivai aua na manatu i lona faatauvaa, o lona mata’u ma lona gatete, o lo o ia te ia le fefe paia nei sese se upu e gagana atu ai e uiga i le Tala Lelei ia Iesu Keriso.

f.6 – f.8 – o le faiva faa-Aposetolo, o le galuega tautala aua e tautau ma faailoa atu le Tala Lelei i le faaolataga na faia e Iesu Keriso. O le uiga lea o upu a Paulo o i latou e **“tautala atu”** o loo i le fuaiupu e 6, 7. Peitai e gagana i le poto o e ua a’oa’oina i le Tala Lelei; po o e ua faatuatua ma talitonu ia Iesu Keriso. O le malamalama na pupula mai le Atua i le amataga, mai lava i le foafoaga ma faasolo mai ai ia Isaraelu ma perofeta seia taunuu mai i lona atoaga ia Iesu Keriso. O le poto mai le Atua ae le o le poto o le lalolagi e saili ai i le tamaoaiga ma le pule ina ia tauleleia ai i le vaaiga a tagata ma maua ai sona lava viiga.

f.9 –f. 13 – o le mataupu silisili i le eseese o mea e galue ai le Agaga o le Atua mo le tagata ma le agaga o le lalolagi po o le tagata lava ia. O mea e faailoa mai i le amio a le tagata e tusa ma lona talitonuga; o i tonu lea e mafai ona iloa ai le eseese o mea e faailoa e le Agaga o le Atua ma le agaga o le lalolagi. O le upu a Paulo, o mea sa natia i le tagata e lei vaaia e mata ma lagona e taliga, na o i latou o e alolofa i le Atua ua latou maua. O le fesili; o a ia mea sa natia? O le alofa silisili ese o le Atua ma lana faamasinoga amiotonu sa le iloa e le tagata a ua faailoa e le Agaga Paia ona o le faaolataga na saunia e Iesu Keriso.

O le agaga atoa o lenei faitauga ma upu a Paulo, o le Agaga o le Atua na te musumusuina i tatou i mea lilo o lona malo ma tatou maua ai ana faamanuiaga e tele. Na te faailoa mai le finagalo o le Atua ma taitaiina i tatou i ala o le amiotonu. Peitai o le agaga o lenei lalolagi, na te taitaiina i tatou i mea inosia e tupu ai le agasala ma tatou sii ai le ta i le Atua ma lona finagalo.

Faatinoga o le mataupu.

O le mataupu o lenei aso, o le a faasoa ai le autalavou i le tusi faitau ma lona fesootaiga i le autu. Faaali manatu i ni vaaiga faigofie e iloa ai le agaga o lenei lalolagi ma le Agaga o le Atua, aemaise o le upu lea ua masani ai i tatou, "O le musumusuga lava lea a le Agaga ia i tatou."

Aotelega a le Taitai.

O le mafutaga a le tagata ma le Agaga Paia po o le Agaga o le Atua, e tataua ona mausali ma mauaa ona o le fesoasoani sili lea mai le Atua. E taitaiina i tatou e le Agaga o le Atua i mea lelei ma le manuia atali.

O mea e vaaia e mata ma tuinanau ai le loto o le tagata i lenei lalolagi, o mea ia tatou te maua ona o le agaga o lenei lalolagi ma o mea inosia i luma o le silafaga a le Atua.

Aso Sa: 27 Iuni 2021

Mataupu: O LE FAITOTOA UA VALIINA – Esoto 12:22

Esoto 12: 22 *“Tou te ave foi se fusi isopo, ma fufui i le toto ua i le ipu, ma ta a’i le laau faalava i luga ma pou e lua o le faitotoa i le toto i le ipu; aua foi nei ai so outou e ulufafu atu i le faitotoa o lona fale seia oo i le taeao.”*

Fesoasoani mo le Taitai:

fusi isopo – isopo – fugalaau manogi –fusi isopo – fugalaau manogi ua fusufusi faatasi (bundle of hyssop) ae fa’aaoga e vali ‘ai faitotoa. O lo o i ai le talitonuga, o fusi isopo foi na ala usu ma tina i le tuugamau e asi Iesu. O le isopo e sasala lona manogi. Ua faaaoga e vali ‘ai faitotoa e faaitiitia ai le manogi o le toto.

O le fa’atonuga lea a le Atua ia Mose e fa’ailoa atu ia Isaraelu ina ia latou ave i toto o tama’i mamoe, ma valiina ai luga o pou e lua o le faitoto’a ma ona la’au fa’alava i luga o latou fale. O se fa’ailoga e iloa ai e le agelu aiga o Isaraelu, pe a o’o mai lona to’asa i le nuu o Aikupito. A vali le faitoto’a, e sopoloa le agelu pe fa’apea foi ua ola lona aiga. Aua a le valiina o le a o’o i ai le oti i le ulumatua.

O le faitoto’a ua valiina o lo’o atagia mai ai ni feau o lo’o i tua atu o lona fa’aaogaina.

1. O le ola! Ua fa’asaoina mai i le to’asa o le Atua ona ua usita’i e fa’atino le finagalo o le Atua. Aisea? ona e fia ola pea. O le ola e maua pe a savavali i poloaiga a le Atua. Lea e afua ai le mata’itusi lona lima o le Alphabet Eperu o le h(he) o lona uiga o le ola. Lea foi e atagia mai ile tusiga o le mata’itusi le ata o le faitoto’a ma ona pou fa’atutu e lua ma le la’au fa’alava i le pito i luga.

2. O le taulaga! O le valiina o pou o faitoto’a o le fa’ailoga o le ola faitaulaga o tagata e ui ina aumau i nu’u ese. Aua afai o mamoe lava e

osi ai taulaga, lea foi ua avea le toto e valiina ai faitoto'a o se auala e fa'ailoa atu ai le taulaga o le taliaina o le finagalo o le Atua.

3. O le tofotofoga! O le faitoto'a ua valiina ua fai ma auala a le Atua e toe tofotofoina ai lona nu'u po o tumau pea lo latou fa'atuatua ia te ia. O le isi foi auala lea na taumafai ai le Alii e fa'ailoa ia Farao ma Isaraelu lona Silisili Ese ina ia fa'amausali atili ai la latou feagaiga osi ma lona nuu.

4. O le fa'aolataga! O le faitoto'a ua valiina o le fa'ailoga o le fa'aolataga mo Isaraelu ina ua mae'a le mala mulimuli ma malie ai Farao e fa'asaoloto mai latou.

5. O le toto o le tama'i mamoe! O le feau taua i le vaega lenei o le fa'aaogaina o le toto o le tama'i mamoe, o le faailoga o le ola. Aua ana le valiina le faitoto'a i le toto e le mafai ona fa'asaoina Isaraelu mai le mala.

Faitoto'a ua Valiina ma le Faitotoa Vaapiapi

Ua manino atu i le folasaga i luga le uiga o le faitoto'a ua valiina. O le fa'ailoga o le Ola. Aua a le valiina le faitoto'a, e le fa'asaoina mai i le to'asa o le Atua.

Ae fa'apefea ona feso'ota'i ma le faitoto'a vaapiapi lea e fetalai ai Iesu?

Luka 13: 24 ***“Ia outou finafinau ina ia ulu atu i le faitotoa vaapiapi; aua ou te fai atu ia te outou, e to'atele latou te taumafai atu e ulu atu, ae le mafai lava.”***

O tala fa'a-fa'ataoto nei a Iesu o lo'o fa'atatau i le taliaina e tagata o le malo o le Atua aua o le taliaina lava lea o Ia. Lea lava e fa'apupula mai e Iesu e le mafai ona sao atu i le malo o le Atua pe a le ui mai i le faitoto'a vaapiapi. **O le a lea faitotoa vaapiapi? O Iesu.**

O Iesu ua fa'atusaina i le faitoto'a e va iti ma e faigata ona ulufale ai se tasi. O lana galuega fa'aola na afio mai ai i le lalolagi na fa'afitia, amusia ma teena e le to'atele o tagata. Sa faigata ona taliaina le finagalo o le Atua na tau ala mai ia Iesu ao ala ia e tataua ona savalia e le tagata ina ia sao ai i le malo o le Atua. E faigata la ona sao atu se tasi i le malo lea pe a le ui muamua i le faitotoa vaapiapi! O le olaina o ala na a'oa'o mai ai Iesu ia i tatou.

O le faitoto'a vaapiapi e fa'atauva'a i le vaai ma lona uiga ae o le faitoto'a e faigata fo'i ona ui ai se tasi. A o i latou ua taliaina ma faia le finagalo o le Atua e pei ona a'oa'o mai e Iesu, o le a faigofie ona ulu atu i lea faitoto'a vaapiapi ma sao atu ai i le malo o le Atua o lo'o tausinio uma ai tatou. O le faitoto'a vaapiapi o le ala i le ola faavavau.

O le faitoto'a ua valiina ma le faitoto'a vaapiapi o faitoto'a e le faigofie ona asaina e se tasi. O faitoto'a e mana'omia le galueaina o le loto o le tagata ina ia faigofie ona ia taliaina le finagalo o le Atua. E mafai foi ona avea le loto ma faitoto'a ua valiina po o le faitotoa vaapiapi.

O le loto ua tetee ma le loto ua naunau e faia le finagalo o le Atua. Aua a le tatalaina le faitoto'a o lou loto e te taliaina ai ala e uia ai nei faitotoa, e le mafai ona tatou maua le Ola! O le faitoto'a ua valiina o le fa'ailoga o le ola mo Isaraelu ina ua fa'aolaina mai pulega sau'a a Aikupito, a o le faitoto'a vaapiapi o le fa'ailoga o le ola mo tagata uma o le lalolagi. E le fa'apito na o Isaraelu ae mo tagata uma, e aofia ai ma tagata o nu'u ese.

Faatinoga o le Mataupu:

1. Faasoa i le taua o faitotoa i nei aso. O faitotoa i taimi o 'olo/tower, na o le pau lea o le auala i fafo ma totonu i le nuu. E leai lava se isi auala, na o le tasi lava.

2. O le a se malamalama o le Autalavou i le taua o le faitotoa ua valiina e tusa o le tala faamauiina i le Esoto 12:22.

Aotelega a le Taitai:

O le taliaina o le finagalo o le Atua e pei ona fa'ailoaina i le faitoto'a ua valiina o le fa'aolataga sili lena, e fa'apena foi i le faitoto'a vaapiapi lea e fa'asino ia Iesu. A lea na fetalai manino ***“O a'u nei o le faitoto'a; afai e ui mai se tasi ia te a'u, e fa'aolaina ia, e alu atu ma ulufale, e maua foi e ia le mea e ai.” (Ioane 10:9)***

O lona uiga o Iesu Keriso o ia lava o le ala i le malo o le Atua, o ia o le faitoto'a ua tatala mai mo i tatou pe afai ua tatou talia o Ia i le loto ma le fa'atuatua. Aua o le ui atu i lena faitoto'a e faapaleina i manuia o Keriso, aua o Ia o le ki ma le tatala i lena faitoto'a. Faimai e maua e ia le mea e ai, o le a lea meaai? O le ola faaleagaga, pe afai ua talia le faitoto'a.

O le toto o le tama'i mamoe na valiina ai faitoto'a o Isaraelu o le fa'ailoga o le fa'aolataga mo le nu'u o le Atua. E faapena foi ia Iesu ina

ua maligi lona toto i luga o le satauro ina ia fa'aola le lalolagi uma ma togiola mo a tatou agasala pe afai tatou te salamo faamaoni. Lea lava ua tatou fa'amanatu i aso fa'amanatuga, "o le ipu lenei o le feagaiga fou lea i lo'u toto, ia outou faia lenei mea ma fa'amanatuga ia te a'u i aso uma tou te feinu ai."

Fetalai le Alii Fa'aola, "**O a'u nei le ala ma le upu moni ma le ola; e le alu atu lava se tasi i le Tama pe a le ui mai ia te a'u**" (Ioane 14:6)

O lona maliu ma lona toe soifua manumalo mai le oti ma le tu'ugamau, lea ua faapaleina ai i tatou i le ala i le faitoto'a vaapiapi e fa'avavau pe afai ua tatou salamo fa'amaoni ma fa'atuatua ia te ia.

Aso Sa: 4 Iulai 2021

Mataupu: E ILOA LE LAAU I ONA FUA – Mataio 7: 15-20

O le siosiomaga ma laau o loo ola ai, e iloa gofie le eseesea o laau i o latou fua. Peitai o le mataupu o lenei aso, o lo o faasino tonu i le tagata ma ona uiga fa'aalia i aso uma. E iloa le tagata a'oa'oina i ana faatinoga. E iloa foi le tagata e le a'oa'oina i upu ma faatinoga e faia.

Fesoasoani mo le taitai:

O le tusi faitau, o se vaega o le lauga a Iesu i luga o le mauga e pei ona amata mai i le mataupu e 6. O le faaiuga o le lauga, lea ua talanoa ai Iesu i le laau ma ona fua e faatusa i ai le tagata amio lelei ma le tagata amio leaga. O lo o manino i le saunoaga a Iesu, e lē mafai e le laau lelei ona fuaina o ni fua leaga, e faapena foi le laau leaga, e lē mafai ona ia fuaina ni fua lelei. E i ai fesili e mafai ona tatou fesiligia ai le saunoaga lenei a le Alii.

1- O ai i latou o lo o faasino i ai laau leaga ma laau lelei i le finagalo o Iesu?

Laa leaga:

O laau leaga latou te fuaina mai le leaga, o lo o faasino i tagata ua teena le finagalo o le Atua. I le siosiomaga o le galuega a Iesu, e toatele lava i latou o lo o tausaili se mea e molia ai Iesu i le tulafono.

O tagata taulamalama, o tagata le alolofa i e vaivai ma e mama'i. O le au tusi upu ma le au faraesai o faiga piopio ma faiga lē amiotonu ua

mafatia ai tagata lautele, ma isi amioga ua faavasegaina i amio leaga i luma o le Atua.

Laa lelei:

A o i latou o ē ua faalogologo ma le faatuatua, o i latou ia ua faasino i ai le laau lelei. O tagata faatuatua latou te olaina le alofa ma faia mea lelei e pei ona finagalo i ai Iesu.

2 – E i ai se avanoa e mafai ai e le laau leaga ona fuaina ni fua e lelei?

O le taaviliga masani o le olaga lenei, e le mafai e se laau leaga ona ia fuaina o ni fua lelei e pei ona fetalai Iesu. Peitai, e mafai pe afai e fai i ai se galuega a le fai faatoaga. Ia lūlū i ai le faalelei eleele. Ia teuteu ma faamatagofie. Ia faasūsū i taimi uma. Afai foi e malosi le la, ia fai se paolo e malu mo le laau ina ia suia mai le leaga i le ola lauusi ma fuaina ni fua e lelei.

O le faamoemoe lea o Iesu i lana galuega folafola na afio mai ai. Ia suia laau leaga e fai ma laau e lelei. Peitai, o le galuega e fuatia i le loto o le laau – tagata faalogologo na te talia ai upu o le ola, ona mautinoa lea ua fua mai i fua e lelei. Ae afai e le loto atu le tagata i upu o le ola ua folafola mai, e mautinoa le faaauau ai pea ona fua mai i fua leaga.

O le iuga o laau leaga ma fua pea i fua leaga, o le liaiina ma lafoina i le afi. E faapena le tagata e faamaaa pea i le finagalo o le Atua, e sau le aso o le faamasinoga, ona liaiina lea ma faasalaina i le afi.

3 – E i ai se avanoa e mafai ai e le laau lelei ona fuaina ni fua e leaga?

E faapea foi i le laau lelei, ua fetalai Iesu, e le mafai e le laau lelei ona ia fuaina ni fua e leaga. Peitai, e i ai le taimi e afu ai le laau lelei ona faasolo lea ina leaga ona fua e fuaina. Ao lea foi le faamalosi a Iesu i le au faatuatua. Ia aua nei muta le faatuatua. Aua o le taimi lava e faagalagalo ai le Atua, o le taimi foi lena e mou ese ai le fua lelei, ae faasolo ina fuaina o fua e leaga.

Faatinoga o le Mataupu:

1- O ai i latou o lo o faasino i ai laau leaga ma laau lelei i le finagalo o Iesu?

2. E i ai se avanoa e mafai ai e le laau leaga ona ia fuaina ni fua e lelei?

3. E i ai se avanoa e mafai ai e le laau lelei ona fuaina ni fua e leaga?

Aotelega mo le Taitai:

E leai lava se tagata e manatu e avea o ia ma laau leaga. Peitai, e mafai ona tatou oo i ai, pe afai e galo i a i tatou le Atua. Po o le a lava lo tatou lelei ma le faatuatua i le Atua, o le ituaso lava e galo ai le Atua, o le taimi foi lea e oo ai i tatou i puapuaga e tele.

O le laau leaga e mafai ona avea ma laau lelei, pe a tumau ma faatuatua i le Alii. E faapena foi i le laau lelei, e tumau pea lona lelei pe afai e faamaoni i le Atua e faavavau.

Aso Sa: 11 Iulai 2021

Mataupu: O ULUAI SO'O O IESU O FAI FAIVA –

Mataio 4: 18-22

O le mataupu o lenei aso, o le a tatou faasoa i ni agavaa faafaifaiva e mafai ona fesootai ma le galuega faaso'o o Iesu.

Fesoasoani mo le Taitai

O nisi o agavaa e mafai ona fesootai ma le galuega faaso'o o Iesu:

1. E le mafai ona fagota ma'i se isi. E tatau ona atoatoa le malosi o le tino, mafaufau ma le agaga o le tagata fagota ona mautinoa lea e tatau ona alu e fai le faiva. E faapena le avea ma so'o o Iesu, e tatau ona atoatoa le malosi i mea uma. E le fai ma'ia le galuega.

2. Ia muai fonofono upega ma tapena ia lelei mea fagota. A lelei le upega ma lelei meafagota, e mautinoa foi le maua o i'a. E faapena le galuega faaso'o o Iesu. E tatau ona tapena lelei mea fagota.

Ia amata mai lava i le lotoifale o le tagata fagota, ia mautinoa o loo tapuaia e lou aiga ou faiva. Aua o faiva e tapuaia, e a'e manuia. E tatau ona lelei le upega ma ofe e fa'aaoga e maua ai i'a e tele.

3. Ia lelei maunu e faaaoga. A lelei maunu ma meafaigaluega, e tele foi i'a. O maunu i le galuega faaso'o e mafai ona faasino i metotia e faaaoga e saili ai agaga o tagata. O le galuega faaso'o o Iesu, o le fai faiva i agaga o tagata. E tatau ona lelei ma sa'o maunu po o metotia e faaaoga ina ia toatele tagata e tosina ma gauai mai loto i le galuega o lo o faia.

4. E tatau i so o se tagata fai faiva ona masani i le gataifale o le a fagota ai. Aua a le iloa ma le malamalama i ia ogasami, e taumate foi le

faiva pe tua ini a. E faapena le galuega faaso'o o Iesu, e tatau ona e confident i lau galuega. E tatau ona maua se masaniga ma tagata lautele, ina ia mafanafana mafutaga e faigofie ai ona talanoa ma faasoa i mea uma aua le galuega ia tauleleia.

5. O le alu e fagota i le sami, e taumate lava le toe fo'i mai. E moni lava ua masani isi tagata, peitai, e le iloa lava mea e tutupu. E faapena le galuega a le Atua, o le so'o ua ofoina le ola mo le galuega, e tatau ona alu ma le loto atoa. Alu ia maua mai ni agaga o tagata, tusa lava pe maumau ai le ola, ae ia faia mea uma ona o le Atua.

6. O le alu e fagota e tatau ona mataalia i le tau: timu ma le la, taimi o le sousou o le sami ia mataalia le tagata fagota. E faapena le Tala Lelei a le Atua, e le sologa lelei pea le galuega. E i ai taimi e sousou ai le sami i manatu o tagata lolotu. E i ai foi taimi e lelei ai. O le mea sili ona taua, o le tagata fagota ia mataalia ma ia manino lana vaai i ala e ono oo mai ai le fili.

7. O le aliti tai o loo i ai le penina – pearl. E seāseā maua e se fai faiva lenei maa taugata mai le sami. Ao le uiga atoa lea o le finagalo o le Atua na tuua ai e Iesu le mamalu ae afio mai, ia tatou iloa ona saili penina tautele o lo o i le sami. O le galuega a Iesu, o le tele ia o penina na maua – agaga o tagata. O le faamoemoe foi lea o le avea ma so'o, a maua se agaga ma liua se loto i lau talaiga faa Tala Lelei, o le viiga lea i le Atua e le aunoa.

O nisi ia o agavaa ua manatu e fai ma fesoasoani o le tatou mataupu. Ae talitonu e tele lava nisi agavaa o le a faailoa ane e le Autalavou.

Faatinoga o le Mataupu:

1. O a ni agavaa o le fai faiva i nei aso e fesootai ma le galuega faaso'o o Iesu?

Aotelega mo le Taitai:

1. Ia tapena o tatou loto e tauave ai le galuega a le Atua

2. O i tatou o so'o filifilia o Iesu i le lalolagi lenei

3. Taumafai ia ola ni agaga i a i tatou ae le o le faasesē o agaga.

Aso Sa: 18 Iulai 2021

Mataupu: “E LĒ O A’U A’O LE ATUA”

O le tasi lea o fuaitau e masani ona gagana ai lo tatou atunuu, aemaise pe a uma se faamoemoe taua na faia. O upu o lo o momoli ai le agaga faafetai i le Atua ona o lona alofa ua mafai ai ona faataunuu mea uma i le lelei atoatoa. O le mataupu o lenei aso, o le toe faamanatu o ia upu taua ina ia aua nei faia ona o le vaaiga a tagata ae ia faia ma le loto atoa i le Atua.

Fesoasoani mo le Taitai:

Kenese 45:1-8:

O le tala i le ituaso na faailoa ai e Iosefa lona tagata i ona lava uso, o ē na latou faatau’ese o ia i tagata Mitiana –Kenese 27:28. Na lagona e le au uso le popole ina nei tau ai e Iosefa le leaga o le latou gaioga sa faia ia te ia. Peitai, na manino lava i upu a Iosefa lona loto faamagalalo. Ua tautino foi Iosefa, o le Atua lava na auina mai o ia i Aikupito: *aua na auina mai a’u e le Atua e muamua ia te outou e fai ma faaola; -f.5.*

O le faamanatu i le Autalavou, ia aua nei tatou fetuu i auala faigata sa tatou ui mai ai. O a foi ni faigata e feagai pea i aso uma, o le faamanatu a Iosefa, ia manatua le Atua. Ia tatalo i le Atua e saunia auala e liua ai ia tiga e fai ma mea suamalie i le ola, pe afai tatou te maua faamanuiaga.

Tanielu 2: 27-28:

E lei galo ia Tanielu le meaalofa ua ia te ia o le faamatala miti, o le meaalofa mai le Atua. Fai mai Tanielu: *Ao i ai le Atua i le lagi, o le na te faaalua mea ua lilo.* Ua tautino lava Tanielu, e le mafai e aitu ma tagata popoto o Papelonua ona faailoa ni miti, ae ua na o le Atua o i le lagi.

O se feau faamanatu, ina aua nei galo le Atua o le na aumaia le potu ma le atamai.

Kenese 8:20-22:

O le taulaga na faia e Noa ina ua ulufafo mai le vaa. O le faailoga o le loto faafetai i le Atua ona ua matutu le eleele mai le lolo. O le taulaga ua faailoa ai e Noa, o le saogalemua ma le ola ua maua ina ua mavae le lolo, e le o sona malosī ma sona atamai na fau ai le vaa, ao le alofa lava o le Atua.

O faatinoga tatou te faia e mafai ona fai ma faailoga o mea o lo o tatou loto i ai. O le taulaga ua faia e Noa ma lana fanau, ua fai ma faailoga o lo tatou talitonu, o le ola ina ua mavae le lolo, e le ona o i latou, a o le Atua i lona alofa mai. Ia fai ni tatou faatinoga e ina ia namu lelei i le faafofoga a le Atua e pei ona faia e Noa ma lana fanau –*f.21.*

Iopu –

Saili ni faaupuga mai le tusi o Iopu o loo iloa ai le faatuatua o Iopu i le Atua e ui o lo o feagai ma le ma’i papala. *f.t. Iopu 1:21*

Faatinoga o le Mataupu:

Tuu le avanoa i le Autalavou e sailiili ma faailoa ni tala o le Tusi Paia, o loo fai ma molimau o ia upu – “E lē o a’u a’o le Atua”.

Aotelega a le Taitai:

O le mataupu o lenei aso, o se toe faamanatu i le soifua tautua ma le ola auauna i le Alii, ina nei galo ia i tatou o lana fanau le Alofa o le Atua. O le Atua o le pogai o mea lelei uma. O a lava faamanuiaga ua maua i tofiga ma le valaauina, ia manatua – “**E le o tatou, a’o le Atua**”

Aso Sa: 25 Iulai 2021

Mataupu: O LE LAU E LĒ TOULU ONA LAU – Salamo 1

E i ai se laau e le toulou ona lau i le olaga lenei? O le tali, e leai se laau. O laau uma e i ai le taimi ma le aso, e mamae ai ona lau ma faasolo ina mate. Peitai, o le tagata e faatuatua i le Atua, o le tagata lena, ua faatusa i ai le laau e le toulou ona lau.

Faatinoga o le Mataupu:

Ia faasoa le Autalavou i le uiga o parakalafa e lua o le Salamo 1:

I. Salamo 1:1-3

II. Salamo 1:4-6

Fesoasoani mo le Ta’ita’i:

O a ni feau faaleagaga e mafai ona tatou maua mai le faitauina o fuaiupu taitasi o le Salamo 1?

f.1 –: “Amuia le tagata e lē savali i le filifiliga a e amio leaga, e lē tu foi i le ala o e agasala, e lē nofo foi i le nofoa o e tauemu”

O le Salamo 1, o lo o faataua ai le sa'o o le filifiliga i le auala tonu e savali ai le tagata soifua. A savali i ala o le Atua e manuia, ao le savali i ala o le fili e iu i le malaia. O le uiga lea o le faa-amuia a le fai-Salamo: *Amuia le tagata e le savali i ala o e amio leaga.....* aua e maua e ia manuia o le Atua.

E tolu galuega faatino o lo o taua i le Salamo: **1. o le savali, 2. o le tu, 3. o le nofo.** O tatou o tagata fai filifiliga. Tatou te *savalivali* solo ma vaavaai ina ia maua se filifiliga tonu e faamalieina ai o tatou loto. E taia loa le vaai i se mea e manaia, ona **tu** lea e vaavaai atili ma toe iloilo itu uma. A faamalieina le loto, ona faatau lea ma ave i le fale, ua fai mo i tatou i aso uma. Ua tatou **nonofo** faatasi ma tausi faapelepele i ai.

I le manatu o le fai-Salamo, amuia i tatou pe afai tatou te le o filifili e savavali i ala o e amio leaga. Amuia i tatou pe afai tatou te le o tosina o tatou loto i le leaga. Amuia foi i tatou pe afai tatou te lē o nonofo ma aumau ma le tiapolo i aso uma.

f.2 - a e naunau o ia i le tulafono a le Alii, e mafaufau foi o ia i lana tulafono i le ao atoa ma le po.

O a tulafono a le Alii? – tulafono e sefulu ma a'oa'oga a le Tusi Paia.

O a tulafono a le tagata soifua? o tulafono a le Alii faatasi ma tulafono o lo o limataitaiina ai lona ola lelei i le soifuaga lenei.

I le manatu o le fai-Salamo, pau lea o le auala e maua ai le faasaoina mai ala a le tiapolo po o le filifili i ala o e amio leaga, o le naunau i tulafono a le Alii faatasi ma le manatunatu ifo i le tagata i tulafono o lo o taitaiina ai lona ia lava ola i aso uma. E taua foi le tausi i tulafono i le olaga lenei, aua o tulafono uma, e mo le lelei o le tagata soifua. O le naunau e aoaoina ma ola i tulafono a le Alii, e maua ai le ola ma le ola e faavavau lava.

f. 3: O ia foi e faapei o laau ua toto i tafatafa ane o vaitafe, e le toulou foi ona lau, e manuia foi mea uma na te faia.

Ua tatou iloa le eseesega o le laau e toto i tafatafa o le vaitafe ma le laau e leai se vai e oo i ai. E faapena le olaga o le tagata faatuatua. O le vaitafe, ua faatusa i Afioga a le Alii ma tulafono a le Alii e fai lea ma vai e faasūsū i le ola o le tagata soifua ona maua lea o faamanuiaga e pei ona taua: **e le toulou ona lau, e manuia foi mea uma na te faia.**

E pei ona taua i le amataga, o le toulou o lau o so o se laau, o le faailoga lea e iloa ai ua faasolo ina mate, po ua uma foi le lelei. E i ai laau e toulou lau ona toe fotu lea i se isi malosi faafouina. Peitai, o le tagata e piipii i le Atua, e leai se taimi e vaivai ai, e malosi faasoloatoa.

f. 4: E le faapea o e amio leaga, a e pei o aputi o saitou i latou ua leleia i le matagi.

E le tumau ni tagata amio leaga, aua e leleia i latou e faapei o aputi o saitou. E tumau pei o le laau e le toulou ona lau. A o le tagata amio leaga, e sau le aso e mamae ai ona lau ma iu ina mate. A o le laau e mate, e liaiina ma lafoai i le afi.

f. 5: e le tutū tagata amio leaga i le famasinoga, e le tutū foi tagata agasala i le faapotopotoga o e amiotonu.

Pe a oo mai le iuga o mea uma, e tutulai lava le tagata ia e tali i ana amioga na faia i lalo nei. O le faamasinoga o loo taua, o lo o faasino i le faamasinoga tonu a le Atua i le iuga o le lalolagi. O le faamasinoga e faaulufale ai le tagata amio lelei i manuia o le Atua. A o e ua amio leaga, e le mafai ona manumalo i lea faamasinoga, aua o i latou lava o tagata amio leaga.

f.6: Aua ua silafia e le Alii le ala o e amiotonu, ae fano lava le ala o e amio leaga.

O le silafaga ati a le Atua, e le sao ai se tagata. O mea uma tatou te faia i lalo nei, e silafia uma e le Atua. O mea uma foi nei e tolaulau i le faamasinoga o e amio lelei ma e ua amio leaga.

Faatinoga o le Mataupu:

Vaevae le Autalavou i vaega e lua:

Talanoa ma faasoa vaega i fuaiupu taitasi o le Salamo 1.

Aotelega mo le Taitai:

O le laau e le toulou ona lau, ua faatusa i ai le tagata e savali i ala o le Alii. O le tagata faatuatua, e le faiaina i se mea e tasi, e maua e ia le manuia mai le Atua. Ia lafoai i ala o le fili ae filifili e savali i ala o le Alii.

Aso Sa: 1 Aokuso 2021

Mataupu: O MAI IA! – Kenese 11:1-9

O le 'olo na fausiaina e tagata ina ia tau lona tumutumu i le lagi, ma lona faamoemoe, ia ta'u ai so latou lelei, peitai, na iu i le faataapeapeina o le lalolagi. O le eseesega o valaau – O mai ia!

Fesoasoani mo le Taitai:

O le 'olo o Papelu /tower of Babel - o lona uiga, o Faaeseeseina. O le faailoga o le taimi ma le ituaso na faaeseeseina ai e le Atua gagana a tagata o le lalolagi, ona o le sese o le faamoemoe na faia ai le 'olo i le amataga.

f.1-f.4: o lo o manino i le uluai fuaiupu o le tala, na tasi le gagana a le lalolagi uma. Peitai o tagata mai sasae na latou faitonu e faia le 'olo e pei ona fausiaina.

O tagata mai sasae /people from the east. Ina ua tuli ese Atamu ma Eva mai le faatoaga i Etena, o le *itu i sasa'e* o le faatoaga na nonofo ai, ae tofia e le Atua kerupi e leoleoina le laau o le ola. E le o i ai se manatu ua faagaloina e le Atua lana tagata na faia i le amataga. A o le uiga lea o le tofia o kerupi e leoleoina le laau talatala, ina ia faamanatu pea ia Atama ma Eva, o lo o i ai lo la'ua avanoa.

Peitai, o le faavae lea o mafaufauga o tagata e uiga i tagata mai sasa'e, o tagata, o tagata ua tulieseina e le Atua. O tagata o loo tausaili mai so latou avanoa i manuia o le Atua o lo o leoleoina e kerupi ma pelu afi.

O tagata na faitonu ina ia faia se 'olo, o tagata mai sasa'e. Fai mai a latou upu: ***O mai ia, ina tatou fai ia o se aai, ma se 'olo, ia oo lona tumutumu i le lagi, ia tatou faia foi se mea e ta'ua ai i tatou, ne'i faataapeapeina i tatou i le fogaeleele uma.***

O le valaau lea a le tagata mai sasa'e, O mai ia, ina tatou faia o se aai/'olo, e ta'ua ai so tatou lelei.

Kenese 1:26, o lo o faamauiina ai le fetalaiga a le Atua i ona peresona e tolu – (Tama, Alo ma le Agaga Paia) ina ia faia o le tagata i lona faatusa paia – *“Ina tatou faia ia o le tagata i lo tatou faatusa, ia foliga ia i tatou; ia ule foi latou i i'a o le sami....”*

E le'i taua e le Atua sona lelei, e afua ai ona faia o le tagata. O le finagalo o le Atua ia foliga le tagata ia te Ia, ma ia tuu i ai le pule e

fa'aaoga ai le siosiomaga ua uma ona tapena lelei. I le faataotoga o le foafoaga paia a le Atua, pau a lea o le vaega o le foafoaga na faia faalua i ai e le Atua Lana galuega – o le tagata. Ina ua uma ona faia o Atamu, fai mai le Tusi Paia, ua silasila atu le Atua, e le o fiafia Atamu na o ia. Ona faamoegase lea ae to a'e lona ivi ua fau ai Eva. O le fai mea lelei ma le fai mea sili o le Atua, na sasaa uma ina ia manuia le tagata soifua.

O le manava ola, o le pule, o le mafaufau lelei na faaigoa ai le foafoaga ma mea uma lava, na faia lava e le Atua mo le tagata soifua.

Peitai, na le usita'i Atamu ma Eva. Ua tuliese ma le faatoaga ina ia a'oa'oina le tagata agasaga, peitai, o lea lava e le o malamalama le mafaufau o le tagata mai sasa'e.

Lea foi ua toe aliali le isi faaletonu, ua fia iloa ma fia tautaua lona igoa, ae tanuma'i le suafa o le Alii.

O le ala lea o le toe fetalai o le Alii: *Omai ia, ina tatou o ifo ia, ma ia tatou faaeseeseina i lea mea a latou gagana, ina ia le lagona e le tasi le gagana a le tasi.* f. 7

O le faaeseeseina o gagana a tagata, o se auala faaleAtua, ina ia taofi le agasala ua faia. O le faailoga o galuega e faia na o le malosi o le tagata.

Le Autalavou, vaai po o fea lena e lilifa i ai la tatou valaau: po o le omai ia a tagata mai sasa'e po o le omai ia a le Atua, e omai e fai se mea lelei.

O le faataua o lenei mataupu, o le omai faatasi e fai se mea lelei e viia ai le Atua, ae aua le omai faatasi e fai se mea e ta'ua ai na o i tatou lava.

Faatinoga o le Mataupu:

1. Faitau le tala ua filifilia ma mafaufau i le eseesega o le valaau a tagata mai sasa'e – **f. 4** ma le valaau a le Atua – **f. 7.**

2. Faitau le Kenese 1:26 po o le a se fesootaiga o le fetalaiga lea a le Atua ma le tala faatatauina o lenei mataupu.

Aotelega Taitai:

O le eseesega o valaau i nei aso, e valaau lava le tagata ia mo sona lelei, ao le valaau a le Atua, e valaau alofa mo tagata uma. O i tatou o le Autalavou a Keriso, e tatau ona faaoao ma faamasani la tatou valaau i le valaau mai o le Atua, e valaau alofa ina ia lelei oe ma ia lelei ai nisi tagata. Omai ia, ia tatou tapuai ma vivii i le Atua.

Aso Sa: 8 Aokuso 2021 (Aso Sa o Tamā)

Mataupu: O TA'ITA'IGA FAATAMĀ

O le Aso Sa lenei o Tamā, e manatua ai pea le sao taua o tama i totonu o aiga, o nuu, Ekalesia ma le atunuu. O le mataupu o lenei aso, o le sailiili i nisi o tamā o oo taua i le Tusi Paia a latou taitaiga faatatamā, e saga aoao mai pea mo taitaiga faatamā i le olaga lenei tatou te i ai.

Fesoasoani mo le Taitai:

O nisi o taitai iloga o le Tusi Paia e aofia ai:

Mose: taitaiga o le nuu o Isaraelu. E tiga lava le muimui ma le faavaivai o le nuu, ae na faamalosi lava e taitai le nuu seia oo ina iloa atu Kanana le nuu folafolaina

Aoauga: Ia maua le onosai ma le faapalepale e fai ma taitai. E le tauilo foi le iloa e Mose o le taunuuga o lana taitaiga, peitai, e le'i suia ai lona onosai e taitai pea le nuu, e ui ua iloa lona iuga – e le taunuu i Kanana. O isi taitaiga i nei aso, e malosī pe a iloa le tauī, ae a iloa e le maua se tauī, ona faatalapelo lea ona faia o le taitaiga.

Farao: taitaiga saua na pologa ai lona nuu o Aikupito. O ana faaiuga ma faatonuga e faamalie lona mana'oga na o ia lava, ae ua afaina ai le nuu atoa.

Aoauga: E fia ni taitaiga faa-Farao o loo faia i nei aso? Talosia e le o i ai ni faiga faa-Farao. O faiga e oo mai ai le malaia ma le pologa i tagata uma ona o le loto maaa. Ae sili ai ona leaga, o le loto maaa i le Atua Soifua. Ua faamanatu ai, ina ia aua nei te'e se taitaiga i le finagalo o le Atua Soifua.

Saulo: e tele tuuaiga i le le usiusita'i o Saulo i le Atua i le taimi o lana taitaiga ao avea ma tupu o Isaraelu. Peitai, na tautino lava Tavita, ma faapea ana upu: *“Afafine o Isaraelu e, ia fetagisi outou ia Saulo, sa na faaofu ia te outou i ie mumu, atoa ma mea faafiafia, na ia teuteua o outou ofu i auro e faamatagofie a'i. Aue ua maliliu toa, ua maumau ai auupega o le taua”* - 2 Samuelu 1:24, 27

O upu valevale alofa ia o Tavita o lo o taoto ai le atoaga o le galuega faataitai na faia e Saulo. O le tagata saili malo mo ona tagata. O ia na ia asaina le gasu o le tai taeao i faigata o le amataga o taitaiga faatupu ia Isaraelu. O le ala lea ua tautino ai Tavita: ua maumau auupega o le taua.

I le talitonuga o Tavita, o le taitaiga na asa mai faigata mo lona nuu. O le oti o Saulo, na oti i le taua. O le faailoga o le tagata finau i lana taitaiga.

Aoauga: E leai lava se taitaiga e 'asa ma se faaletonu. Peitai, o le itu taua, o le tauivi pea ma faigata ona o le manatu ia taunuu i se lelei. O le isi lea mafuaaga o le faaletonu o Saulo, o le naunau i se mea lelei, ae au sopo ai le tuaoi o ona tiute ma ona nafa. E manatu e faapena foi tatou, ao le a'oa'oga ua maua: ia aua le naunau i le i'a ae ia manumanu i le upega. Tavita: o le taitai lelei, ae na iloga lona pa'u maualalo ona ua tosina lana vaai i le lalelei o Patesepa le ava a Uria le sa Heti. Na oo lava ina oti Uria ona o faiga faataitai a Tavita, ao le faamoemoe ia maua Patesepa le tamaitai ua faananau i ai lona loto. A o Tavita foi o se taitai lelei.

Aoauga: E le moe le fili – E ui lava i le lelei o Tavita ma tofiga a le Atua sa ia te ia, peitai, na toilalo lava ona o le fili ma ana faiga. O le faamanatu lea, ia mataala ma ia toaga e tatalo, aua o le taimi lava e galo ai le Atua, o le taimi foi lea e osofaia ai i tatou e le fili.

Iesu: e le taufaamatalaina le taitaiga a Iesu.

A'oa'oga: Ia faalogo ma usitai ia Iesu

Faatinoga o le Mataupu:

Ia tuu le avanoa i le Autalavou e faasoa ai i taitaiga faatama o loo taua i le Tusi Paia.

Aotelega Taitai:

O lau taitaiga faatama e manuia ma malaia ai lou aiga, nuu, Ekalesia ma le Atunuu. A fia manuia a tatou taitaiga, ia faamoemoe i le Atua e le aunoa.

Aso Sa: 15 Aokuso 2021

Mataupu: O LE VALAAUINA O SIMONA PETERU.

E tolu faamaumauga esee se mai le Tusi Paia o loo faamatala ai le valaauiina o Simona Peteru e avea ma so'o o Iesu. Tatou sailiili i nei faamaumauga ma matau ni eseesega o i ai ma se aoga i le valaauiina o Simona Peteru.

Fesoasoani mo le Taitai:

O a ni eseesega o le valaauiina o Simona o lo o tā'ua i tusi faitau?

Mataio 4:18-22 - O le mulimuli a Simona ia Iesu, o le mulimuli a le tagata e le'i vaai pe faalogo muamua i ni a'oa'oga a Iesu. O le ulua'i so'o ua valaau i ai Iesu ina ua mavae le faaosoosoga i le vao. O le valaauina o lo o atagia ai tofiga a le Alii e faia i Lana lava pule faitoatasi. I Lana silafaga ati i le loto o le tagata ua tatau mo Lana feau ma le Tala Lelei. O le avea ma tagata fagota e lē o se galuega e faigofie, e pei foi o isi galuega. A o le galuega e faia ma le lē iloa po o gafea tonu o le ogasami o lo o tele ai i'a. E moomia ai le tagata e lava le onosai ma lava tapena i ana metotia e maua ai i'a. Atonu o itu ia ua afua ai ona filifili e Iesu Simona ma lona uso faatasi ma le fanau a Sepetaio e fai ma so'o mo ia ma le Tala Lelei.

Luka 5:1-11 - O lo o amata le tala i le vavega na faia e Iesu i le auvai i Kenesareta (*o le auvai i Kenesareta o le isi lea igoa o le vai i Kalilaia*) na vaai tino i ai Simona ma isi tagata fai faiva - fanau a Sepetaio. O se itu taua lea o le valaauina o Simona pe a fua i le soifuaga o aso uma: seiloga e vaai tino i se vavega faatoa talitonu. I le vaaiga lautele, e fesootai lelei le tala a Mataio ma le tala Luka: e valaau Iesu o lo o galue Simona faatagata fai faiva o le gataifale. Pau lona eseeseega, o le tala a Mataio, e le'i vaai muamua Simona i se vavega na faia e Iesu. Ao Luka, ua le gātā ua faalogo i a'oa'oga a o lea foi ua vaai tino i le vavega. O Simona o le tautai poto o le gataifale o Kalilaia/Kenesareta. O lo o faaigoa o le taitai o tagata fagogota o le auvai o Kalilaia. O le mafuaaga foi lea o lona finau ane ia Iesu, ua alu le po o fagogota i le ogasami lea e le'i maua ni i'a. Peitai, o lea ua matua lagona lava e Simona lona faatauvaa, ina ua lafo atu le upega ma siomia ai i'a e tele. O le mulimuli a Simona ia Iesu, o le mulimuli a le tagata ua iloa lona faatauvaa i le va fesootai ma Iesu. O lona poto ma lona iloa ua se faatauvaa lea i le silasila a le Atua.

Ioane 1:35-42 – O le tusi o Ioane, o loo faamauiina ai, o Simona na mulimuli ma faalogo i a'oa'oga a Ioane le Papatiso. Peitai, o lea ua mulimuli ia Iesu ina ua ia vaai tino ia Iesu lea na faatatau i ai lauga a Ioane. O le atagia i lenei tala le naunau o le loto o Simona e fia vaai ma fia mulimuli ia Iesu. Ua leva ona faalogo i a'oa'oga a Ioane, ao lea ua ia molimau ma iloa tino Iesu, o le ala lea o le tuua o Ioane le Papatiso ae

mulimuli atu ia Iesu. E le'i valaauina e Iesu Simona e pei o le tala a Mataio ma Luka, ae na mulimuli lava i lona loto malie, ina ua iloa atu Iesu. O le mulimuli a le tagata ua leva na faalogo ae le'i vaai ia Iesu. Lea ua tuua lona matai na auauna muamua i ai, ae ua naunau e fai ma so'o o Iesu. O lo o ta'ua e Ioane le suia e Iesu o le igoa o Simona ia Kēfa – *Cephas* o le igoa faa-Aramaika. Pe a faaliliuina o Peteru- *Peter- Petros* – i le gagana Eleni.

E uiga tutusa igoa nei: *Kēfa ma Peteru* – o le maa/papa/rock. Rock here is a feminine noun – which means the rock can grow. O le silasila a Iesu i le faatuatua ma le mulimuli mai o Simona, o se faatuatua o le a tupu pea ma liua ai nisi tagata e avea ma tagata faatuatua mo le Tala Lelei.

Faatinoga o le Mataupu: Fetufaaiga

1. E tolu tusi faitau ua filifilia o loo ta'ua ai le valaauina o Peteru e avea ma so'o o Iesu –

a – Mataio 4:18-20, e – Luka 5:1-11, i – Ioane 1:35-42.

2. Faitau taitasi tala ua filifilia ma saili po o a ni eseeseega o nei faamaumauga e faatatau i le valaauina o Peteru. Ia tolaulau ma faamaumau eseeseega mai tala ua faitauina.

Aotelega a le Taitai:

1. Faamaoni i lo tatou valaauina.

2. O i tatou o tagata valaauina mo le Atua ma ana galuega.

3. Aua le faalotolotolua lou valaauina i le oa o lenei lalolagi.

Aso Sa: 22 Aokuso 2021

Mataupu: UA USIUSITA'I LE FOAFOAGA IA IESU

E i ai tala faamauiina o le Tusi Paia o lo o iloga ai le Mana o le Alii na Ia faatonu ai le foafoaga ina ia usiusita'i atu ia te Ia.

Fesoasoani mo le Taitai:

O tala ua saunia mo le talanoaga o le Mataupu –

1. Kenese 1&2 – tala o le foafoaga. Na ona fetalai lava o le Atua, ona i ai lea o lea mea ma lea mea.

2. Iona 1: o lo o taua le faatotoina ifo e le Atua o le matagi tele i le va'a ma fesouaina ai le sami. O le Atua foi na faaogaina le auvaa latou te

fesiligia Iona i lana amio ua fai. Lea lava ua tautino ma faailoa lona sese. Ina ua lafo Iona i le sami, na saunia e le Atua le i'a ua folo ia Iona ma luai i le eleele matutu.

3. Iona 4: ua saunia e le Atua le kikaiona ua sosolo i luga o le ulu o Iona. Ua oo i le isi aso, ua saunia e le Atua le anufe ua aina i le kikaiona, ona ita ai lea o Iona. E ita Iona i le Atua, ae galo ai, o lo o usiusitai laau ma i'a o le sami i le Atua ae le usitai ia o le perofeta.

4. Esoto 16 – faitau ma aumai ni tala o le malaga a le nuu i le vao. O le manai ma le salu na faatotoina ifo e le Atua. O le papa na tafe mai ai le vai. O le sami ulaula ma mea uma. E oo lava i mala e sefulu, o mea ia o le foafoaga ua usiusitai i le Atua.

5. Mataio 8: 23-27, Mareko 4:35-41, Luka 8: 22-25 – Taofi e Iesu le matagi – O le matagi ua pesi tele mai, ae ua vavao e Iesu i lona mana.

6. Luka 5:4-11 – faatonu e Iesu i'a o Kalilaia ia toe foi ane i le vai.

7. Mataio 26:34 – vivini o moa ina ua faafiti Peteru. Na fetalai manino Iesu ia Peteru, e le vivini faatolu moa seia faafitu o ia i a te Ia. Na tupu le mea lea, e fai ma faailoga o le usiusitai o moa ia Iesu.

8. Luka 19: 40 – fetalai manino Iesu, a le alalaga mai tagata ia te Ia, e mafai ona alalaga mai o ma'a ma le siosiomaga.

O nisi ia o vaaiga o lo o iloa ai le Silisili Ese o le Atua i lona mana, e taofia ai mea uma ua finagalo i ai. Ia manatua o i tatou, o le foafoaga silisili lea a le Atua i le amataga o le tagata. Afai ua usiusitai le foafoaga uma, o lona uiga e tatau ona sili atu le ola usiusitai o le tagata i lo o le foafoaga.

Faatinoga o le Mataupu:

Saili mai e sui taitasi ni tala o le Tusi Paia o lo o atagia ai le usiusitai o le foafoaga ia Iesu.

Aotelega a le Taitai:

Ia sili atu ona tatou usiusitai ma faalogo i le Atua, i lo o se isi lava mea o le foafoaga. O i tatou lava na faaeleelea ai lo tatou Alii. Ia fai se viiga o le Atua.

Aso Sa: 29 Aokuso 2021

Mataupu: ONOSA'I I LE OGE- Ruta 1

E eseese lava faitauga o le tala lenei ia Naomi ma lona aiga: Elimeleka ma lana fanau tama: Maalona ma Kiona. O le tatou mataupu o lenei aso, o lo o faamamafa ai le o ese mai Peteleema, o le o ese lava lea i manuia o le Atua ua saunia mo i latou. E mo'i o lo o maua meaai ma mau le nuu o Moapi, peitai, e le o so latou faasinomaga lea mai le Atua.

Fesoasoani mo le Taitai:

O lo o manino i le tala, o Naomi ma lona aiga e aumau i Peteleema – *house of bread*. O lo latou faasinomaga lea mai le Atua e ola ma aumau ai. Peitai, na oo mai le oge i le nuu o Peteleema ona manatu lea e o ese ae saili manuia i Moapi. Peitai o le tala faamauina, o le aumau ai i Moapi na maliliu ai Elimeleka ma lana fanau tama.

O le saili manuia i Moapi e le o se mea faalēaoga, ona o le manatu e tatau le saili manuia ona o le oge ua vevela.

Peitai, e tupu pea fesili i le mafaufau ona o lea ua maua meaai mai le oge, peitai, o lea ua oge tagata lo latou aiga ina ua maliliu Elimeleka ma lana fanau tama.

Nisi o fesili e mafai ona faasoa ai le Autalavou:

a. O le o ese mai Peteleema ae agai i Moapi, o se faamanuiaga po o se faasalaga, pe a fua i le mea ua tupu?

e. Aisea ua faasaoina ai Naomi ae maliliu na o Elimeleka ma lana fanau tama?

i. Pe le o se tau'i lea o Naomi i lona fīu e finau atu ia Elimeleka e nonofo pea i Peteleema e ui ua vevela le oge?

o. O le uiga o le igoa o Peteleema o le fale falaoa – *house of bread*, ao lea ua oo i ai le oge?

u. Pe le o se tofotofoga lea mo tagata o lo o aumau i Peteleema, ao lea ua toilalo ai Elimeleka ma lona aiga?

(faaopopo i ai ma nisi fesili mai le Autalavou)

E i ai le talitonuga, e mau eseese la tatou faitau i tala o le Tusi Paia, ae manatu le tatou mataupu: **O le oti o Elimeleka ma lana fanau tama, o le tau'i o taitaiga sese ma finauga lē tonu, ina ia saili fesoasoani i Moapi ae lē o le Atua o Peteleema.**

E faavae nei finauga i le mafauauga:

1. O le o ese o Elimeleka ma lona aiga mai Peteleema, o le o ese lava lea mai manuia o le Atua ma lo latou faasinoga: Peteleema.

2. O le oge, o se tofotofoga mo Elimeleka ma lona aiga, peitai, ua toilalo ma faiaina ai.

3. Na maua loa manuia o Elimeleka i Moapi, galo loa le Atua Soifua

4. O le toe fo'i o Naomi ma Ruta i Peteleema, o le toe fo'i lea i manuia o le Atua. Ma na faatele ifo e le Atua ona manuia ma faatupu le gafa o le aiga, seia oo lava ia Iesu Keriso.

Faatinoga o le Mataupu:

Ia faasoa le Autalavou i fesili ua tapena mo le mataupu;

Aotelega o le Taitai:

O le soifuaga leni, e tele vaaiga e foliga o se oge i lo tatou ola. Ae ia tatou talia ia mea, o ni tofotofoga mo lo tatou ola faatuatua.

O aiga, nuu, aulotu, o o tatou faasinomaga ia mai le Atua. O a foi mea e tutupu ai, ia tatou saili fesoasoani muamua i le Atua e faasino mai i tatou i ala e tataou ona tatou uia. Aua sola ese ona o le oge, ae ia avea le oge ma ala e saga tupu tele ai le faatuatua i le Atua Soifua.

O le tusi o Ruta, e aofia i tusitusiga ua taua o *5 scrolls of Megillot* i le vaega o (*Kethubin – writings*) i le Tusi Paia Eperu. O tusitusiga e aofia ai: Ruta, Pese Solomona, Failauga, Auega, Eseta. O tusitusiga e lau ma faailoa i le malumalu i sauniga eseese o le talitonuga faa-Iutaia. O tusitusiga foi nei, o lo o lu'i ai le tele o talitonuga faa-Iutaia. Mo le tusi o Ruta, o lo o luiina ai le talitonuga o Iutaia – na o alii e ola ai aiga. O tamaloloa ma fanau tama e faaolaina aiga ma au o latou gafa. Peitai o le tala ia Naomi ma Ruta, e le o sa'o atoatoa ai lea talitonuga. Aua o lea lava na iu manuia le aiga o Naomi e ala i le alofa faamaoni o Ruta ia te ia. O lo o faamauiina, o Ruta le tupuaga o Iesu – Mataio 1

Aso Sa: 5 Setema 2021

Mataupu: O ISAKARA MA LE OLA FAI TAULAGA – Kenese 49:14-15

O le masina leni o faiga taulaga o le Tala Lelei, faasolo atu i le masina o Novema mo faiga taulaga o le Taulaga Samoa. O se faiga ua masani ai o tatou tagata lolotu, o le fai taulaga mo le Ekalesia. E tele foi isi auala o loo fai taulaga ai i le Ekalesia, peitai, o faiga taulaga tetele ia e lua i so o se tausaga. Ua filifilia le tala ia Isakara e maua ai se feau faamalosi i le uiga moni o le ola fai taulaga o le tagata faatuatua.

O le faasologa o le fanau a Iakopo e pei ona faamauiina i le Tusi Paia:

Kenese 29:32-35 –

Lea:

1. Reupena – Faauta, o le tama

2. Simeona – O lo o faafofoga

3. Levi – O soso'o

Kenese 30: 1-8 –

Pila (Auauna a Rasela):

4. Iuta -O viiga

5. Tanu - O faamanuiaga

6. Nafatali - O fagatuaga

Kenese 30: 9-13 –

Selepa (Auauna a Lea):

7. Kato -O le 'au

8. Asera -O amuia

Kenese 30: 14-21 -

Lea:

9. ISAKARA – O LE TAUI

10. Sepulona - O loo mau

11. Tina – (*teine, o le fanau a Iakopo*)

Kenese 30: 22-24 - Rasela

12. Iosefa - faaopoopo

13. Peniamina/Penani – o le tama o lo'u lima taumatau/tama na ou tigā ai- (**Kenese 35:16-17**)

O le fanau a Iakopo e pei ona faamauiina i le Tusi Paia – **e to'a sefulu ma le tolu – 13** - sefulu lua (12) tama ae tasi (1) le teine – **Tinā**

Peitai, o tusitusiga faa-Eperu e pei ona faaliliuina mai ai le Tusi Paia, e faamuamua lava le itupa o alii/tama i so o se faitauga o aiga ma so o se faalapotopotoga. I le mafauauga, o tama/alii latou te faaauauina gafa o aiga. E i ai le taimi e faaipoipo ai le teine o le fanau, ona sui lea o lona faai'u ma motusia ai lona sootaga i measina a lona aiga e pei o fanua, suafa ma isi.

O le mafuaaga lea ua faitau ai na o tama – 12 i le fanau a Iakopo.

O faamanuiaga mo Isakara - Kenese 49: 14–15

“O Isakara e pei o le asini malosi o ia, o loo taoto i le va o avega e lua; ua iloa atu e ia le malologa ua lelei, ma le fanua ua matagofie, ona tuuina atu lea o lona ua i le amoga, ua fai foi ma pologa e fai taulaga”.

O le a le uiga o ia upu?

1. O Isakara e pei o le asini malosi o ia, O le asini i le tala faasolopito o Isaraelu, e faaigoa o le **manu ave avega – beast of burden**. O lona lea tiute tauave i aso uma– o le amo avega. Po o le a lava le mamafa ma le tele o avega e amo e le asini, e le vaaia ni ona foliga faavaivai.

2. o lo o taoto i le va o avega e lua; O le faailoga o galuega e lē uma. A oo ina malolo le asini, e malolo i le va o avega. E maua taimi e malolo ai, peitai, e toe fa’aaauu foi i le galuega lava lea e tasi, o le tauamo o avega e tele ma le mamafa

3. ua iloa atu e ia le malologa ua lelei, ma le fanua ua matagofie, ona tuuina atu lea o lona ua i le amoga, ua fai foi ma pologa e fai taulaga”. O le onosai ma le faamalosi o le asini e tauamo avega e tele ma le mamafa, e mafua ona o le fanua matagofie – poo le tau i o ana galuega o loo faia.

E peiseai, e tupu le malosi ma le lototele pe a iloa ma mautinoa lona taunuuga. E ui e lē o le muta’aga lea o le ola galue, a o tau i ma le faamanuiaina o le mea sili lea. Mo le asini lava ia, o le fanua matagofie e mafai ona maua ai se malologa umi, o ni vai inu ma ni meaai se tele, e maua ai foi se paolo se’i fai ma faasiligāmalosi ao le’i toe faaauuina ona tiute masani.

Fesootaiga ma le ola fai taulaga: O le uiga o le igoa o Isakara – O le Tauti. E foliga faapena le uiga loloto o le ola fai taulaga i le Atua. O a lava mea tatou te ofoina e ta’ua ai le suafa o le Alii, o mea ia tatou te faia ma faailoga o lo o alofa atu e tusa o le Atua na muai alofa mai. O le faitaulaga i le Atua, o le tau i lea o Lona Alofa mai ia i tatou. O lona uiga, e le o se galuega e i ai sona muta’aga. O galuega e faia pea lava pea i aso uma ma taimi uma.

E tele auala e mafai ona fai taulaga ai i le Atua, ona o lona agalelei mai ia i tatou. Pau le faamanatu e pei ona tautala Paulo: O le ola faitaulaga e

le o se mea e faamalosi, ao se galuega e faia ma le loto fuatiaifo e lelei, ina ia mu ma manogi i le faafofoga a le Atua. Ia tatou onosai ma fai taulaga i le Alii, aua e tele ona manuia ua saunia mo i tatou uma.

Aotelega:

1. Fai taulaga ma le loto faatuatua.
2. O le ola faitaulaga, o lo tatou valaauina mai le Atua.
3. E faamanuia le Atua i soo se taulaga e faia mo Ia.

Aso Sa: 12 Setema 2021

Mataupu: E MATUĀ LELEI LE FEALOFANI O USO – Salamo 133

O le upu *fealofani* e uiga tutusa ma le *nonofo faatasi o uso* e pei ona taua i le Salamo. O se uiga faaletagata e tele ona aoga i le soifuaga o aso uma. O le upu *uso* o lo o faauigaina – o tagata uma e talitonu i le Atua *Soifua*, e lē na o alii/tama e pei ona faauiga i le gagana o aso uma.

Fesoasoani mo le Taitai:

Vaaiga Lautele i le Salamo 133:

O le Salamo 133 o se Pese e lagiina e Isaraelu i le vaitau o le ō a’e i Ierusalem e faataunu a latou sauniga faapitoa e aofia ai:

a – Tausamiga o le Paseka – faamanatu ai le la’a loa o le fasi a le Atua i ulumatua o Isaraelu.

e. Tausamiga o iligāpu – faamanatu ai le taua o leo o pu i le taimi o le malaga i le vao. O leo o pu na fesootai ai le nuu e faailoa se mea o le a tupu aemaise i taimi o taua ma nuu tuaoi.

i. Tausamiga o Fale Apitaga – faamanatu ai le taua o le maumau solo i fale ie ma fale Apitaga ao agai le malaga i Kanana - ma isi sauniga faapitoa.

O le Salamo o lo o faatauaaina ai le fealofani o loto o tagata tapuai, ao le’i ofoina le taulaga faafetai i le Atua. O lā Iesu, afai o ita lou loto i lou uso a o sauni e fai le taulaga, e sili ona tu’u o le taulaga ae fai le leleiga ma le isi uso a tagata. E taua le fealofani o loto ma agaga o tagata uma ao le’i faia le taulaga i le Atua. O se a’oa’oga taua lea mo i tatou o tagata

tapuai, e leai se aoga o le toaga i le Lotu ma faalupe i tatou o tagata Kerisiano, ae le fealofani o tatou loto i luma o le Alii.

Fesili mo le Autalavou: O le a se taua ia te oe o le fealofani o loto o tagata tapuai?

E atoatoa le taulaga i le Atua pe afai e fealofani loto o tagata tapuai.

E lua vaaia taua ia ua faatusa i ai e le fai-Salamo le taua o le fealofani po o le nonofo faatasi o uso:

1. Suāuu Lelei i le ua o le ofu o Arona.

f.2. Ua tusa ma le suāuu lelei i luga o le ulu, na tafe ifo i le ‘ava, o le ‘ava lava a Arona, na tafe ifo i le ua o ona ofu.

E tutusa le suāuu lelei o lo o taua i le Salamo ma le suāuu na faauuina ai Arona ma lana fanau e fai ma ositaulaga e pei ona fetalai tuusa’o mai ai le Atua ia Mose:– Esoto 29:7/Levitiko 8:12.

O so o se suāuu lelei lava, e lē faigofie ona gaosi. E taugata ma anagata. E lē soona faaaogaina e tagata lautele seia vagana ni sauniga faapitoa. O le suāuu e sili ona molemole ona foliga vaaia, i lo o se isi lava suāuu. E i ai foi le talitonuga, e le o tagata uma e maua se suāuu lelei. O lona uiga, afai e maua, e tatau ona faapelepele ina ne’i ma’umau.

Feso’otaiga o le fealofani ma le suāuu lelei : Ua mautinoa, o le suāuu lelei, e lē o se mea e maua gofie. E faapena le loto fealofani o tagata uma. E lē faigofie ona maua. Aua e pule lava le tagata ia i lona loto. O lona uiga, e lē itiiti se galuega e tatau ona faia, ina ia maua le fealofani o loto. A o le mea ua mautinoa, e taugata ma anagata le fealofani o loto. Aua a leai se fealofani o tagata, e lē maua foi ni mafutaga manuia. Na o mafutaga fefulituaai ma mafutaga malepelepe. Afai foi e faia le taulaga i le Atua a’o ita le isi i le isi, o le upu a le Tusi Paia, e lē taliaina e le Atua ni taulaga e faia ma le loto ita. O le uiga lea o le naunau o Isaraelu, ina maua le loto fealofani a’o le’i faia le taulaga faafetai.

O le suāuu e tafe ifo i le ‘ava, e tafe ifo foi i le ua o ona ofu. O le faailoga o faamanuiaga e amata mai le Atua seia oo i tagata uma. O lona uiga, e le mafai ona maua se loto fealofani, pe a tatou lē loto i mea a le Atua.

2. Sau mai Heremoni: *f.3. E tusa ma le sau i Heremoni, ua totō ifo i luga o mauga o Siona; auā na poloai le Alii ia oo i ai lana faamanuia, o le ola lava lea e faavavau.*

O Heremoni:

- i. O le mauga e maualuga lona tumutumu i le tele o mauga – *Mataio 17:1* pe tusa o le 9,000 futu le umi –
- ii. O le mauga o lo o tuaoi ai Kanana ma isi malo i le itu mātū – *Teu 4:48, Iosua 11:17, 1 N/Tupu 5:23, Salamo 42:6.*
- iii. O lo o i ai ni suesuega – o le mauga lea na liueseina ai Iesu i luma o ona so’o – *where Jesus’ s Transfiguration took place* – Ua mafai ona faamaonia lea talitonuga ona o loo taua:
 - ❖ Kaisereia Filipi (Mataio 16:13) – o le lauelele lea e tu ai le mauga..

O le mauga o Siona, o lo o faatatau i le nuu o Isaraelu. O lona uiga, e mafai ona faapea: *o le sau mai Heremoni ua tōtō ifo i luga o Siona po o Isaraelu.* O le sau mai Heremoni, e mālū i so o se taimi o le aso, e oo lava i le tau vevela e le sua le mālū o le sau mai Heremoni.

Fesili mo le Autalavou: O le a se taua ia te oe o le sau mālū pe a vevela le aso? A oo ina vevela le aso, e lē maua se to’afilemu. E le maua se moe ma se nofo lelei. Ae afai e agi mālū le savili, e maua lagona filemu. O lagona filemu na te pua’ina manatu lelei ma le fiafia.

Feso’otaiga o le sau mai Heremoni ma le nonofo fealofani:

O le mālū o le sau mai Heremoni ua fai ma faamanuiaga i tagata o Isaraelu i taimi o le vevela. E faapena le fealofani. Po o le a le vevela o faafitauli ua lē maua ai se nofo lelei, ae a maua le fealofani, o le mea mautinoa e i’u lava i le to’afilemu. Aua o le a maua ni manatu lelei e faasoa ma soalaupule ni fofu ina ia foia ia faafitauli. E taua foi i le faitau le mauga maualuga e faatusa i ai le fealofani. E peiseai o se uiga faaletagata lea e tatau ona tatou faamuamua ina ia mautinoa le manuia o mafutaga tatou te i ai. O le tapuai i le Atua ma le loto fealofani e mautinoa ai le moni o le tapuaiga e ofoina mai le loto aemaise o le agaga e faia ai o so o se foai mo le Atua.

O le mauga i le vaai a le Isaraelu, o le Afioga Paia o le Atua. O lona uiga, o le sau mai Heremoni, e mafai foi ona faauiga, o le manuia o le Atua ua faatōtō ifo i luga o Isaraelu ma tagata faatuatua uma.

Faatinoga o le Mataupu: Fetufaaiga

Ia vaevae i tama ma teine. Tuu le avanoa e talanoa ai vaega taitasi i le faauigaina o le Salamo 133.

O le a le fesootaiga o le ola fealofani ma ata faatusa o lo o taua i le fuaiupu 2 (*suāuu lelei*) ma le fuaiupu 3 (*sau i Heremoni*).

Aotelega mo le Taitai:

1. Ia tatou fealofani ma le Atua i taimi uma e ala i le tatalo ma faia o lona finagalo paia.

2. O le alofa i le Atua ae ita i le uso o le pepelo lea mea.

Aso Sa: 19 Setema 2021

Mataupu: TAUSILI MO LE MALO O LE ATUA –

Mataio 6: 25 - 34.

O le tasi lenei o sini autu mo le soifuaga o so o se kerisiano. Ia tausili mo le malo o le Atua. O se tasi o aoaoga o lo o momoli mai i le tele o fetalaiga a Iesu pe a talanoa i le malo o i le lagi. Pe a tatou mafaufau loloto i ai, pau a ia o mea e tataua ona naunau i ai le loto o le tagata faatuatua, ia ave i ai lana faamuamua i taimi uma o lona soifua. Peitai e foliga mai ai ua faaleaogaina ai mea o i le lalolagi na tapenaina mo le tagata.

Fesoasoani mo le Taitai:

O le a le taua o le ola tausili po o le ola finafinau i le olaga lenei tatou te i ai?

O le ola tausili/finafinau e maua ai le oa natia o le lalolagi lenei. O le potu ma le tamaoagia, o meaalofoa foai fua ia a le Atua i le tagata. Peitai, e le mafai ona tatou maua ia meaalofoa pe afai tatou te lē finafinau ma tausili i le mea e gata ai le malosi, ina ia maua ma fa'aaogaina.

Aisea ua fetalai ai Iesu e aua le popole i le lalolagi ae popole i le malo o le Atua?

O le Mataio 6: 25 - 34, o se tasi lea o vaega o le lauga a Iesu i luga o le mauga. O lo o fetalai ai Iesu i le oa o le lagi ma le oa o lenei lalolagi. O le oa o le lalolagi e mafai ona avea le atua i le loto o le tagata pe a fai e naunau i ai lona loto. E oo ai i a te ia le faamaualuga ma le faasausili, aemaise e lē tupu ai se alofa mo e matitiva. Ua Ia fetalai foi, o le oa o le lalolagi e i ai le taimi e mou ai aua o mea e pala.

Peitai o le oa o le malo o le Atua e lē fuatia ini mea e maua, ae fuatia i galuega e afua mai i le loto e lelei. O le loto alofa, loto maualalo, amio lelei ma isi lava lagona lelei e faataunuina ai le poloaiga sili; *"Ia e alofa atu i le Atua ma lou loto atoa, ma lou agaga atoa, ma lou malosi atoa; ia e alofa atu i le lua te tuaoi ia pei o oe lava ia te oe."*

Fetalai Iesu, afai e maua e le tagata ia tamaoaga o le lagi, ona foaina lea ia te ia o isi mea uma o lenei lalolagi: *"A ia outou muai saili le malo o le Atua ma lana amiotonu; ona faaopoopoina atu lea o ia mea uma ia te outou."* I le fuaiupu e 32 i lona vaega mulimuli o lo o Ia fetalai ai foi, *"Aua ua silafia e lo outou Tama o i le lagi e aoga ia mea uma ia te outou."* O lona uiga, e lē o se mea faaleaogaina le oa o lenei lalolagi tatou te i ai. E taua mo le soifuaga o aso uma o le tagata, peitai a sese loa la tatou faamuamua i le oa ae faatuatua le Atua ma lona finagalo, ona tauleaogaina lea o le oa o lenei lalolagi. .

Ua lē aoga ea le tausili mo manuia o lenei olaga: e pei o le potu, tamaoaga ma isi?

E leai, e le faapea ua faaleaogaina le ola finafinau i isi mea taua o lenei olaga. A o le finagalo o Iesu, ia mu'ai saili le malo o le Atua. Ia mu'ai popole le tagata i le faia ma le lē faia o amioga e sao ai i le malo o le Atua.

Ua fetalai manino Iesu, afai e maua le malo o le Atua, o isi mea uma o lenei lalolagi, ua faaopoopoina ma faateleina lea i le tagata faatuatua.

O le a se fesootaiga o le Autu ma le ola tautua o le Tupulaga Talavou?

O le i ai o le tagata i lona talavou, o taimi faigata ia aua o taimi o filifiliga ma o lo o tulimatai le lumanai manuia. O taimi foi ia o le ola manaonao o le loto o le talavou i mea e maua ona o le oa ma le tamaoaga. O nei foi vaitaimi ua tele le suiga o le soifuaga i si o tatou

atunuu e aafia ai le ola faale-faatuatua o tupulaga talavou. O le feilafi mai foi o le oa o lenei lalolagi, e ono faaseseina ai loto o tupulaga ona o faaosoosoga ma tuinauga o le ola. Peitai e te le faatali seia avea ma tagata matua ona faatoa saili lea mo le malo o le Atua, leai e amata atu lava i le taimi lenei. O le tele foi o tupulaga ua maua galuega ma maua le tamaoaiga, ua faatuatuanai le ola auauna i le Atua e ala i le Ekalesia. E pei o le alofa o le faifeau, o taulaga ma isi. Ua tele na augata o latou manatu e faatino ia tulaga ona o loo faaaluina ai le tamaoaiga e faataunuina ai o latou manao. O le faamanatu a le mataupu, leai e taua le oa ma le tamaoaiga mo le manuia. Peitai o le manuia ua e maua ia faasoa mo le manuia o isi ma faatino ai le alofa, e le gata i le Tala Lelei i le Atua a o ou uso a tuaoi.

Faatinoga o le Mataupu.

Faitau le tusi filifilia mai le Tusi Paia, ona faasoa lea o le Autalavou i fesili ua saunia mo le Mataupu.

1. O le a le taua o le ola tausili i le olaga lenei tatou te i ai?
2. Ua le aoga le tausili mo isi mea taua o le olaga; e pei o le poto, tamaoaiga ma isi?
3. Aisea ua fetalai ai Iesu e aua le popole i le lalolagi ae popole i le malo o le Atua?
4. O le a se fesoootaiga o le autu ma le ola tautua o Tupulaga Talavou?

Aotelega a le Taitai.

1. E taua le poto ma le tamaoaiga tatou te maua, ae sili ona taua pe a faaoga tatau mo le viiga o le Atua.
2. Tausili mo le malo o le Atua tatou te sao ai i lana faamasinoga amiotonu.
3. Saili mo le malo o le Atua ona foaiina lea o isi mea mo i tatou e le Atua e faatino ai la tatou auaunaga ia te Ia ma soo se mea lava.

Aso Sa: 26 Setema 2021

Mataupu: E ALOFA IESU I LE FAFINE O NUU ESE? - Mataio 15: 21-28

“E lē tatau ona ave le mea e ‘ai a le fanau, ma lafo i ulī.” O le ulī – o le isi igoa e valaau ai ta’ifau/maile. O lona uiga, o lea ua faatusa e Iesu le fafine Kanana i le ta’ifau/maile.

O le fesili: *Ua lē alofa ea Iesu i le fafine Kanana*

Fesoasoani mo le Taitai: Silasila i le faataotoga o le tala na faitauina ma matau le faasologa o le talanoaga. O i o lo o manino ai le finagalo o Iesu ma le feau o lo o momoli mai:

f. 21 - Ua agai Iesu ma le au so’o i Turo ma Saitonu – nuu e le talitonu i le Atua o Isaraelu.

f. 22 - Ua sau le fafine Kanana – fafine o nuu ese, ua valaau mai: *“Le Alii e, le Alo o Tavita, ia e alofa mai ia te au; ua leaga lava la’u tama teine i le temoni ua i ai.”*

f. 23 - Ua lē fiafia le au so’o ona o le fafine o nuu ese ua valaau mai ia Iesu, ona latou faatauanau lea o Iesu e tuli ese le fafine: *“Ia e tuuina atu ia te ia e alu, aua ua mulimuli mai o ia, ma alaga mai ia te i tatou.”*

f. 24 - ua toe faamanatu e Iesu i le au so’o le faamoemoe o Lona Afio mai: *“E lei auina mai a’u i nisi, a e tau lava o mamoe o le aiga o Isaraelu ua lē iloa.”*

f. 25 – ua toe augani le fafine ia Iesu mo se fesoasoani: *“Le Alii e, ia e fesoasoani mai ia te au.”*

f. 26 – o le tali a Iesu i le fafine: *“E le tatau ona ave le mea e ‘ai a le fanau, ma lafo i ulī.”*

f. 27 - o le tali a le fafine ia Iesu: *“Le Alii e, e moni a oe; ae ui i lea ua aai e ulī o momoi mea ua pau’u i laulau a o latou tāula.”*

f. 28 - ua toe tali Iesu i le fafine Kanana: *Funa e, ua tele lou faatuatua; e pei o lou manao; ia faapea lava ona faia ia te oe.* Ona malolo ai lea o lana tama teine i lea lava itu aso.

O le agai o Iesu ma le au so’o i Turo ma Saitonu, o lo o agai mo se latou malologa (*break/rest*) mai le tele o isi galuega ua uma ona faia. Peitai, na mulimuli atu ai ma le fafine Kanana i lona fia maua o se fesoasoani.

I le aotelega o le tala na faitauina, o lo o atagia ai le i ai pea o le tuaoi – (*barrier*) o lo o va ‘ai le tagata o nuu ese ma le tagata Iutaia. O le tuaoi – *barrier* na amata mai lava i le Feagaiga Tuai, ina ua manatu le Isaraelu, e lē faitauina tagata o nuu ese, o ni tagata o le Atua. Lea la ua oo mai i taimi o Iesu, o lo o fa’auau pea le tuaoi lea. O le agaga – (*purpose*) tonu lea na mafua ai ona augani le au so’o ia Iesu ina ia auina/tuli ese le fafine Kanana. I le manatu o le au so’o: e lē tatau se faamalologa mo tagata o nuu ese (*f.23*). Peitai, o lea ua sosofa e Iesu le tuaoi lea: **Na faafefea ona sosofa e Iesu le tuaoi o le Iutaia ma le tagata o nuu ese?**

Na toe faamanatu e Iesu i le au so’o, le aano moni o lona Afio mai: *Ia saili mamoe o le aiga o Isaraelu ua lē iloa faaleagaga*. Ua faalupe e Iesu tagata Isaraelu, o mamoe. Ua tatou iloa ai, o Iesu lava le Leoleo Mamoe Lelei mo Isaraelu. Poo le a foi le ituaiga lē iloa e lē iloa ai le mamoe, e saili lava e Iesu ma toe aumai i ona luma e tausi lelei. **O ai o loo faasino i ai mamoe ua lē iloa?** O mamoe ua lē iloa o lo o faasino i tagata Iutaia e tausi i tulafono ma faalupe i latou o tagata o le Atua, ae lē o ola faale-Atua. Latou te lē talia foi a’oa’oga ma galuega a Iesu.

I le tala na faitauina, o mamoe o le aiga o Isaraelu ua lē iloa o loo faasino lea i le au so’o. O le au so’o sa vaavaai i vavega ua uma ona faia e Iesu, a o lea lava e tumau i le ola lē alolofa i tagata o nuu ese aemaise o le tagata ua matuā moomia le fesoasoani.

Ua fa’aaogaina e Iesu se vaaiga masani ma se lafoga o lo o fa’aaogaina i aso uma i le va o le Iutaia ma tagata o nuu ese: “*E lē tatau ona ave le mea e ‘ai a le fanau, ma lafo i uli.*” O se lafoga o lo o atagia ai le vaai mauualalo o le Iutaia i tagata o nuu ese pe a latou faafesagai. O le faataoto ua faatusa ai Isaraelu i fanau (tamaiti) – ao Kanana ma nuu ese i uli/ta’ifau.

O le upu *uli* o lo o fa’aaogaina e Iesu, e faasino i tama’i maile – *puppies*. O ta’ifau e tausi ma faapelepele e aiga. O lona uiga e tatau i fanau-Isaraelu, ona faapelepele i tagata o nuu ese. E moni e lē aai faatasi le fanau ma tama’i maile, peitai, e i ai lava taimi ma taumafa faapitoa mo ta’ifau ua faapelepele ona fai – *pets*. E foliga faapena le ata lea e fetalai ai Iesu, e tatau ona fealofani Isaraelu ma tagata o nuu ese. E tatau ona

alolofa Isaraelu i tagata o lo o fia maua se fesoasoani ae le o le tuli ese e pei ona augani le au so’o.

Tali o le fesili: E alofa Iesu i le fafine o nuu ese? - IOE E ALOFA IESU I SO O SE TAGATA.

O le feau faaleagaga lea o lo o taumafai Iesu e faailoa i lona au so’o ma i tatou uma. Ia fealofani tagata Isaraelu ma tagata o nuu ese. O le atoaga foi lea o lona Afio mai i le lalolagi, ia soloiesea pa pupuni- *barriers*, o loo va ‘ai le tagata o nuu ese ma le tagata Iutaia, ina ia maua se lalolagi filemu ma le fealofani. I le olaga lenei, e tele lava faiga o lo o va ‘ai tagata soifua i aso uma. O faiga o lo o iloa ai le vaai mauualalo ma le manatu faapito o le isi tagata i le isi tagata. O le finagalo o Iesu, ia tatou maua le fealofani.

Faatinoga o le Mataupu: Faaaliga Manatu

1. Afai o oe o le fafine Kanana o le a sou lagona i le tali a Iesu.
2. Afai o oe o lo o e mulimuli ia Iesu e te fia faalogo i ana a’oa’oga o le a sou manatu i le tali a Iesu?
3. O le a se vaai faaleaganuu Samoa i le tali a Iesu?
4. Ua le alofa ea Iesu i le fafine Kanana?

Aotelega a le Taitai:

1. E alofa Iesu i tagata uma.
2. Aua le vaai mauualalo i tagata.
3. Aua le faali’i ia Iesu, ae ia onosa’i ma tulimata’i lou faamoemoe.

Aso Sa: 24 Oketopa 2021

Mataupu: O IOPU MA LONA AIGA MAI LE NUU O USA – Iopu 1:1-22

O le a se taua o lou nu’u ia te oe? Tatou sailiili i le nuu o Usa ma lona siosiomaga pe i ai sona fesoootaiga ma le tala i le faatuatua o Iopu.

Fesoasoani mo le Taitai:

Faamatala le nuu o Usa: E lē o matuā manino le tulaga tonu o le nuu o Usa i le tala faasolopito o Isaraelu.

Peitai, o lo o i ai le talitonuga, e fesootea Usa ma le nuu o Etoma. – ***Iopu 1:21***- ...*Na ou sau lē lavalavā mai le manava o lo’u tinā, o le a ou foi*

atu i ai ua lē lavalavā - **Auega 4:21** – Ina olioli ia ma e fiafia oe le tama fafine a Etoma e, o loo nofo i le nuu o Usa; e oo atu ia te oe lava le ipu; e onā ai oe, ma e faalelavalavā ai. O tusi si’i nei mai le Tusi Paia, o loo manino ai le fesootaiga o Usa ma Etoma. O le ipu – (to’asa o le Atua) e onā ai tama fafine o Etoma o loo i Usa, ua faatusa i ai faigata ma tiga e pei ona inu ai Iopu ma ia tautino lona lē lavalavā – o lona uiga, e toe foi a mea uma i le Atua o Lē na aumaia ia mea uma i le tagata. Jeremia 25: 19-26 – o nuu lē talitonu i le Atua o le a faainumia i le ipu o le toasa o le Atua – f. 15- ...Ia e ave le **ipu uaina o lou nei ita ai lo’u lima**, ma faainu a’i atunu’u uma ou te auina atu ai oe ia te i latou. O le fuaiupu 20, o loo ta’ua ai Usa ma Etoma.

O lona uiga, o Usa o le nuu e lē talitonu i le Atua Soifua. O le nuu e ifo i atua faapaupau. Peitai, o lea e manino le uluai fuaiupu o le tusi o Iopu: *Sa i le nuu o Usa le tasi tagata, o lona igoa o Iopu; na sao le amio a lea tagata ma le amiotonu, sa mata’u foi o ia i le Atua, ma ‘alo’alo ese i mea leaga.*

E faapefea ona iloa le amiotonu ma le mata’u o Iopu i le Atua.

O le ola mata’u o Iopu i le Atua, o loo iloa i lona faatuatua. E tiga lava ona finau atu lona toalua ma ana uo e faifai i le Atua, e lē mafai lava. Ao le tusi faitau o le tatou mataupu, o loo iloa le ola mata’u o Iopu i nisi o faatinoga na ia faia:

‘alo’alo ese mai mea leaga: ua manino ma iloa o Usa o se nuu faapaupau. O lona uiga, o mea leaga o loo faasino i ai lenei faaupuga, o faiga ma amioga e inosia i luma o le Atua. O amioga e masani ai tagata o Usa – tagata faapaupau ua ‘alo’alo ese ai Iopu mai ia faiga.

f.5 – a uma ona faia e le fanau a Iopu o tausamiga i aso taitasi, ona tulai lea o Iopu ua faia o le taulaga mu e faapaiaina ai lana fanau e toasefulu 10 – 7 tama ae 3 teine –

Silasila i le faaaogaina o *numera paia poo numera atoatoa* e faanumera ai le fanau a Iopu -**7&3** – o le faailoga o faamanuiaga ua atoatoa mo Iopu ona o lana amiotonu.

Taulaga Mu o loo faia e Iopu – burnt offering – e tutusa ma isi taulaga mu o loo taua i tusi nei: Kenese 22:3, Numera 28:37, Esoto 29:42, Numera 28:24. O le faamoemoe o nei taulaga ia mu ma manogi le manu

(manu e mama) e susunuina ma ia alu ae le afi ma le asu i le lagi. O le faailoga o le fesootai atu o le loto o le tagata tapuai i le Atua i se mea ua manao i ai - *Salamo 20:3-4*. Mo Iopu ma le tala na faitauina, o taulaga mu ua faia i le Atua ina ia faamagalo lana fanau i lona manatu: “*Atonu ua agasala o’u atalii, ma faifai i le Atua i o latou loto*”.

f.20-22 – e le’i gagana Iopu i se upu faifai i le Atua pe tuua’i le leaga i le Atua ina ua oo ane le tala faanoanoa i lona tamaoiga ma lana fanau ua aveesea. O upu e faia ma le loto faamaoni i le Atua, o *Lē na aumaia, o Ia foi e toe aveeseina*.

O se aiga amio Atua le aiga o Iopu?

Leai! E lē o se aiga amio Atua le aiga o Iopu. Ua mafai ona faamautuina lenei mau:

Amioga a le fanau a Iopu – e fiafia i patī ma faiga faapaupau o le inu ‘ava faatasi o tuafafine ma tuagane.

O le toalua o Iopu – e solomusa i le fautuaina o Iopu e faifai i le Atua ma oti ai.

Faatinoga o le Mataupu: Fefaasoaiga.

O le tala ia Iopu o loo manino lona tamaoiga i so o se mea. O faamanuiaga mai le Atua ona o lona ola mata’u i le Atua. Peitai o lea ua tatou faitau ma iloa, e le o se aiga amio-Atua le aiga atoa, na o Iopu lava. O lona uiga, e peiseai o le tele o ia faamanuiaga e mafua ona o Iopu. Tatou faasoa i le uiga o ia mea: e toatasi le tagata e amio Atua ae manuia uma ai le aiga. Ao le fanau ma le toalua e ola faatagata o Usa – tagata faapaupau. Ia mafaufau po o le a se aoaoga taua e mafai ona tatou iloa mai lenei tala mo tatou aiga i nei aso.

Afai o oe o Iopu e te amiotonu ma sao lau amio, o le a sau galuega e tatau ona faia i lou aiga? E te augofie e fai taulaga mu mo lau fanau e faamagalo ai agasala pe e te finau malosia e faasa lau fanau mai le faiga o patī?

Afai o oe o Iopu, o loo feagai ma tiga ae fautua atu lou toalua e te faifai i le Atua, o le a sau tala? (e mafai foi ona tali tamaitai i le fesili lea)

Aotelega:

1. Ia ola matata’u o tatou aiga i le Atua
2. O le faatuatua ola e le ila i se mea faigata.

Aso Sa: 31 Oketopa 2021
Mataupu: O NIKOTEMO MA IESU I LE POGISA –
Ioane 3:1-2/19:39

O le a se taua o le talanoaga a Iesu ma Nikotemo i le pogisa? O le fesili autu lea o le tatou mataupu o lenei aso.

Fesoasoani mo le taitai:

O le igoa Nikotemo – *Nikodemos* e maua mai upu Eleni e lua: *nike – victory, demos – people. Nikodemos - victory of the people* - Nikotemo – **o le manumalo o tagata.**

O Nikotemo o le tasi o le au faresaio – *Pharisee: o tagata atamamai latou te a’oa’oina le tulafono faa-Iutaia*- O Nikotemo o le faipule o Iutaia – *leader of the Jews* - o le isi lea tulaga taualoa o soo se faresaio i totonu o Iutaia, e faalupe i latou o faipule – *Leaders of the Community*. O faresaio ma le au Tusi Upu i le vaitau o Iesu, latou te lē taliaina Iesu o se Alo o le Atua. E manatu lava i latou, o Iesu o le atalii o Iosefa le kamuta. O le tama a Maria. E tutusa Iesu ma isi tagata – *normal people*. O le faapogai lea o lo latou sailiili masei i le galuega a Iesu. Latou te taumulumli e fia iloa ni auala e ono molia ai Iesu i le tulafono a le malo o Roma. Pe afai foi e talanoa se faresaio ia Iesu, e tasi a le a’uga, o le taumafai e faaleaga/faasesē aoaoga a Iesu ina ia tupu se feitagai i le va o Iesu ma tagata lautele. Peitai, e tulaga ese Nikotemo e pei ona iloa i le tala na tatou faitauina. O loo manino i le tala, na alu Nikotemo e faailoa ia Iesu lona ofo tele ma le taliaina o tala’iga ma a’oa’oga faatasi ma faailoga(signs) o lo o faia e Iesu. O le fuaiupu ua fa’aautu i ai le tatou mataupu o loo tele lava ni aoaoga taua o loo afifi mai ai:

f. 2 **“Rapi e, ua matou iloa o oe o le a’oa’o ua maliu mai le Atua; auā e le mafai e se tasi ona fai o ia faailoga e te faia, ana le ia te ia le Atua.”**

“Rapi e” – O le faalupega e faalupe ai tagata maualuluga o lo o a’oa’oina faiaoga o le tulafono faa-Iutaia - *Rabbi – meaning: my great one, my honourable sir: a title used by the Jews to address their teachers.*

O Nikotemo o le faresaio, o le faiaoga o le tulafono. A o le faiaoga o Nikotemo e faalupe o le – *Rabbi/ Rapi e*.

A o lea ua faalupe/faaigoa e Nikotemo Iesu o le *Rabbi*. O upu ua tautino ai lagona o le faatauvaā o ina ua vaavaai i *faailoga* na faia e Iesu.

O lo o fa’aaogaina e Nikotemo le *soanauna numera tele* i lana tautinoga – *Rapi e, ua matou iloa o oe*.... O lona uiga, e toatele isi faresaio ua latou iloa le mana ma le malosi ua i a Iesu ua faia ai o faailoga eseese peitai, e lē o mafai ona talanoa ma faailoa ia lagona ia Iesu e pei o Nikotemo. O le upu - *faailoga/signs* – i tusitusiga a Ioane, e uiga tutusa ma le upu – *vavega/miracles* e pei ona faaogaina i tusitusiga a isi fai Evagelia – Mataio, Mareko ma Luka. I le talitonuga o Ioane, o le faatutuina o tagata na ma’i pipili, o le faamaloloina o tagata na ulufia e temoni, o le faapupulaina o tauaso, o le faamaloloina o e na maua i le ma’i lepela ma isi lava galuega faamalolo na faia e Iesu, **o faailoga/signs ia o le Mana ma le Malosi ua ia Iesu mai le Atua.** Lea lava e tautino ai Nikotemo: *auā e le mafai e se tasi ona fai o ia faailoga e te faia, ana le ia te ia le Atua.* O le tautinoga ua saga faamautuina ai lo tatou talitonuga faa-Kerisiano: *E mafai mea uma i le faatasi mai o le Alii ia i tatou. E sa’o lea mau pe leai?*

*** Aisea ua alu ai Nikotemo ia Iesu i le pogisa.**

E lē o matua manino se tali mautū. Peitai, ua tatou iloa le va fesootai o Nikotemo ma Iesu i lona tulaga faa-faresaio, e le faigofie ona talanoa i le malamalama ao vaavaai tagata. O lo o manino foi le tala a Nikotemo, e toatele isi faresaio o loo fia talanoa ia Iesu ae le mafai ona o le vaai mai o tagata. Peitai, o lea ua sau i le pogisa, i le manatu, na o le pau lea o le auala e maua ai se avanoa e faasoā ai ia Iesu i se mea o i lona loto. O lona uiga, o le alu i le pogisa, e le o se mea leaga i le manatu o Nikotemo. A o se auala ina ia le gata e tali ai lona mana’o e talanoa ia Iesu, ae o se auala to’afilemu foi lea mo ia ma lona valaauina.

Galuega 17: 10 – o loo taua ai le alu ese o Paulo mai Tesalonia i le pogisa ona o le matamataita o tagata i le Tala Lelei. O lo o fesiligia ai foi e nisi pe aisea ua sola ese ai Paulo i le pogisa, pei se alu a se tagata ua leai se faatuatua. Peitai, o le alu o Paulo i le pogisa, o se auala e tausi ai le filemu i le va o le au faigaluega ma tagata o le nuu.

O mea e faatauvaā i le manatu o tagata o iina o lo o galue mai ai le mana o le Alii mo le manuia o lana Tala Lelei.

A fa'aauau le talanoaga a Iesu ma Nikotemo, na oo lava i le uiga o le toe fanaufouina o le tagata, ina ua lafoai uiga tuai ma amioga o le pogisa ae faasaga tonu i le Alii ma lona finagalo.

Na i ai se aoga o le talanoaga a Iesu ma Nikotemo i le pogisa? –

Ioane 19: 39 o loo faamatala ai le sao taua o Nikotemo na fai mo Iesu a o lei tuuina i le tuugamau. (Faamolemole faitau ma faasoa i ai le Autalavou)

Faatinoga o le Mataupu: Fesili mo le Sailiiliga

1. O le a le uiga o le igoa Nikotemo?
2. O a ni mea taua o mafai ona iloa i upu a Nikotemo i le fuaiupu 2?
3. Na i ai se aoga o le talanoaga a Nikotemo ma Iesu i le pogisa?

Aotelega mo le Taitai:

E taua le fesili e tupu ai le malamalama. Sa lilo lava i manatu o Nikotemo, mafai ona toe fanaufouina o ia e avea ma tagata o le Alii. E ui o loo tuuaia le sau i le pogisa, peitai, o faiga lava e faatupu le filemu ae ia maua se tali o le tuufesilisili. Fesili ia Iesu pe a e fia iloa se mea.

Aso Sa: 7 Novema 2021

Mataupu: O LE LOTO MAA'A O FARAO

E lē o se mea e lelei le loto maa'a poo le loto malosī. E le o se uiga foi e tatau mo i tatou le Tupulaga Talavou. O le mataupu o lenei aso, o le a tatou sailiili ai i le loto maa'a o Farao ma ona aafiaga.

Fesoasoani mo le Taitai:

O ai e mafua ai le loto maa'a o Farao? O le Atua poo Farao?

O nisi o tusi si'i mai le Tusi Paia o loo taua ai le Atua na ia faamaa'aina le loto o Farao:

Esoto 4:21, 7:3, 9:12, 10:1, 20, 27, 11:10, 14:8 14:4, 8. O le fesili ua tula'i mai le mafaufau: E finagalo ea le Atua ia faamaa'aina loto o tagata? O le tali mautinoa, e leai. E lē finagalo le Atua ia faamaa'aina loto o tagata. Ae faafepefea ona faamaa'aina e le Atua le loto o Farao?

O lo o manino le fetalaiga a le Atua ia Mose ma Arona i le amataga – Esoto 3: 19-20 – “*A ua ou iloa lava e le tuuina mai outou e le tupu o Aikupito ina ia o, sei iloga o le lima malosī; a ou te faaoo atu lo'u lima*

ma ou taia Aikupito i o'u vavega uma lava ou te faia i ai; mulimuli ane na te tuuina atu outou e o”.

A o le'i taunuu Mose ma Arona i Aikupito, ua loa ona silafia e le Atua le mea o le a tupu. O vavega ma faaaliga o le mana o le Atua e pei ona faia i Aikupito, o fuafuaga uma ia a le Atua ina ia faigofie ia Farao ona faamatu'u le nuu e o. Peitai, o le vaavaai pea o Farao i nei vavega ma mala e pei ona tutupu i ona tagata, ua mafua ai ona faamaa'aina lona loto. I se isi faaupuga, o le ita o Farao i vavega o loo faia e le Atua, ua afua ai ona maa'a lona loto. O lona uiga, e lē o le Atua ua faamaa'aina le loto o Farao, ao Farao lava ia i lona vaavaai atu i vavega a le Atua ua afua ai ona maa'a lona loto. Ae galo ai ia Farao, e leai se tagata e tutusa ma le Atua Soifua. E leai sona malosī, po o le malosī o ana faataulaitu, po o atua o lo o tapuai i ai e mafaia ona tineia le mana silisiliese o le Atua o Isaraelu.

O a aafiaga o le loto maa'a i le Atua?

O lo o manino le tala o le Tusi Paia, i mafatia o tagata Aikupito ona o Farao ma lona loto maa'a i le Atua. E pei ona taua i luga – Esoto 3:19-20, o mala e sefulu, o se vaega o fuafuaga a le Atua ina ia a'oa'oina le loto maa'a o Farao, peitai e le'i mafai lava. Na iloga ona aafia le siosiomaga, mafatia tagata i mala, fasiotia ulumatua o fanau uma, ma oti i le sami ulaula, ona o lona loto maaa i le Atua. A tatou mafaufau i nei aafiaga, e matua ogaoga ona tiga. O lona uiga, e le o se mea lelei le loto maaa i le Atua. Fai mai le isi toeaia, atonu e maua sou avanoa pe a e loto maaa i le isi tagata, a o le Atua, e leai ma se isi e sao ai.

Se mea lelei lou loto maa'a i le isi uso a tagata?

Ua tatou iloa ma a'oa'oina mai le tala ia Farao, e lē o se mea lelei le loto maa'a i le Atua. O lona uiga, e lē o se mea lelei foi le loto maa'a i le isi uso a tagata. Ua tatou iloa ma mautinoa, e lē maua se nofo filemu po o se fealofani i lenei mea o le loto maaa. Ae tatau ona maua e tagata uma o se mafutaga le loto lelei, o le loto alofa e fusia ai mea uma e faia.

Faatinoga o le Mataupu:

1. O ai e mafua ai le loto maa'a o Farao? Atua poo Farao?
2. O a ni aafiaga o lea mea na faia e Farao mo lona nuu?

3. O le a se mea taua ua a'oa'oina ai i tatou mai lenei tala? Se mea lelei le loto maa'a pe leai?

Aotelega mo le Taitai:

E le o se mea lelei le loto maaa i le Atua. Atonu o lo o taumafai lava Farao ia manumalo i le Atua, peitai, e leai se isi e mafai ona ia sosofa le Silisili Ese ma le Matautia o le Atua Soifua.

Aso Sa: 14 Novema 2021

**Mataupu: O MALA E SEFULU MA atua O AIKUPITO –
Vaega 1**

O mala e sefulu na oo ia Aikupito ona o le loto maaa o Farao, e i ai lo latou sootaga ma atua eseese na tapuai ma faamoemoe i ai Aikupito ma le tupu o Farao. O mala muamua e lima ma atua o Aikupito le Aso Sa lenei, ae fa'auau i le vaiaso fou le isi lima mulimuli.

Fesoasoani mo le Taitai:

O atua eseese e sefulu (10) o Aikupito na faatoilaloina e le malosi o le Atua o Isaraelu e ala i mala na oo ia Farao ma lona nuu ona o le musu e faamatu'u Isaraelu.

O atua eseese nei o Aikupito na faatoilaloina e le malosi o le Atua o Isaraelu a o taumafai ai Mose ma Arona ina ia faasaoloto le nuu mai le pule a Farao.

(1) Hapi – god of Nile - this Egyptian god was a water bearer. (*O le atua o vaitafe e aofia ai le vaitafe tele lenei o Naila*). E tolu ni vaega tetele na mafua ai ona avea le vaitafe lenei o Naila ma atua o Aikupito

1. o le vai e maua ai meaai e pei o i'a

2. o le vai taumafa o le nuu

3. o le vaitafe e fetafea'i solo ona magāvai i totonu o Aikupito e faasūsū i faatoaga ma soo se atinae. O fea lava e oo i ai le vaitafe o Naila, e talitonu Aikupito o le a oo i ai le ola.

O itu taua ia o le vaitafe o Naila na faatamai'a ma faamutaina e le malosi o le Atua o Isaraelu, ina ua taia e Mose le vaitafe i lona to'oto'o ma liua ai le suavai i le toto - **Esoto 7: 14-25**.

Molimau le Tusi Paia, na mamate i'a ma ua le mafai foi ona inu se tasi mai lenei vaitafe mo aso e fitu. E lē taumate foi le faatamai'a o lafu manu ma faatoaga ina ua faaleagaina le vaitafe. Peitai, na avea ulua'i mala lenei ma ala o le faamaa'aina o le loto o Farao, ina ua iloa ma mautinoa, e mafai foi e ona tagata faataulaitu ona faaliu toto le vai.

(2) Heket - goddess of Fertility, Water, Renewal - she had the head of a frog (*o le atua fafine o le faatuputeleina, o vaitafe ma le faafouina – o lona ulu e foliga o se RANE*)

Na faamaualuga Farao e mafaia e lona atua lenei ona faafouina mea uma ua faaleagaina e le vai ua liu toto, e aofia ai:

1. toe faalauolaola ma faalauusi atinae ua mamate ona o le vai ua liu toto.

2. toe faaleleia vai uma o Aikupito ua faaleagaina.

Peitai, o le tala a le Tusi Paia, o le mala lona lua, o Rane e faaa'e mai vaitafe: vaita'i ma vailepa ma lilofia ai maota o le tupu ma ana auuuna atoa ma le nuu uma– **Esoto 8:1-15**. E pei ona faamatalaina, na mafaia foi e faataulaitu a Farao ona faaosofia Rane mai le vaitafe pei ona faia e Mose ma Arona. Peitai, e lei mafaia e faataulaitu a Farao ona tutuli ese o Rane ua na o Mose ma Arona. O le ala lea na ai'oi ai le Farao mo se fesoasoani ma le tautinoga o le tuu atu le nuu e o pe a tuliese a Rane. Mulimuli ane, ua pepelo Farao ma ua atili faamaa'aina ai lona loto i mea ua ia vaai atu i ai.

(3) Geb - god of the dust on the earth (*atua o le efuefu o le fanua*) O le mala lona tolu e pei ona faamatalaina, o le efuefu o le fanua ua liu 'utu i le nuu uma lava o Aikupito. O le silisili ese lea o le Atua, ua ia faatoilalo ai le isi atua lea o Aikupito. O le 'utu ua lilofia ai le nuu uma, o tagata atoa ma manu.

E lei mafaia e faataulaitu a Farao ona faia o se mea faapea ona latou fautuaina lea o le tupu: “O le aoao lenei o le Atua o Isaraelu”. Peitai, e lei suia ai le loto maa'a o Farao i le Atua Silisili Ese.

(4) Khepri - god of creation, movement of the sun, rebirth – had the head of a fly (*atua o le foafoaga, o le gasologa o le la ma le fanau fouina – o le atua o lona ulu e foliga o se lago/garova*)

O le mala lona fa, o lo o faamatalaina ai le vao garova/lago e tele e ufitia ai laueleele ma fale o Aikupito – **Esoto 8: 20-32**. O le faailoga o le faatoilaloina e le Atua Soifua o le isi atua lea o Aikupito – *Khepri*. O garova e na o tagata ma eleele o nonofo ai Aikupito e lilofia i ia garova, a o tagata ma eleele o Kosena o loo aumau ai tagata Isaraelu o le a lē oo i ai garova/lago. Ua iloa e Farao ua matautia le mala ua oo atu, ona ia toe ai’oi lea ia Mose ma Arona, ina ia aveese garova/lago mai le nuu o Aikupito ma le tu’utu’uga o le a tuu atu le nuu e tapuai i le Atua Soifua ini nai aso mulimuli ane. Peitai, e lei faamaoni foi Farao i ia upu, ma ua tupu tele ai le ita i lona loto.

(5) Hathor - goddess of love and protection - had the head of a cow (*atua fafine e alofa ma leoleo i manu o le fanua – e tino i tagata, ao lona ulu e peseai se ulu o se povi*). O *Hathor*, o le atua fafine e talitonu Farao ma Aikupito e alofa ma malu puipua lana leoleoga mo manu uma a Aikupito o lo o i le fanua. Peitai, o le mala lona lima, o le faama’i ua matuā mamafa ua taia ai manu i le fanua o Aikupito: solofanua, asini, kamela, povi ma mamoe – **Esoto 9: 1-7**. O le mala ua faatoilaloina ai le malosi o *Hathor* ina ua mamate manu o le fanua o Aikupito ae maloloina pea manu a Isaraelu. Ua le mafaia e le malosi o *Hathor* ona leoleo ma laveai manu a Aikupito. Ao manu a Isaraelu, ua saogalemu pea i le alofa ma le leoleoga malu a le Atua Soifua.

Aso Sa: 21 Novema 2021

**Mataupu: O MALA E SEFULU MA atua O AIKUPITO –
Vaega 2**

O mala mulimuli e lima na oo ia Aikupito ona o le tetee i le finagalo o le Atua e aofia ai:

(6) Isis - goddess of medicine and peace (*atua fafine o vailaau ma le filemu*).

O le mala lona ono o le ma’i fulafula e faapogai mai le efuefu o le umu, ua sa’alu’u solo i le savili – **Esoto 9:8-12**. O le ma’i e lei mafaia e taulaitu o Aikupito ma le atua o *Isis* ona foia i se vailaau. O le faama’i na matua tupu ai le manūnū ma ua lē maua ai se filemu o le nuu atoa. O

le efuefu mai le ogaumu e tao/susunu ai piliki/bricks - *soot from the kiln* – saalu’u – *throw* – lafoai i le matagi le efuefu

(7) Nut - goddess of the skies (*atua fafine o le vanimonimo*).

O le mala lona fitu (7) ua faatoilaloina ai e le Atua Silisili Ese le malosi o le atua fafine lea o Aikupito – *Nut - atua fafine o le vanimonimo*. E pei ona faamatalaina, o le uato’a ua fefiloi ma le afi ua ufitia ai le eleele – **Esoto 9: 13-35**. O laau ma tagata ua faatamaia uma. E le gata i lea o le ua (timuga) ma le faititili ua faatōtō ifo e le Atua i luga o Aikupito uma seia vagana ai Kosena, o le nuu o lo o nonofo ai Isaraelu. O le mala ua fa’aalia ai le leai o se malosi o *Nut*, e mafai ai ona ia aveese pe taofia le uato’a ma le faititili e pei ona faatupu e le Atua. O loo taua i le tala, o le mala lona fitu lena na tautino ai Farao ua agasala i luma o le Atua mo se taimi muamua talu ona faaalua le Silisili Ese o le Atua o Isaraelu – *f. 27*.

(8) Seth- god of storms and disorder (*atua o matagi malolosi ma le fenumiai*)

O le mala lona valu, o se akerise na aumai e le matagi mai i le itu i sasae ma ufitia ai eleele uma o Aikupito – **Esoto 10: 1-20**. O lo o faamatalaina, na pouliuligia le lagi i le tele ma le anoanoai o ia se akerise. Mulimuli aen ua faatoga Farao i le Atua o Isaraelu ina ia laveai i latou mai lena mala. Ona fa’aagi mai lea e le Atua, o le matagi ma le itu i sisifo ma tafieseina ai se akerise. O le silisili ese o le Atua o Isaraelu, na tutupu ai ia mea. Aua e lei mafaia e le malosi o Seth, le atua o Aikupito ona taofi o ia matagi mai sasae ma le matagi mai sisifo. O mea lava na tutupu, ona o le matautia o le Atua Soifua. Peitai, e le’i suia ai lava le loto maaa o Farao le tupu. E tiga lava ona fautuaina e ona tagata, ae tumau pea lona tetee i le Atua.

(9) Ra -god of the sun – Esoto 10: 21-29

O le mala lona iva, o le pouliuli na ufitia ai le nuu o Aikupito mo le tolu (3) aso. O le pouliuli na le mafai ai e Aikupito ona faia o se isi lava gaioga, ae ua na o le nonofo i o latou aiga. O le silisili ese o le Atua, na ia punitia ai le la. A o le isi lea atua o Aikupito, o Ra, o le atua ole la. Peitai, e le’i vaoia e *Ra* le pule a le Atua, ina ia pouliuli le nuu o Aikupito ae malamalama pea nofoaga o lo o i ai Isaraelu.

(10) Pharaoh - Farao - the Ultimate Power of Egypt – Esoto 11:1-10

O le mala mulimuli, o le fasiotia lea o ulumatua uma a Aikupito e aofia ai ma le ulumatua a Farao le tupu. O le atua mulimuli lea o Aikupito na faatoilaloina e le Atua – o Farao. O le mala mulimuli lenei na suia ai le mafaufau o Farao ma tuu atu loa Isaraelu e o e pei ona fetalai mai o le Atua e ala mai ia Mose ma Arona.

Aotelega a le Taitai:

1. E leai se isi atua e tutusa ma lo tatou Atua.
2. Aua le ifo i tupua ae tau o le Atua Soifua

Aso Sa: 28 Novema 2021

Mataupu: A’OA’OINA MAI MEA ITI

O mea iti e mafai ona faasino i mea e manatu faatauvaa i ai le tagata. O le tele o taimi tatou te le manatu mamafa e i ai sona taua pe maua ai se mea aoga. Peitai, e i ai mea faatauvaa i le tatou vaai o lo o aumai ae se feau faaleagaga e pei ona faamauina i le Tusi Paia.

Fesoasoani mo le Taitai:

O le mataupu o lenei aso, o se toe tepa lea i mea na tutupu o lenei tausaga, ma fesili po o a ni mea aoga na a’oa’oina mai ai.

Tala filifilia mai le Tusi Paia:

Faataoto 6: 6-8, 30: 24 -25 – taua o le loi ma ana galuega: O loo manino le loi ma lana galuega faaputuputu i taimi o le lelei o le tau. E oo mai aso louloua ua na o le taotooto ma fa’aaoga. Ua a’oa’o le olaga galue o le loi, ina ia tatou galulue manu o ao, aua e sau le aso e malolo ai, ae ua lava ma totoe sa tatou galuega ua faia.

Tala faamauina o aoga o le Asini:

Kenese 49:14-15 – ua faatusa Isakara i le asini ave avega, i le malosia ma le lava onosai.

Numera 22: 28-31 - O le asini na laveaiina le ola o Palaamo. Na iloa e le asini le agelu ae le iloa Palaamo.

Isaia 1:3 – E iloa e le asini lona matai ae le iloa e Isaraelu lona Atua.

Mataio 21:2 – O le asini na faaoga e Iesu i lana malaga faatupu. O le faailoga o le filemu ma le loto mauualalo.

O amioga ia e tatau ona aoaoina ai i tatou mai le Asini:

- ia loto malosia e fai mea lelei e pei o le asini
- ia mataala la tatou vaai i auala o lo o galue mai ai le Atua.
- afai o lea e iloa e le asini lona matai, o lona uiga e tatau ona tatou iloa ma manatua pea lo tatou Alii le Atua
- ia maua le filemu ma le lotomauualalo

Mataio 26: 34 – vivini o le moa – faamanatu ia Peteru le fetalaiga a Iesu i lona tetee ma faafitu ia te Ia.

E i ai mea e tutupu, o lo o faailoa ai le finagalo o le Atua i lo tatou ola. O le taua lea o le usitai ma faalogo i matua ma fautuaga lelei. Ae aua le faia o tatou loto, aua e iu ai i le faafanoga.

Mataio 23:37 – alofa o le Atua e pei o le alofa o le moa i lana toloai.

“...e pei o le moa ona ofaofatai i lana toloai i lalo o ona apaau ae lei mafafai outou” O le fetalaiga manino a Iesu o lo o faamatala ai lona naunau alofa ia faamaopoopo i lona nuu ma ona tagata e pei o le moa i lana toloai, peitai, ua le mafafai loto faigata o tagata Ierusalema.

O le alofa o le Atua e faapei ona alofa o le moa i lana toloai. Po o lava fili e taumafai e osofai le toloai a le moa, e finau foi le moa e puipui i lana fanau. Ia faapena lo tatou alofa i aiga ma fanau. Ia tausili e puipui ma laveai mai faigata o lenei olaga.

Faatinoga o le Mataupu:

Ia saili mai ni tala o le Tusi Paia e talafeagai ma le Mataupu.

Aotelega o le Taitai:

O le tele o taimi e ave la tatou faamuamua i mea tetele ma mea mananaia ae galo ai mea iti po o mea foi e faatauvaa. Ae i ai le taua o ia mea i le olaga o lo o tatou ola ai. O le faamoemoe o lenei mataupu, ia aveese le manatu faatauvaa i isi tagata. Aua e mafai ona fa’aaogaina e le Atua mea faatauvaa e auala mai ai lona finagalo: 1 Korinito 1: 27 – **“a e peitai ua filifilia e le Atua mea vālea a le lalolagi, ina ia faamāina ē popoto, ma mea vaivai a le lalolagi ua filifilia ia e le Atua e faamāina ai mea malolosi”**

Aso Sa: 5 Tesema 2021

Mataupu: O LE ATUA LIUTINO TAGATA – Ioane 1: 1-2

Ua tatou aga atu e faamanatu le Kerisimasi, le vaiata na soifua mai ai Iesu le Pepe o le Kerisimasi. E le o se mea e fou, ae taua lava le faamanatu ma le loto faafetai ona o le Atua ua liutino tagata.

Fesoasoani mo le Taitai:

O fuaiupu o le tusi o Ioane ua filifilia:

“Sa i le amataga le Upu, sa i le Atua le Upu, o le Atua foi le Upu. O ia lava sa i le Atua i le amataga.”

O le Upu – *Lokos* – Lokou o lo o faasino i le Atua sa i le Amataga o le Fofoaga ma mea uma, a o lea ua liutino tagata e ala ia Iesu. O le itu taua e fia faamamafaina e le tatou mataupu: O le to manatu lea i le Atua, ua tuua lona mamalu ma lona silisili ese ae ua afio mai i le lalolagi agasala. O le Atua na afio i le nofoalii, ae ua liutino tagata, ua savavali, aai, momoe ma militino faatasi ma tagata agasala o le lalolagi.

I le soifuaga o aso uma, e leai lava se tagata e fia faia lea mea ua faia e le Atua: o le tuua o le mamalu ma le silisili ese ae sau e militino faatasi ma tagata. O le lalolagi lenei, e leai a se isi e toe fia fo'i i tua pe fo'i i lalo lona olaga i se mea tuai. O tagata uma lava, e naunau ia agai pea i luma ma agai pea i luga o latou taumafaiga uma.

Peitai, o le tulaga ese lea i le Atua ua liutino tagata. E le gata i le tuua o le mamalu ma le silisili ese, ae o lona Afio mai foi i le lalolagi, na sau e ofo lona ola mo isi tagata. E lei sau le Atua e ala ia Iesu e saili sona lelei po o sona manuia na o Ia. Ae na Afio mai ina ia Faolaina i tatou uma le lalolagi agasala.

Ailoga e mafaia e se isi ona faia o lea mea: ***o le tuua o le mamalu ae sau e ofo lona ola mo tagata matitiva ma tagata vaivai?***

Aotelega a le Taitai:

Ia fai se galuega mo le isi tagata. Ia taumafai e militino faatasi ma tagata o lo o moomia le fesoasoani. Ia lagona mafatiaga o isi tagata e faapei ona Afio mai ai le Atua e ala i a Iesu le Pepe o le Kerisimasi.

Aso Sa: 12 Tesema 2021

Mataupu: O LE A SAU MEAALOFI MO IESU I LENEI TAUSAGA 2021?

E fautuaina le faasoa o le Autalavou i ni mea aoga na maua i lenei tausaga a o faagasolo mai galuega faale-Autalavou.

Ia manuia le Kerisimasi ma le Tausaga Fou
